


DIFUNDA DYÀ KU CILUMBÙ

 Twasàkidila, Mwanèètù Neville. Tùshaalàayi biimànyine kuulu katanci kakesè cyanààna mpindyewu bwà disambila. Twinyikàayi mitù yètù. Kùdikù malòmba makula, àdi mwà kumanyishiibwa ku cyanza cyela muulu, ànu kùdì Nzambi cyanààna, wamba ne: “Ndi—ndi...”? Shààla mulamè mu meeji èbè mpindyewu cyùdì—cyùdì muswè kuMulòmba aci, ne ùciitabùùjè ne mwoyi wèbè wònsò, pàndì ndàmbula disambila dyànyi bwèbè wèwè apa, mèmè pàanyi.

² Taatù wa mu Dyulu, tudi . . . tubala eci bu ne ndyèsè dinène, dyà kulwa ku nzùbu wa Mukalenge, mu ditùkù edi dyà dibwicidila, ne—ne kupeta Bukènkè bwà Mwànà bwà Nzambi bùkenkesha, ne kuumvwa Nyumà Mwîmpè wimbila misambu mu bantu, ne wàkwila mu bantu, ànu—nsèsè mikesè yà bukènkè bwà Mwànà munda amu. Tudi tuKwela twasàkidila bwà bwalu ebu, bukènkè bwà Mwànà wa mu Dyulu ku nyungulwilu wa myoyi yètù. Mùshindù mwinè wutùdì tuKwela twasàkidila bwà bwalu abu’s wè! Mpindyewu mbòbò aba biikàle. . .

³ Cisàmbà Cyèbè ncibàndishe byanza muulu mu disangisha edi, bwà ne bàdi ne malòmba, bwà ne bàdiku bàjinga bwà Wèwè kuàndamuna mu dindà emu. Nènku ndi ndòmba, Taatù, bwà Ùfilèku dyònsò dyà ku malòmba àbò. Kùdì malòmba bùngì cyanààna, mambakaja pa cyambilu apa, ne malòmba bùngì kabùyi kubala myaba yònsò, bantu babèedi, bàsaama; mabiikila à ku téléfonè, à ntàntà mule, ipacila ku makùmi àtaanu ku ditùkù. Éyi Nzambi, netwènzè cinyi? Tùlombòlèku ànu cyanààna, Mukalenge. Katwèna—katwèna bamanye njila wa kuyila anyi cyà dyanza to, kàdi Wèwè udi mwà kuludika bintu ebi, nènku tudi tulòmba bwà Wèwè kutùpèeshaci. Bwalu, cidi—cidi ndijinga dyètù, Mukalenge, mwoyi wònsò utùdì naawù pa buloba mmutùpèesha kùdì Wèwè, ne tudi baswè kukwàta naawù mudimu bwà kuKutwa naawù mushinga. Mpindyewu Wèwè tulongolaaku mu bintu ebi, Taatù.

⁴ Tùbènèshèku leelù ewu patùdì badisangishe bwà kutèeleja Dìyi dyà Mukalenge apa, bwà kwimba misambu, bwà kwenza disambila. Tèelejàaku masambila ètù. Sànkà pàmwè neetù mu misambu yètù, ne akùlaku neetù ku Dìyi, bwalu tudi tulòmba nùnkù mu Dìna dyà Yesù. Amen.

Nudi mwà kusòmbaayi.

⁵ Ncyèna mumanyè mwaba nànsha ùmwè ùndi mufwànyine kucinka ne ngwà dyèsè ditàmba bunène bwà kwimanapù, kutàmba kwikala mwimàne mu—mu cyambilu, bwà kucibula Dyàmpà dyà Mwoyi kùdì cisàmbà cidi cindile, ciikàle ne nzala, ne nyòòta. Ne edi’s ndyèsè dinène.

⁶ Dyàmbedi, ndi muswè kukonka ní—ní kùdikù muntu wa mu dīkù dyà baa Wright kaaba aka, Hattie anyi Orville, anyi ní nganyì? Hattie. Orville ùdi pàmwè neenù anyi, Hattie? Èè, mulòmbekù ní mmufwànyìnekù kulwila ku nzùbu, dyàkàmwè, bwà cìmvwà mumwambile, udi mumanyè's. Apicile ku nzùbu, ní ùdi mwà kulwa. Ndi mupwè mwoyi bwà kulwa naaci, mu dindà emu, cintu kampànda bwà kabwà kààbò kàdibo naakù kuntu kwàka aku. Nànku mvwa—mvwa ànu. . . Bu nwènù mwà kuswa, kupicila ànu lwà kumbèlu panùdi nuumuka bwà—bwà disangi- . . . paanyimà pàà disangisha.

⁷ Nènku mpindyewu, Edith, mwanààbò ne Hattie wa bakàji, utùdi bamanyè bu mwànà wa bakàji mutekète uvwa mucibùkile panshì kacya pàcìvwàye mwànà wa—wa mu dibòkò apu. Ne yéyè mmukàji mukolè mpindyewu, ne ùdi mu mùshindù mubi be. Mpindyewu mèmè, kùkaadi bu cidimu cijimà nànku awu, ngàakaya kuntwaku dībà dyàkakùlukàye mu disaamà dyèndè dyà kumpàla, ki dyàkàmwè mèmè kujandula cìvwà lutàtù lwèndè, ku dikwàcisha ne ngàsà wa Nzambì. Mpindyewu, mu bulelèlè, lutàtù lùdi kùdi mwànà awu. . .

⁸ Mmusòmbè, bidimba byèndè bilamàkàne pàmwè, ne kènà nànsha mwà kubìbaalula to, mbwà dicìncimikiibwa dikolè dyà bu—mu bwongò. Kàdi, bwalu bùdi ne, kakwèna cintu nànsha cìmwè cibi mu mubidi wà mwànà awu to, pa kuumusha lutàtù lwà dicibukila dyà panshì dyà ku bwànà pàcìvwàye ne ngondo mitwè ku yisambòmbò nànku awu. Ùvwa wèla mbila ne ùdila mwadi matùkù èndè ònsò àà mwoyi, bu nànku awu, too ne. . . Tuvwa bamusambìdile kukaadi bidimu byàbùngì, ne—ne ùvwa ne disànka kwambwila ànu piinè apu, too ne mwènjiku bu cidimu cijimà mpindyewu.

⁹ Nènku mpindyewu cìdi menemene ànu dibènga kutwa panshì. Mu ngaakwilù mukwàbò, ndishintuluka dyà mwoyi wèndè, ne mijilu yèndè yidi mu ngiikàdìlù wa bwalu kashondo. Ne inàbànza mutekète awu mmuteèke mu meeji èndè ne ùdi ùpùnga ne lufù, kààkwikala—kààkwikala ànu ne mwoyi to, biinè abi nku dībà ne ku dība. Nènku nudi bamanyè's. Nènku bakàji bàdi ne mubidi tumatuma, ne makàndà bàtu bàpicila mu cikondo cyà cikwàcisha bwòwà, misangu mikwàbò bitu bikèngela bwà kwangatabò nshingì yà hormone, ne—ne kubwela mu nzùbu yà babèèdi, ne bàngata manga à bikùminà ne bikwàbò byònsò, mu ciine cikondo aci.

Muntu ùsòmbèla ne mashintuluka àbìdi mu mwoyi wèndè.

¹⁰ Bàtu ne dishintuluka dyà kuumuka ku mwànà wa balùme kuya ku—ku muntu mulùme; kuumuka ku mukàji. . . kuumuka ku mwànà wa bakàji kuya ku mukàji. Mu bidimu bitwè ku dikùmi ne bisambòmbò, dikùmi ne mwandamutekète, bàdi bàshààla ànu bu musùmbà wà baa mpàtà—màci. Nènku—nènku bu nwènù ànu mwà kukènga naabò mu ciine cikondo aci.

Ndi ne mwânà wa bakàjì mu ciine cikondo aci mpindyewu mene, Rebekah. Nwâmusambidilaayikù. Ne Billy, kaa, yònsò wa kutùdì, tudi bapìcile mu cikondo cikesè cyà bupâlè aci. Nènku—nènku ki bwalu kaayi tudi ne cyà kutàta naabò, bajingùlùle ne ncintu kampànda cìdì—cìdìbò—cìdìbò ne cyà kupìcila.

¹¹ Nènku mpindyewu, Edith, ùdi mu dishintuluka dyà—dyà—dyà bidimu mwandamutekète edi. Bidimu mwandamutekète byònsò, nsòmbelu webè ùdi ùshintuluka. Pa nàнку mwandamutekète misangu mwandamutekète ayi, nudi numòna's, ne—ne bìdi bìcivwija cicolè ndambù, nènku aci ndishintuluka mu kaabujimà. Nènku citu—citu citàcisha bakàjì. Balùme bàtu misangu yònsò ànu benza lukutukutu lwà mùshindù awu mu ciine cikondo aci, ne misangu mikwàbò bàlekela bakàjì bààbò. Kàdi bakàjì bàdi—bàdi bàkosa lulèlu paanyimà pàà cikondo aci. Nènku twètù bònsò tudi tupìcilamù, nènku tudi ne cyà kuvùluka ne mbintu bitùdi ne cyà kutwàlangana muntu ne mukwèndè, ne kubyùmvwà.

¹² Ne Edith mwânà ewu ùdi ùsanganyiibwa mu ngiikàdilù ewu, ne mmujimìje bujitu bwàbùngì, ne ùdi ùmwèka bibì. Nènku—nènku—nènku ndi nkwàmbila ne, dilòlò kampànda, kì nkwènu bònsò cyàpàmwè to, kàdi ànu kaalwendu kakesè kuntwaku . . . Bàdi bàsòmba nendè, muunya ne bufùku. Ne kaa—kaalwendu kakesè kuntwaku kàà beena ku tabernacle ewu ne—ne tabernacle mishìllèshìllàngàne, ta—tabernacle myànà yètù yà mwab'ewu, bàmwè bàà ku nwènu ndaayikù nùkamònàngana ne dìkù dyà Wright. Ndi mutwìshìibwe ne nebàcyanyishè bikolè be. Kupweka ànu cyanààna, kusòmbakù naabò ndambù, ne kuyuukila naabò, kubàlabula ku cyanza, nànsha cyòci ànu dikùmbula dikesè dyà bulundà cyanààna.

¹³ Tudi—tudi tupwà aci mwoyi bipeepèle bikolè, nudi bamanyè's. Ne pàkaadìbi bikùngamangana ne dìkù dyètù sungasunga, dìbà adi tudi tucyànyisha. Nènku tudi ne cyà kuvùluka ne, bakwàbò bàtu bàcyànyisha, bòbò pààbò. Ne dìkù dyà Wright, ndi mutwìshìibwe ne, ndifwànyìne kwanyisha cyòci aci. Ndi—ndi mumanyè ne nuvwà bafwànyìne kucyènza bu nwikala bamanyè ne ngiikàdilù awu ùvwakù. Kàdi kanùvwà bacìmanyè to, pa nàнку kùvwà—ki bwà cinyi mvwà nkwàmbila mu dindà emu, bwà cyòci aci.

¹⁴ Ndàayi nùkakùmbùlèku dìkù dyà Wright, ne nùteetè bwà kukànkamikakù Edith. Mpindyewu, kanùmwambidì ne ùdi ùmwèka bibì to. Mwambilaayi ne ùdi “ùmwèka bìmpè,” yèyè “neikale bìmpè menemene.” Mbwenà kwamba ne, yèyè neikale bìmpè bu twètù mwà kushààla bakwàte ncyoncyoncyo bwèndè yèyè. Ki citùdì balwìle kaaba aka ncyòci aci. Yèyè mmwanèètù wa bakàjì, ne—ne tudi kaaba aka bwà kushààla bakwàte ncyoncyoncyo mu bikondo ebi bwà mwânà awu. Ànu bu mùntù muswè bwà muntu kampànda kukwàtayè ncyoncyoncyo bwànyì mèmè ne kunsambidila cikondo cìmvwà mpìcila mu

mateeciibwa àànyì, nènku wêwè's udi muswè muntu kampànda bwà èbè pèèbè.

¹⁵ Nènku—nènku dîkù dyà Wright ditu ntà—ntàntà. . . bîmwè byà ku bidimba byà kale menemene bitù bilwa mu didisangisha edi. Bóbò abu, ngèèla meeji, ne Mwanèètù wa balùme Roy Slaughter ne Mwanèètù wa bakàji Slaughter. Ndi mfùma ku dibàmòna kùkaadi katanci, ndi mubàkùpe cyanza dîbà dyàbwédìbo. Mémè kudyàmbidila, mémè mwinè, pàmvwà ngènda nyùnguluka ne màshinyì mu disangu mwàmwa ne: “Mbidimu búngì kaayi bìndì mumòne Mwanèètù wa balùme ne Mwanèètù wa bakàji Slaughter basòmbe mu èkèleeziyà emu, mu mabika ne mala, kàdi biikàle ànu batùngùnùke ànu ne kuya kumpàla?” Nènku dîkù dyà Wright, ne mùshindù awu, nudi nwanyisha bantu abu, nudi numòna's. Nènku tùleejààyikù—tùleejààyikù dyanyisha dyètù kùdìbo.

¹⁶ Mpindyewu, leelù ewu, ndi ne Mukenji mule. Ùdi pa difùndà dyà ku cilumbù.

¹⁷ Ne—ne pashìishe, dilòòlò edi, ndi ngùmva ne kùdi mèèsà à Mukalenge ne dyoweshangana dyà màyi ku makàsà, ne bikwàbò. Nànku mpaasàtà neàkulè, nènku netwikalè ne. . . netùpwekè. Nènku wêwè—wêwè mu nyùngulukilu emu, lwà ùsankè ne diyiiisha dyà—dyà kùdi mpaasàtà, dyà kùdi Mukalenge, ne pashìishe kàbìdì ne dyoweshangana dyà màyi ku makàsà ne—ne mèèsà à Mukalenge, dilòòlò edi. Dìvwa di—dilòòlò menemene dyà dipàte ne bintu be, pa nànku tudi bafwànyìne kwikala ne disànkà dyà kwikalakù neenù, panwikalà kanùyì ne mùngà mwaba wà kuya to.

¹⁸ Nènku tudi baswè kwanyisha Don Ruddell, ne—ne mwanèètù wa balùme awu, ne Mwanèètù Jackson. Ne—ne bânà bèètù aba mmwanèètù wa balùme, mmaèkèleeziyà ètù àdì maswikàkàne neetù. Mwanèètù Jack Palmer ewu, udi ulama ka—kasumbù kàà mu Géorgie mwàmwa. Nènku tudi—tudi—tudi baswè kwanyisha bantu aba ne mwoyi wètù wònsò. Bwalu, misangu yitùdi ne masangisha, pàndì ngààlukila, nènku bàdi—bàdi bàlwa bwà kutwèndela, ne tudi tucyànyisha.

¹⁹ Ndi mmòna, mu dindà emu, mulundà wanyì mwímpè, Docteur Lee Vayle ne mukàjèndè. Mvwa mujingùlùle Mwanèètù wa bakàji Vayle wàwa, dyàmbedi, ne mémè kutùngunuka ne kukènzakana bwà kumòna mwaba wùvwà Mwanèètù Lee ùsanganyibwa. Ki mémè kupeta, cyakwidi cyà kale cyà ku Sud aci cyà ne: “pààkumulambakeena,” nwamònu's, dîbà dyònsò dîngààmupetà adi. Mvwa mmukèba ditùkù dyònsò, ku mpungilu awu aku, bwà kwikalayè kuntwaku bwà kungambulwishayè. Mémè kwambna ne: “Èè, bu Lee yêyè mwà kulwa, nùmulekèlè àyiishè, nènku mémè nengènzè ànu disambila dyà babèèdì.” Ki twètù kumubiikidisha, ne bikwàbò byònsò, kàdi katùvwa mwà kumupeta nànsha. Pa nànku, bidi—bidi nànku, ndi

nendè cilumbu, pangààkula nendè. Nènku tudi ne disànkà dyà kwikalakù ne Mwanèètù wa balùme ne Mwanèètù wa bakàji Vayle mwab'ewu, mu dindà emu.

²⁰ Ne pàmwápa kùdi bakwàbò bààbúngi kaaba aka batùdi katùyi tuumvwa to. Ndi mmòna mwanèètù wa bakàji kaaba aka, ngèèla meeji, wa ku Chicago. Ncyèna mwà . . . Ndi mumanyè kasumbù aka, kàdi ncyèna ànu mwà kutèèla ménà àbò mu ôwò menemene to. Pa nànkù tudi—tudi tubànyisha bônso bàdi bafùme myaba yônso, mwaba wônso unùdi nusanganyibwa.

²¹ Ndi mmòna bânà bèètù kaaba aka, nsongààlùme yibìdi yà bitende yìdi ne cyà kujidiibwa (mbansongà mu mudimu wà bwambi, bwà aci kaayi ncilelela) mu dindà emu. Bàbìdi, bânà bèètù bàà bafiike bàà mu New York mwámwa, mbàcìpetelakù ànu mikàndà yàbò yà dijaadikiibwa naayi mu èkèleeziyà wa Philàdèlphie, ne bu mùdìbi ne èkèleeziyà ewu ke mùdìbo bàfùmina. Nènku netùbàtentèkèlè byanza, bwà Nzambi àbeneshè mudimu wàbò wà bwambi mu New York. Tudi ne èkèleeziyà yà mikesè yibìdi anyi yisàtù kuntwaku, ngèèla meeji. Mwanèètù Milano ùdi ne kàmwè kàà ku tusumbù tukesè atu kuntwaku, nènku tudi . . . tudi tubàanyisha. Nènku—nènku bakwàbò bàbìdi mbòbò aba bàpàtuka mpindyewu bwà kwenza, bàdi ne masangisha bwà bantu kuntu kwàka. Nènku tudi—tudi twanyisha bintu ebi.

²² Mukalenge ànùbèneshè mu mùshindù mubanjiike. Bààbúngi be; ndi nkènzakana mbàmòna bashiilèshiiilàngàne, ne kwèna ànu mwà kutèèla ménà àbò ónsò to, kàdi ndi mumanyè ne Yèyè ùdi ùmvwa.

²³ Mpindyewu, ndi ngèèla meeji ne, bu mwanèètù wa bakàji, mwimbi wa cisanji cyà pyànò awu, anyi umwe wa kùdìbo mwà kulwakù kaaba aka bwà kutwimbilakù.

Dikalà dyà Kapyà pààkalengàdi mupròfetà,
 Dìmuwija mukezùke ànu ne mwèndè
 mwónso,
 Nènku pààkambà Dìyi dyà . . . Dìyi dyà Nzambi
 ne: “Wàya kaaba kèètù nganyi?”
 Dìbà adi yèyè kwandamuna ne: “Mmémè ewu,
 ntùmaaku.”

²⁴ Patudi tujidila bambi aba mu dibàtentekela dyà byanza, apa. Mpindyewu, tudi bamanyè ne mùshindù wà mu Mifundu wà kujidila mwambi kampànda nku dimutentekela dyà byanza. Ngèèla meeji ne mwaba awu ke wùdì bânà bèètù bàà Mvùla Mushiiishe, anyi beena Battleford, ne bakwàbò, bapetèle cibwejàkàji apu; nènku pààkamònàbo cyòci aci, ditentekelangana dyà byanza, bwà kwabanyinangana mapà à nyumà. Mpindyewu, katwèna twitabuuja ne mapà àdi àlwa ku ditentekelangana dyà byanza to. Tudi twitabuuja ne . . . ditentekelangana dyà byanza nditwa dyà cyàlà pa bitùkaadi

bamanè kumòna. Nwamònu anyi? Cidi: “Amen.” Nwamònu anyi?

²⁵ Mpindyewu, pàakatentekelàbo Timòtè byanza, ne pa bânà bèètù abu, bàakamòna ne mu bantu abu mùvwa dipà adi. Vùlukàayi ne: “Bindulula dipà divwa munda mwèbè adi, difùmìne kùdi kakwèbè mukàjì Lois.” Ne bàakamòna cyòcì eci mu Timòtè, ne ki bwà cinyi bakùlù bàakamutentekela byanza ne kumujidilabò. Kì nkutentekela muntu byanza uvwa cintu nànsha cimwè kaciyi cileejùbwe to, nudi numòna’s. Ki kulòmbabò ànu mabènesha cyanààna. Ne twètù bònsò tudi twitabuuja aci. Pa nàнку katwèna twabanyinangana mapà à nyumà to; tudi ànu tuitaba, ne kubàtentekela byanza, bwà kubàmanyisha ne, ne tudi twitabuuja ne Nzambi mmwenze bintu byà mùshindù awu bwà bantu.

²⁶ Ngàmònu, mu dindà emu, lwà paanyimà menemene apu, Mwanèètù McKinney wa ku . . . Ngèèla meeji ne n’Kinney anyi McKinney, mwambi wa ba-Méthodistes udi musòmbè paanyimà pàapa wàwa, uvwa mujidila pèndè mu mudimu mwab’ewu, matùkù mashàale aa, ngèèla meeji ne bivwa nàнку, ku cibumba cyà ku cyambilu eku; bwà kushàala batwè mpàndà ku Ohio, ne Mwanèètù wa balùme Dauch ne Mwanèètù wa bakàjì Dauch, ne kasùmbù kàa ku Ohio aku.

²⁷ Kaa, dîbà ditùdi tudisangisha pàmwè, myaba mikesè eyi yìdisangisha pàmwè, mbilenga byà dikèma. Kakwèna dîngumba to; kakwèna myonji yà cintu nànsha cimwè to, kàdi ànu kùdi Yesù Kilistò, kwàjìkì, nwamònu’s, ànu “kusòmba pàmwè mu myaba yà mu Dyulu.”

²⁸ Èyo, mwanèètù wa bakàjì, bu wèwè mwà kutùpèesha . . . Twìmbàayi ànu citùminyì cimwèpelè cyà wòwò awu ne: “Dikàlà dyà Kapyà pàakalengàdi mupròfeta.” Tùwìmbàayi bònsò cyàpàmwè mpindyewu.

Dikàlà dyà Kapyà pàakalengàdi mupròfeta,
Dimuvwija mukezùke ne mwèndè mwònsò,
Pàakambà Dìyi dyà Nzambi ne: “Wàya kaaba
kèètù nganyi?”

Dîbà adi yèyè kwandamuna ne: “Mmèmè ewu,
ntùmaaku.”

Akùlà, Mukalenge wanyi, akùlà, Mukalenge
wanyi,

Mpindyewu bânà bèètù nebàlwe, bu nwènù mwà kuswà.

. . .nèнку nèngùikalè ne lùkàsà bwà
kwandamuna . . .

²⁹ Bambi naanyi bakwàbò bàlwe kumpàla eku, bòbò mwà kuswà, bìikalà mwà kubàtentekela byanza.

. . .Mukalenge wanyi . . .

Bakwàcishanganyi bàà mudimu ne tabernacle ewu, Mwanèètù Ruddell, Mwanèètù Lamb, ne bakwàbò abu. *Apa mene, bu nwênù mwà kuswà.*

...nènku mèmè nêngàdamunè ne:
“Mukalenge, ntùmaaku.”

(Bitùùlùbitùùlù mpindyewu, bu nwênù mwà kuswà.)

Kaa, mìliyô mpindyewu ke kufwàbo mu mpèkaatù ne bundù eku,
Tèèlejà mwadi wàbò wà dibungama ne kànjabàla;
Kolèshaayikù, bânà bèètù, kolèshaayi nùye kabàsùngila;
Andàmùnàku ne lùkàsà lwònsò ne: “Mfùmù, mmèmè ewu.”

Akùlà, Mukalenge wanyì, akùlà, Mukalenge wanyì,
Akùlà, ne mèmè nêngìikalè mwà kuKwandamuna ne lùkàsà;
Akùlà, Mukalenge wanyì, akùlà, Mukalenge wanyì,
Akùlà, ne mèmè nêngàdamunè ne:
“Mukalenge, ntùmaaku.”

³⁰ Dìna dyèbè nganyì, mwanèètù wa balùme? [Mwanèètù wa balùme awu ùdi wàmba ne: “Orlando Hunt.”—Muf.] Mwanèètù Orlando Hunt, wa ku Cimenga cyà New York. Ncyà bushùwà anyi? Ne Mwanèètù . . . [Mwanèètù mukwàbò awu ùdi wàmba ne: “Joseph Coleman.”] Joseph Coleman.

Mpindyewu bu nwênù ànu mwà kutàngila mu batèèleji mwàmwà, bânà bèètù wanyì.

³¹ Mwanèètù Hunt ne Mwanèètù Coleman, dibìikila dyà Nzambì pa myoyi yàbò. Ànu bu mutwáfùmi ku dimba musambu awu ne: “Kùdi mìliyô mpindyewu mu mpèkaatù ne bundù, munkacì mwà kufwà.” Bàvwa batèèleje mwadi wà dibungama ne wà kànjabàla awu. Nènku tudi tubàlòmba ne: lwijàkàjaayi, bânà bèètù, lwijàkàjaayi bwà kubàsùngila! Nwamònu’s, andàmùnaayi ne lùkàsà lwònsò ne: “Mukalenge, ki mèmè ewu.” Ke mùshindù ùdìbo bàndamuna nànkù, mu dindà emu.

³² Nènku ànu bu twètù, bu bânà bàà èkèleeziyà ewu, ne kasumbù aka, tudi twanyisha eci, ku dibàtentekela byanza byètù ne dibèèla mwoyi wà buunyànà ne bwobùmwe, bwà kwikala bantèmù bàà Yesù Kilistò, ne ditwà dyètù dyà nyama ku mikolo kaaba aka, bwà twètù kubàtwa nyama ku mikòlò mu kantu ne kantu kònsò kàà kuneemekiibwa ne kajaalàne, mu Èvànjeeliyò. Masambila ètù neikalè dìbà dyònsò ànu bwà bantu aba, bwà Nzambì wàkwàtakù naabò mudimu bwà kuMupà luumù. Nènku bwà midimu yàbò yà bwambi yikalèku mibanjike ne minène mu

New York amu. Bwà nsòmbelu wabò—wabò ikalè mûle tètè ne mudimu bwèndè Yèyè, bàbwejè bimpampa byà musinga mukolè mu Bukalenge. Bwà bìikalèku ne mwoyi ntàntà mule, ne nsòmbelu yà disànkà. Mukalenge Nzambi àbàswikèku mukàbà wà Bwikadi Bwèndè bwà kashidi, ne àbàpèèshèku bukolè bwà mubidi ne dikàndà, ne àbàlamè mu mudimu Wèndè too ne pààbàbìikilà Yesù Kilistò ku Cisòmbedi cyàbò cyà Cyendèlèèlè mu Dyulu dyà diikisha.

³³ Disangisha edi mpindyewu. . . patùdi twinyika mitù yètù apa, ne twètù bambi tuyè kumpàla bwà kubàtentekela byanza.

³⁴ Taatù wetù wa mu Dyulu, nyèwù tutentekela Mwanèètù wa balùme Hùnt byanza, mu Dìna dyà Mukalenge Yesù Kilistò, bu mùdi bitùdi bamanyè bwà bwalu bwèndè, Mukalenge, bivwa byakàne. Ne tudi tuKwela twasàkidila bwà dibìikila edi mu nsòmbelu wèndè, dyà mudimu wà bwambi ewu. Mukalenge, akwìlàku kùdi mwanèètù ewu, ùpetè misùukà, ùtwalè disùngidiibwa, Mukalenge, kùdi aba bàdi mu bupika, byònsò ne màsaamà ne—ne mu meeji, ne mu mubidi ne mu nyumà. Mukalenge, mupèèshèku mudimu wà bwambi mulelèlè, bwà wàmòna, ku ndekeelu kwà njila wèndè, mwà kutàngila panshi mu kajila kale ne kumòna ne mmufùdishe, ku ngàsà wa Nzambi, bwà kukwàta mulwishi yònsò. Ku Yesù Kilistò Mukalenge wetù, nkutùdi tulòmbela nùku. Amen.

³⁵ Pambidi pàà Mwanèètù Coleman tudi kàbìdi tutenteka byanza byètù, bu bantèmu, Mukalenge, bwà kwanyisha dibìikila dyèndè, ne twètù, èkèleeziyà ewu, kasùmbù kàà bantu aka, tumwitabuuja bu musadidi wa Kilistò. Tudi tulòmba bwà ùmubènèshè ne ùmupèèshè mudimu wà bwambi munène, ne wà bukole, bwà wàkupetela Wèwè misùukà, Mukalenge, ne kusùngila bàvwà mu bupika abu, ne—ne kucibula makolè à Sàtaanà, mu nyùngulukilu wa nsombelu yà bantu bàdiye ùdisanga naabò. Mupèèshèku, Mukalenge, nsòmbelu wa dilubuluka, bukolè bwà mubidi ne dikàndà tumatuma. Nènku, kàbìdi, pààfikàye kundekeelu kwà njila, Nzambi, enzàku ne àmonè mwà kutàngila mu bule bwà kajila ne kumòna kùdiye, ku ngàsà wa Yesù Kilistò, mukùmbàne bwà kukòsa lukànù lwònsò lwà mwena lukunà, bwà bunème bwà Nzambi.

³⁶ Taatù wa mu Dyulu, swàkù bwà bantu aba mpindyewu bìikalèku ne mwoyi matùkù àbùngì ne bàkwatè mudimu mu dìnowa dyà Nzambi. Swàkù bwà mabènesha Èbè ikalè pambidi pààbò ne ikalè naabò too ne ku cikondo citùdi tudisangisha bònsò ku makàsà à Mukalenge wetù munène. Mu Dìna dyà Yesù Kilistò mmutùdi tulòmba nùku. Amen.

³⁷ Nzambi àkubènèshè, Mwanèètù Hunt, àkupèèshè mudimu wà bwambi ùdi ùtanta. Nzambi àkubènèshè, mwanèètù wa balùme, ne àkupèèshèku kàbìdi mudimu wà—wà bwambi wà ùtanta. Nzambi àkubènèshè. Cyàkàbìdi:

Dikàlà dyà Kapyà pàakalengàdi mupròfetà,
 Dìmuwija mukezùke ànu ne mwèndè
 mwònsò,
 Pàakambà Dìyì dyà Nzambì ne: “Wàya kaaba
 kèètù nganyi?”
 Dìbà àdi yéyè kwandamuna ne: “Mmémè ewu,
 ntùmaaku.”

Kaa, akùlà, ekèlekèlè... (Àkulèku Yéyè ne
 myoyi yà mitekète yàbùngì)... akùlà,
 Mukalenge wanyì, (Mubiikidiibwe kùdi
 Nzambi!)

...ne nêngìikalè ne lùkàsà bwà
 kuKwandamuna;
 Akùlà, Mukalenge wanyì, akùlà, Mukalenge
 wanyì,
 Akùlà, ne mémè nêngàdamunè ne:
 “Mukalenge, ntùmaaku.”

³⁸ Mùshindù mwinè wutùdi tusàkidila Mukalenge mu dindà
 emu bwà bunème bunène ebu, bwà èkèleeziyà ùjaadika ditùmà
 dyà bambi mu budimi mu ditùkù dyà ndekeelu edi. Ngàsà wa
 Nzambi àye neenù, nwènù bânà bèètù! Ndi ntèkemena ne Yéyè
 ngudi unùtuma ku madimi à bwambi à ku baabèndè ne pa
 buloba bujimà, nwenda nuyiisha mabanji àdi kaàyi kondola
 kumana à Yesù Kilistò, mùdi bakèngeledi bààbùngì. Buloba
 leelù ewu, bùdi búsanganyiibwa mu lukèngelu lwàbùngì.

³⁹ Mpindyewu, bintu bìmpè bùngì cyanààna ebi, bìdi bikèngela
 ànu bwà twètù kwangata ndambù *apa* ne ndambù *pààpa*, bwà
 kubìbweja byònsò mu disangisha mu dindà emu. Mpindyewu
 leelù ewu tudi. . . Ndi ngàakula pa cyena-bwalu cìndi. . . Mémè
 ncìtu muswè kuseemena pèpì ne bikondo bìdi bikwàcisha bwòwà
 menemene ebi to.

⁴⁰ Mpindyewu, mu dyàlumingu dishààle edi, bu bàmwè bàà
 kunùdì kabàyi kaaba aka ne—ne kabàyi bapetè Mukenji wà
Cimwangì Cìsàtù to; ne nwènù baswè mikàbà yà mèyi, ndi
 ngèèla meeji ne nenùsànkidilè wòwò awu, *Cimwangì Cìsàtù*.

⁴¹ Citùdi naacì ncinyì, mwànà wa balùme ùsaama kaaba
 aka, anyì cintu kampànda? Kaa, mwànà mukesè wa balùme,
 mucibùkile panshì. Èyowà’s. Nzambi àmubènèshèku. Ki cyòcì
 aci. Èyo. Ànu ku ndekeelu kwà disangisha, tudi tuya kasambidila
 babèedi, nànsha bìshi, nudi numòna’s. Pa nàнку twètù,
 mpindyewu, tudi. . .

⁴² Tudi tunùlòmba, pàmwàpa bu nwènù mwà kucyènza, bwà
 kupeta Mukenji, pa *Cimwangì Cìsàtù*, musangu mwisàtù
 ùdi Bukènkè, Mwanjèlò wa Mukalenge udi mubiikilè bantu
 ku cimwangì, mmuDìleejè patòòke pa buloba, mu cimwangì.
 Nwamònu anyì? Ngèèla meeji ne aci ncyà pabwàcì menemene,
 bwànyì mémè: cimwangì cìsàtù!

43 Bidikù bifwànyine kunùtácisha bu mémè mwà kuvùùla cinkooci cyànyì anyi? [Disangisha didi dyamba ne: “To.”—Muf.] Kùdi luuyà lukolè menemene mu tabernacle mu dindà emu, ne cifidi cyà citaleela cimwèpelè citùdi naaci—ncyà pawùdi mwà kudyèla kapeepà ne dikàpàkapà. Nudi ne cyàkudikàngwila nzembu yènu yà sungasunga. Nàнку tudi munkaci mwà kulongolola bwalu abu, dīngà ditùkù, bwà kwela bifidi byà citaleela mwaba ewu, patùdi ànu tukùmbaja bintu.

44 Mpindyewu, netwikale mwà kwanyisha, bu nwènu—bu nwènu mwà kuswà bwà—bwà kutèeleja Mukenji wà, *Cimwangi Ciusàtù*. Mpindyewu, tuvwa bapetè bimwangi byàbùngi, kàdi ndekeelu wa byònsò tudi mwà kuteeka cyanza cyètù pa mwaba, ne cikondo, wà bimwangi bisàtù bìdi Nzambì, mu mmwènekelu wa Dikunji dyà Kapyà, mutùùlùke bwà kubiikila ne kutàpulula bantu. Nèнку mpindyewu cidi citàpulula cisàmba.

45 Ne tudi tusangana ne, pàakabiikilàYe cimwangi Cyèndè cyà kumpàla, Yèyè wàkaya kumpàla kwàbò mu Dikunji dyà Kapyà, ne kubàlombola ku . . . kubàlombola ku buloba kwàkalwàYe pashiishe kubàmwènekela kumpàla kwàbò, mu mmwènekelu wa Muntu wàkabiikidiibwa ne n'Yesù Kilistò. Yèyè wàkafùmina kùdi Nzambì, ne wàkaya kùdi Nzambì. Ne kùdi . . . pashiishe Yèyè wàkabèngiibwa. Nèнку wàkalwa pashiishe kubiikila bantu bwà kupàtukabò mu—mu ngiikàdilù wa kwisùkwisù uvwabò babwelèmu, bu mùvwàbo nendè mu Èjiiipitù mwàmwa, ne badifile ku mpèkaatù ne ku—ne ngenzèlù yà beena Èjiiipitù. Ki Nzambì kubàbiikila bwà kupàtukabò.

46 Nèнку mpindyewu tudi tusangana ne, musangu mwibìdi, bàvwa badifile mu bupika bwà Bukalenge bwà—bwà beena Loomò. Nèнку bàkapàtuka kubwela mu twitabàayi ne kuyabò kule ne dikuukwila dilelèlè dyà meeji matòoke, ke Nzambì kutùma cyàkàbìdi cimwangi cikwàbò. Nèнку . . . Yèyè wàkamwèneka mu mmwènekelu wa Muntu wàkalombola bantu awu.

47 Mu cimwangi cyà kumpàla, Yèyè ùvwa Dikunji dyà Kapyà. Pashiishe, pàakalwàYe pa buloba, mu buloba mwàkabalombolàYe amu. Ncimfwànyì cilengapù kaayi ciikalàci mu Bukalenge bwà bidimu cinunu, mudiYe munkaci mwà kulombola Èkèleeziyà mpindyewu emu's! “NetùMumònè mùdiYe amu, ne netwikalè ne mubidi mufwànàngàne ne mubidi Wèndè Sungasunga wà butùmbi awu.”

48 Nèнку leelù ewu, ku Bukènkè bwà Èvànjeeliyò bùdi buleejila buumukila ku Bukènkè, Dikunji dyà Kapyà dimwèka ne mèsù munkaci mwètù! Maalu à mamanya mmaDimòne. Didi mu bikàndàkàndà, ne pa buloba bujimà. Nèнку Didi, dimanyike ku maalu à mamanya ne ku maalu à nyumà, dimanya bu Dikunji dyà Kapyà, ku bimanyinu bimwèbimwè abi ne bintu bimwèbimwè byàkenzàDi misangu yònsò abi. Nèнку mpindyewu munkaci

mwà matùkù pàdiku dikolesha dyà maalu bungi cyanààna ne bikwàbò, nànsha nànkù, Nzambi ùdi misangu yònsò ànu ùDimanyisha. Mpindyewu ke citùdi tusangana.

⁴⁹ Kàdi ncintu kaayi cyà butùmbi bwà kumanya ne: “Tabernacle wa pa buloba ewu, dingingà ditùkù,” mubidi wà kale wà lùyòwayòwa ewu mutùdi tusaama ne tubungamamù emu, “neàshintuludiibwè ne kuvwijiibwa mufwànàngàne ne mubidi Wèndè Sungasunga wà butùmbi awu; dibà adi netùMumònè mùdiYe,” ne netwikalè Nèndè mu Buloba butùdi mu njila batàngilakù leelù ewu ebu. Kaa, ndi mufwànyine... bìdi bitwèna ànu bu bàdi mwà kwimanyina kuulu ne kwimba ne *Ndi Mu Njila Mutàngila Ku Buloba Bulaya*. Pàmwàpa nebiikalè munkaci mwà kwimba nànkù ku mudimu wà dibàtiiza, kwine, bwalu s’ke musambu wètù wà ku dibàtiiza ngwòwò awu.

⁵⁰ Mpindyewu kùdi bânà bèètù, bònsò bàdi apa ne bàdi mu malaba ikalà mikàbà yà mèyi mwà kuya, nènku mwòmù amu mmu nyungulwilu wa buloba. Mikenji eyi kî mmiludikila muntu nkààyà kampànda to. Ne katwèna baswè bwà bantu kwelabò meeji ne tudi kasumbù kàà mùshindù kampànda to, anyi musumbà wà bakoleshi bàà maalu bàdi badisangishe pàmwè: “bwà kuditàpulula, byenze bu, kabàyi ne Diitabuuja to,” anyi bādītāpulula bābēngangana ne muntu kanā yōnsō, anyi—anyī bābēngangana ne Nzambi, anyi bābēngangana ne Èkēleeziyā to. Tudi bwā Èkēleeziyā. Kādi tudi ànu tuteeta bwā kuleeja, ku Nyumā Mwimpè ne dikwācisha Dyèndè, kabingila kàà disungulujangana ditùdi naadi leelù ewu edi. Twètù, katwèna tudītābuuja to.

⁵¹ Tudi twitabuuja ne èkēleeziyā yōnsō yivwa ne cyā kwikala yèza bwòbùmwè pàmwè, kayiyi yisungulujangana to; ba-Méthodistes mu kasumbù kààbò, ne ba-Baptistes ku kààbò, ne ba-Unitaires, ne ba-Trinitaires, ne citùdi naaci, batāpūlūke bōnsō. Tudi twitabuuja ne bivwa bikēngela kwikalaci pàmwè, bu kasumbù kanène kāmwepelè kadisange kàà Mubidi wà Yesù Kilstò, biindile Dilwa dyà butùmbi adi. Kabivwa bikēngela kwikalabò batāpūlūke to, nànsha kakesè.

⁵² Nènku cidì cicitāpulula, kùdi ne cyā kwikala kabingilā kashindāme kàdi kēna ne katwèna pàmwè to. Mu dikālonga, ngāmanyi, mu dikālonga, ne kī mmeekala à dikòbā dyètù to; bwalu, bàà kalaabi, bafiike, bafiikūlūke, ne batòòke, bōnsō mbatāpūlūke mu malongolodi mashiilēshiilāngāne. Kī mmùshindù wà cyākudyā citùdi tudyā to; twètù bōnsō tudyādyā byākudyā byā mwomūmwè. Tudi tuvwalā bilāmbā byā mùshindù ùmwèumwè, ne bikwàbò. Kādi ndi mmōna ku nshindameenu mwaba ùdi bwalu, muntu ngudi mupātūke mu lūpōndā lutùuta lwā dilongesha dyā Èvānjeeliyò, muntu ne muntu.

⁵³ Nènku kùdi ne cyā kwikala mùshindù kampànda wà kuleeja

patooka cidi cilelèlà ne cyà mashimi. Ne mùshindù ùmwèpelè uwàcyènzàku, kí nkusàkidila dyumvwija kampànda ku Dìyì to, kuDìbala ànu mùshindù ùdìDi awu ne kuDìtabuuja mùshindù awu.

⁵⁴ Muntu yònsò ewu wèlamù dyèndè, dyumvwija dyà sungasunga, bìdi biDifikisha ku dyamba cintu kampànda cishilàngàne, bìcyàluja ku bulongolodi bwà ku cibangidilu bwà èkèleeziyà wa Kàtòlikè abu. Pààbì, èkèleeziyà wa Kàtòlikè ùdi witabuuja ne Nzambì ùdi mu èkèleeziyà Wendè: “Ne Dìyì dyòdi kadyèna ne ne cyà dyanza nendè to; ne Nzambì ùdi mu èkèleeziyà Wendè.”

⁵⁵ Kàdi twètù beena Mishòònyì, mutùdi tusangana, ne mùdi Bwàkabalwibwà 17, ne bòbò bònsò bàkùngwile pàmwè, bwà ne èkèleeziyà wa Kàtòlikè ùvwa “maamù” wa malongolodi ònsò awu. Ne tudi tumòna ne bulongolodi bwà Mishòònyì, nànsha mu bufofo, mu bufofo, bùdi ne ngiikàdìlù ànu umweumwe wa èkèleeziyà wa Kàtòlikè awu. Bible ùdi ùbìikila èkèleeziyà wa Kàtòlikè ne “mukàjì wa masandi,” ne ùbìikila èkèleeziyà wa Mishòònyì ne “mbandumbà,” mmwambe ne mukàjì wa masandi awu ùvwa “mamwèndè wa bandumbà.” Nènku abu’s mbantu, mmukàjì wa luumù lubì udi kàyì ne nsòmbelu wa lulamatu ku micipù yèndè yà dibàkà nànsha.

⁵⁶ Kàdi bònsò bwètù tudi tulàka mukana twamba mutùdi Mukàjì-musèla wa Kilistò, kàdi katùyì ànu ne lulamatu to. Ncinyì cidi cifwànyine kulela dipanga dyà lulamatu edi? Ku diikala ne nsòmbelu mubèngàngàne ne—ne dikazamuna didi Nzambì mutèèke bwà Mukàjì’Endè musèla kwikadilayè ne mwoyi ku dyòdi. Ki wanyì mmwènenenu sungasunga nyèyè awu, Bible, ne Yèyè ùdi Dìyì dyà Nzambì didi kadìyì mwà kupangila to, múndi mèmè ngìtabuuja.

⁵⁷ Nènku, ki bwà cinyì, tudi tusangana ne èkèleeziyà wa Mishòònyì, bwà kupeta bulongolodi kampànda, ùdi ùditàpulula mene ne Mifundu, bwà kwenza bulongolodi bwèndè. Bambi, balongolola, nebàshaalè bakwàte ku bintu bidìbo . . .

⁵⁸ Mpindyewu, bàtu balwa ku birò byànyì ne mu bibambalu, nkàmà ne nkàmà, bàngambila ne: “Mwanèètù Branham, wèwè’s udi wela bantu tudyòmbò atu. Muntu nànsha umwe kààkutwàku makàsà panshi bwà kukàndameenakù Aci to. Mbamanyè ne m’Bulelèlà.”

Mòna’s, mèmè ndi ngàmba ne: “Bwà cinyì, bwà cinyì kwèna ucyènzà?”

⁵⁹ “Èè, nudi numòna’s, mèmè mudìdinge ànu mwenzè, nengìkale ngènda ndòmba byàkudyà. Kí mmuntu nànsha umwe. . .Ndi ne mudimu wà bwambi. Bìkèngela nkafikè kùdi Mukalenge, ne bìdi bìkèngela mfikè kùdi bantu. Nànku ncyà kwikala ne dikwàcisha nànsha dimwè to.”

60 Nudikù ànu numanya ne Kelistò ki dikwàcisha dyètù, Bible ke dikwàcisha dyètù anyi? Nwamònu anyi?

61 Kàdi, cidi, nwamònu's, díbà adi aci cidi cikùpa èkèleeziyà wa—wa Mishòonyi ànu cintu cimwècimwè menemene cidi èkèleeziyà wa Kàtòlikè aci.

62 Èkèleeziyà wa Kàtòlikè kèna ùcyùka . . . Èè, ncyèna ngàmbe ne . . . Ncyèna ncyùmisha mùshindù awu to, bwà kwamba ne kabèena bàcyùka cidi Bible wàmbe to. Bòbò—bòbò bàdi bìtabuuja Bible, kàdi, nwamònu's, bàdi ne . . . Dibikulangana dyà mu nkwasà dyà cìpostòlò's ke pàdi èkèleeziyà wa Kàtòlikè mùshindàmèène. Aci's ndibikulangana dyà baapaapà, ne kubìkila Peetèlò ne ke paapà wa kumpàla, byènda bilondangana ànu nànkù. Mpindyewu, bòbò, bàdi bìtabuuja nànkù. Bòbò, bàdi bìtabuuja bàtuuta ntèndù ànu nànkù.

63 Ne beena Mishòonyi, nwamònu's, bàdi—bàdi bàdisanga pàmwè ne bèna bulongolodi ànu menemene mwàkenzàbo ku Nicée amu, Loomò, mwaba wàkavwijabo èkèleeziyà wa—wa Kàtòlikè bulongolodi kùdi . . . ku Nsangilu wa ku Nicée. Nènku tudi tusangana ne bàdi bònso mùmwè. Bùbidì bwàbò bàdi mùmwè. Bàdi bàlekela Díyi dyà Nzambì, bwà kwenza bulongolodi. Nwamònu anyi? Ne pashìshe pàkaadibi bikafika ku Malelèla manène àbùngi àdi àmwèka àkèmesha leelù ewu, Cidi cyenyi kùdìbo, bwalu mbalóngèshìibwe ànu kùdi mùshìngà kampànda.

64 Katwèna ne mùshìngà nànsha wùmwè to ànu Bible. Katwèna ne cintu nànsha cimwè to ànu Díyi dyà Cijila dyà Nzambì, ne pa Dyòdi adi's ke patùdi biimànyìne.

65 Nènku mpindyewu, leelù ewu, ndi muswè kubala ndambù wa Mifùndu, katanci kakesè cyanààna, mu Díyi dyà Nzambì dyà cijila, dinsantu, didi dìsanganyìbwa mu Mukàndà wà Luukà Munsantu. Nshapità wa 23 wa Luukà Munsantu, bwa kushìndamijilapù, kupeta ci—cibùmbà cyà kwimanyina bwà bìndì—bìndì muswè kwamba, meeji à nshìndameenu à cintu cìndi muswè kwakulapù. Nènku nudi nubuulula mpindyewu mu Luukà Munsantu, nshapità wa 23, nènku ndi muswè kubala mvensà umwèpelè. Ki cyònsò cìndi njinga bu nshìndameenu wa dìndà edi, bwà kucitentekapù. Mpindyewu tudi tubala wa 20 . . . nshapità wa 23, mvensà wa 33 wa nshapità wa 23.

Nènku díbà dyàkafikàbo . . . pa mwaba, ùdi ùbìkidiibwa ne Kàlvariyò, mwaba awu kumupoopelabò pa nkùrusè, ne benzàvi, umwe ku dyàbalùmè ne mukwàbò ku dyàbakàjì.

66 Mpindyewu ndi muswè kupàtulamù myàkù yìnaayi, mu dibala adi amu, bwà kushìndamijilapù cìndi muswè kwamba aci, “kuMupoopelabo pa nkùrusè mwab'awu,” myàkù yìnaayi. Nènku mpindyewu cyena—bwalu cyànyì cidi cibìkidiibwa ne . . . Ndi—ndi ntwàla difùndà dyà ku cilumbù kùdi èkèleeziyà

yà cyena-màngumba yà ditùkù edi, ne kàbìdì yàbúngì yà midiiikàdìle ayi, bwà kupoopela kwà Yesù Kilistò cyàkàbìdì mu ditùkù edi. Ndi munkaci mwà kubàfùnda! Mu dindà emu, cidi cìbiiikidiibwa ne: *Difùndà dyà ku Cilumbù.*

⁶⁷ Nènku ndi muswè kwenza bu utàmba kucyàngata ànu bu ne cìvwa cibambalu cyà tubàdì, mwaba ùvwa. . . Ne byòbì biine, cyambilu ne èkèleeziyà s'ntubàdì. Bible mmwambè ne: "N'nkwaswa wa cilumbulwidi, bwà ne—bwà ne cidi ne cyà kubangila ku nzùbu wa Mukalenge." Ne eci cidi bu mùdì—mùdì nkwaswa wa butùmbi ne—ne kasùmbù kàà banzujì, ne bantèmù, ne bikwàbò. Nènku cìndi naaci, leelù ewu, bwà bujaadiki bwànyì, n'Diyì dyà Nzambì.

⁶⁸ Nènku cilumbù cyànyì ndi mfùnda maèkèleeziyà à leelù ewu. Mpindyewu ncyèna—ncyèna mbwejamu ngènzàmpèkààtù to. Eci ndi ngambila ànu èkèleeziyà. Nènku bidi—bidi ne cyà kwikala mu—mu—mikàbà yà mèyì mpindyewu, nènku nê—nènteetè bwà kujikija ne lukàsà ne mwànyì mwònsò. Ndi mfùnda lukòngò elu bwà dipoopela dyà Yesù Kilistò cyàkàbìdì pa nkùrusè.

⁶⁹ Nènku mpindyewu bwà kwenza cyòcì eci mu cikondo citùdì ne mwoyi eci, ndi—ndi ngènta nùnkù, ndi ne cyà kuleeja cileeji. Byòbì bikèngela bwà mèmè kufùnda cilumbù, udi ne cyà kuleeja cijaadiki cyà cilèma cyà dishipa dyà mikenji cidi cyenjiibwe. Mèmè—mèmè ndi ne, bwà kubàtèèka ku cilumbù, bidi bikèngela bwà mèmè—mèmè kutwàla ci—cileeji bwà kucijaadika, bwà ne cidi, ne bìndì munkaci mwà kwamba ebi nebiiikalè ne bujitu kumpàla kwà Nzuji mukùlumpè. Bwalu, ndi ndyàngata mèmè mwine bu mwakwidi wa . . . mu difùndà dyà ku cilumbù edi. Bwà ne, Diyì dyà Nzambì, diikàle ntèmù wanyì, ndi mfùnda lukòngò elu bwà dipoopela dyà pa nkùrusè.

⁷⁰ Ndi ne cyà kuleeja, ne nendeejè, ne nyumà umwèumwè wakatwàla dipoopela dyà pa nkùrusè dyà kumpàla awu ùdi pa bantu leelù ewu, ne munkaci mwà kwenza cintu cimwècimwè aci. Ndi—ndi ne cyà kwenza nànkù, byòbì ne cyà kwikala dipoopela dyà pa nkùrusè, dyà ne mbapoopèla pa nkùrusè. Ndi ne cyà kuleeja ba—bantu ne lwidi lùmwlùmfwè alu mu bantu leelù ewu lùdì munkaci mwà kwenza cintu cimwècimwè aci, mu nyumà, cyàkenzàbo mu mubidi dìbà adi aci. Bàakapoopela pa nkùrusè, mu mubidi ewu, Yesù Kilistò, Mwànà wa Nzambì awu. Nènku mpindyewu, leelù ewu, ku Diyì òmwèdimwè adi, ne ku—ku Nyumà Mwimpè umweumwe awu ne Diyì òmwèdimwè adi, ndi—ndi njinga kuleeja Maèkèleeziyà kuntwaku—kuntwaku mwaba ùdìbo biimànyìne, bwà ne bàdì munkaci mwà kwenza cintu cimwècimwè aci leelù ewu, ne Bible mmwambè ne nebàcyènzè, ne kujaadika ne edi nditùkù ditùdì ne mwoyi.

⁷¹ Kacivwa mwà kwikala cyenjiibwe bidimu bikesè bishààle ebi to. Ndi ngàmba ne, bidimu makùmi àtaanu bishààle ebi kabivwa mwà kwikala byenjiibwe to, kàdì leelù ewu ki cikondo

cyàbì menemene. Kàdi kacivwa cifwànyine kwikala cyenzèke to, pàmwápa, kukaadi bidimu dikumi, kàdi cidi mwà kwenjiibwa leelù ewu bwalu ci—cikondo ncyèci cyámanyi kujika. Tudi—tudi ku cikondo cya nshìikidilu. Nènku ndi ngiitabuuja, bu musadidi Wendè, ne tudi—tudi pabwípì ne kusambuka ebu buloba bwà kuya mu Bukwàbò.

⁷² Ki bwà cinyi, cikondo cyà kanyinganyinga, bwà ditunga, cyámanyi kuya. Ndi ngiitabuuja ne ditunga edi kadyèna mwà kunyingalala to. Ndi ngèèla meeji ne ndisambùke mulongo ùdi pankaci pàà luse ne cilumbulwidi. Ndi ngèèla meeji ne ùdi ùtòndoka mu cipiminu.

⁷³ “Mwanèètù Branham, kumpàla kwà wèwè kubanga bwalu bwèbè, neùjaadikè ciinè aci bìshi?”

⁷⁴ Ànu eci, cyà ne tudi bapiile bwà mpèkaatù yimwèyimwè yàkabùtulà naayi Nzambi buloba ayi, mu cikondo cyà kumpàla kwà mvùlà yà Noà. Tudi bapiile bwà mpèkaatù yimwèyimwè yàkabùtulàYe naayi buloba mu Sodoma ne Gomolà ayi. Nènku, mpindyewu, nènku tudi bònsò ne cileeeji cimwècimwè cyà nyumà citèeka kumpàla kwètù eku, cileeeji cyònsò cyà nyumà cimwècimwè aci, cimanyike buloba bujimà, cyàkatwàlà luse lwà Nzambi pa nkòngo ayi. Kàbidi, ne, bwà kubanga, cyàkatwàla cilumbulwidi. Pa nàнку piikalàbi ne lukòngò elu lwàkabènga luse lùmwèlùmwè lwàkadyombodiibwà mu matùkù awu, Nzambi mmufwànyine kwikala kàyi mujaalàme bwà kubàlekela bàpita kakùyì cilumbulwidi.

⁷⁵ Bu mùdi Jack Moore, mulunda wanyi, wákamba musangu kampànda ne: “Piikalà ditunga edi dyòdi kadìyi dipicile ku dinyooka dyà kùdi Nzambi, díbà adi Nzambi’s mmufwànyine kwikala mwenzèjìibwe bwà kujuula Sodoma ne Gomolà bwà kubàlòmba luse bwà dibòdsha butubutu.”

⁷⁶ Mpindyewu, tudi bamanyè ne mu nyumà bàdi munkaci mwà kwenza cintu cimwècimwè aci leelù ewu, bwalu bòbò pààbò, bàdi munkaci mwà kuçyènta, mu kiipàcilà kàmwèkàmwè aku, ne mu mùshindù wùmwèwùmwè wàkenzàbo mu dipoopela dyà pa nkùrusè dyà Mukalenge, mu mubidi emu. Bàdi bàcyènta bwà mukàwu, bwà bufofo bwà nyumà. Bwà ne, kí mbaswè kumòna to. KabààkuCitàèlejakù to.

⁷⁷ Yesù, mu lwendu Lwèndè lwà pa buloba apa, Yèyè wákamba ne: “Yeshàayi wákambilamù bimpè bwà bwalu bwènù ne: ‘Nudi ne mèsù kàdi kanùyì mwà kumòna to, ne macì kàdi kanùyì mwà kuumvwa to.’” Nwamònu anyi?

⁷⁸ Kabingilà kàmwèkàmwè aku, kiipàcilà kàmwèkàmwè—kàmwèkàmwè aku ne dilukakaja dyà ngenyi dimwèdimwè adi, bàdi bàtwàla cyàkàbidi dipoopela dyà pa nkùrusè dyà Kilistò, cyàkàbidi, (mutwàfikakù paanyimà pàà katanci), bwà tubingilà tùmwètùmwè twàkenzelàbo cikondo aci.

⁷⁹ Kabèènakù mwà kupeta cintu nànsha cimwè cyà cibèngangana naaCì to. Kabèèna mwà kudidinga kuteeta kuCyèla kadyòmbò to. Ne bôbò mbamanyè ne cileeeji cidikù. Ne mbamanyè ne Bible ngudi mwambè nàнку. Nènku cintu cimwèpelè cidibo mwà kwenza cidi ànu kuCìpenda. Aci's mmwòmò menemene. Pa nàнку, ne byònsò ebi, dilukakaja dyà ngènyi òmwèdimwè adi.

⁸⁰ Nènku mpindyewu, pa cishimikidi eci, ndi ngèèla lukòngò elu kadyòmbò bwà dipoopela dyà Yesù Kilistò pa nkùrusè; bwà dipoopela dyà ku nkùrusè, ne dipiila; ne byanza byà manyaanù, bibi, byà budisu, byà cyena-màngumba lùdi munkaci mwà kupoopela Mfùmù wa Mwoyi uvwa muswè kudileeja Yèyè mwine kùdi bantu awu.

Wèwè udi wamba ne: “Muntu umweumwe awu?”

⁸¹ “Ku cibangidilu kwàkadi Dìyì, ne Dìyì dyàkadi Nzambi. Ne Dìyì dyàkandamuka mubidi, ne kuDìmwèneshadi.” Dìyì dyàkamwèneshiibwa mu mubidi, ne bàakapiisha mubidi ne kuwùshebeya, bwalu Dìyì dyàkamwèneshiibwa. Ebèlù 13.8, mmwambè ne: “Yesù Kilistò ùdi umweumwe awu makèèlèlè, leelù, too ne kashidi.” N'Dìyì òmwèdimwè adi. Nwamònu anyi? Nènku, bwà kabingilà kàmwèkàmwè aku, bàdi bàteeta bwà kupoopela Dìyì pa nkùrusè.

⁸² Mpindyewu, bwà cyena-bwalu cyànyi, bwà kwalukila pa cyena-bwalu cìndi muswè kwangata eci. “Mwab'awu,” myàkù yinaayi ayi, twànjiibi kuumvwija, “mwab'awu.” “Mwab'awu,” cimenga cidi citàmbe cijila pa buloba, Yèlusàlèma. “Mwab'awu,” cimenga cyà citàmbe kwikala cyà butèndeledi pa buloba. Mwab'awu, “bôbò,” bantu batàmbe kwikala batèndeledi bàà buloba bujimà, ku difestò dyà butèndeledi, difestò dyà Paasàkà. “Mwab'awu,” kaaba katàmbe kwikala kàà butèndeledi, cimenga citàmbe kwikala cyà butèndeledi, bwà—bwà butàmbe bunène bwà ku malongolodi wònsò, mutù wàwò wòwò wònsò awu. Mwab'awu, “bôbò,” bantu batàmbe kwikala batèndeledi mu buloba bujimà, bàvwa badisangishe bùumukila pa buloba bujimà. Bôbò “kupoopela pa nkùrusè,” lufù lwà bundù butàmbe lùvwà mwà kwikalakù, kushipa, lùvwà muntu mwà kushipiibwa; butakà, kuMuvùùlabò bilàmbà. “Yèyè—Yèyè wàkadyombola bundù.” Bôbò. . . Nkùrusè ùdi ne—ne—ne mukùsu muMujìngila; kàdi bàvwa baMuvùùle bilàmbà. Cintu cyà bundù butàmbe bunène!

⁸³ “Mwab'awu,” cimenga citàmbe bunène cyà butèndeledi, “bôbò,” batèndeledi bàà dipòkò, “kupoopela pa nkùrusè,” lufù lwà bundù butàmbe, “Yèyè,” Muntu wa mushinga mukolè awu. Aci ni kí ncikumbàne bwà kupiisha lukòngò elu!

⁸⁴ “Mwab'awu,” bulongolodi butàmbe butèndeledi, mitàmbe bunène yà ku èkèleeziyà yònsò midìsangishe mu mwaba wùmwè. “Bôbò,” bantu batàmbe butèndeledi bàà mu bisà byònsò, bantu

bàdì ne cyà kwikala bakuukwidi mene bàà Nzambì abu's. Bààkadìsangisha ku difestò ditàmbe bunène dyà cijila òvwàbo naadi, dikezudiibwa dyà . . . Paasàkà, pààkapàtudiibwàbo mu bupika kubwela mu budishikaminyi. Ne “mwab'awu” mu ciinè cikondo aci, “bòbò” pa diinè dîbà adi, bantu batàmbe kwikala batèndeledi, mu difestò dyà ditàmbe kwikala dyà butèndeledi, mu mwaba wà mutàmbe kwikala wà butèndeledi, kutwàlabò pa Mfùmù wa Mwoyi cintu cyà citàmbe bundù cìvwà cìfwànyine kwenjiibwa, bwà kuvùùla Muntu bilàmbà ne kuMulebeleja ku mucì. Bwalu, “Mwediibwe mulawu ng'ewu udi,” mwàkambà mikenji yìvwàbo bàkuukwidilakù ayì, “mwediibwe mulawu ng'ewu udi mulebeleja ku mucì.” “Ne Yèyè wàkawijiibwa mulawu bwètù twètù.” KuMuvùùla bilàmbà Byèndè, kuMutuuta, ne kuMuseka, Nzambì mwinè wa mu Dyulu awu; kuMuumusha bilàmbà Byèndè, ne kuMupoopela ne misonso pa nkùrusè. Yèyè! “Mwab'awu bòbò kuMupoopela pa nkùrusè,” ku dinyooka dyà lufù dyà cyena Loomò.

⁸⁵ Lufù lwà lutàmbe kwikala lwà bundù leelù ewu kî ndufwànyine kwikala lwà kwashiibwa ku cingoma nànsha. Lufù lwà bundù butàmbe leelù ewu kî ndwà kwikala mubàndiibwe pambidi kùdì kàshinyi ne mushipiibwe to, mufwè mu màyi, mwoshiibwe kùdì kapyà to. Kàdì lufù lwà bundù butàmbe leelù ewu ndinyooka dyà lufù lwà munkaci mwà bantu, mùdì buloba bujimà bùkupiisha ne bùkubiikila ne mmupiile.

⁸⁶ Kàdì buloba bujimà bwàkatenteka byanza byàbò pa Muntu ewu ne bwàkaMubiikila ne mmupiile, Pende kàyì mwenze bwalu to. Ne Yèyè wàkafwà ku beena lukunà, (kaciyi balundà Bèndè to, kaciyi mikenji Yèndè to), kàdì mu dipoopediibwa dyà pa nkùrusè kùdì mwena lukunà. Mfùmù wa Mwoyi, Muntu mutàmbe kwikala wa musinga mukolè uvwakù kacya ne mwoyi, anyi wìkalakù ne mwoyi, Yesù Kilstò. “Yèyè,” Muntu mutàmbe kwikala wa musinga mukolè awu! Lamàayi aci mu meeji mpindyewu patùdì twibaka cishimikidi aci leelù ewu apa.

⁸⁷ Nudiku bafwànyine kudìfwànyikijila, mu mwaba bu Yelusàlèrà, mùdì munda mwà bidimu binunu bibìdì ne nkàmà yìtaanu, anyi bipite apu, mùdì bantu. . . anyi nkàmà yà bidimu. Ndi mwà kwikala mupicishakù ntàntà ndambù mu cyòci aci. Cìvwà cìfwànyine kwikala citwè ku bidimu nkàmà mwandamukùlù anyi nkàmà citèèmà, anyi cintu kampànda. Ncyènà ànu mumanyè ne, nntàntà kaayi to, kuumukila ku cikondo cyàkiibakà Solòmò ntempèlù aci. Ndi ndifwanyikijila ne, bidimu bitwè ku nkàmà mwandamukùlù, cintu bu nàнку awu.

⁸⁸ Ne bàvwa bindile Maasiyà kampànda uvwa ne cyà kulwa. Bàvwa basangile kuntwaku bwà dikuukwila dyà Paasàkà. Anji elàngànaayi ànu meeji pa bwalu abu mpindyewu's! Mutù wa Bàfaalèsà bònsò, Basadokà, ne bònsò bàvwàku abu, didisanga dinène òmwèpelè, bwà kukuukwila Nzambì. Mwaba mutàmbe

cijila, Yelusàlèrà, ntempèlù wa Mukalenge, ne bantu bàà Mukalenge, bààkangata Mukalenge Yèyè mwinè e kuMupoopela pa nkùrusè, ne dinyooka dyà lufù. Cintu bu nànkù's!

⁸⁹ Mpindyewu myàkù yinaayi ayi, bôbò ne: “Ki mwab’awu kuMupoopelabò pa nkùrusè.” Mpindyewu, wèwè ucidi ànu uleeja Bible, nudi numòna’s. Cidi ànu mmyàkù yinaayi cyanààna, kàdi Bible ùdi ùbumba Bulelèlà Bwèndè.

⁹⁰ Mpindyewu, mèmè, bikèngela nye kule, ngùumvwijèku cìndi ngàmba aci, kàdi Bible kèna ne cyà kuumvwija kantu nànsha kàmwè to. Cyònsò cidi ànu Bulelèlà, pa nànkù—bwà—bwà Bible kabyèna bikèngela bwà kuumvwijayè cintu nànsha cìmwè to. Kabyèna—kabyèna bikèngela bwà kucyùmvwija to, bwalu Cidi cyònsò Bulelèlà.

⁹¹ Myàkù yinaayi yà mùyòòlolo Wèndè munène wa Bulelèlà nyòyi eyi. Nenteetè bwà kuCyùmvwija. Nènku bwà kuteeta bwà kuCyùmvwija, bitòoke too, mbifwànyine kwenza nzùbu kampànda wa dilamina mikànda. Kakwènakù mùshindù wà mèmè kuumvwija myàkù yinaayi ayi to. Kàdi mpindyewu tuyaayaaku, ku dikwàcisha dyà Ewu Wàkenza bwà kufùndiibwaWù awu, kuteeta kuumvwija myàkù yinaayi eyi, bwà kuyitwàla mu mùshindù wà bantu bafwànyine kucyùmvwija.

⁹² Citùdi naaci kumpàlà kwètù eku mpindyewu, tudi ne dipoopediibwa dyà pa nkùrusè dyà kumpàlà ditèeka kumpàlà kwètù; ku *mwaba* mutàmbe cijila, *bantu* bàà batàmbe kwikala batèndeledi, *lufù* lwà bundù butàmbe, kùdi *Muntu* wa mushinga mukolè mutàmbe awu. Kaa, bìdi bibèngangana be. Ekèlekèle, kaa, ekèlekèle, mbyà bundù be!

⁹³ Mpindyewu twànjàayi kwangata, dyàmbedi, mwàkù wa kumpàla, “mwab’awu.” Twànji twàkulàayipù ndambù wa tusunsa kumpàla kwà twètù kufùnda cilumbù aci. Netùsùnsule eci ne kunùleeja cìvwàbo munkaci mwà kwenza, pashìishe netùjandulè difùnda dyà ku cilumbù edi ní ndijaalàme anyi kí ndijaalàme. “Mwab’awu,” Yelusàlèrà, mwaba mutàmbe kwikala wa cijila ewu, bwalu ntempèlù ùvwamù; mwaba mutàmbe cijila, bwalu, yèyè, ntempèlù, ùvwamù. Nènku beena Yudà bàà mu buloba bujimà bàvwa bàkungwila mu mwaba ùmwèpelè ewu, mwaba wà ditwilangana bwà dikuukwila. Mwaba mutàmbe bunène. . . wà mutàmbe bunène bwà dikuukwila ùvwàku, kùvwa nku Yelusàlèrà. Ntempèlù ùvwa kuntwaku. Mbwena kwamba ne: “Bààkafùnda ne: ‘Bìvwa bikèngela bwà bantu bònsò kukuukwilabò ku Yelusàlèrà,’” èyo, bwalu cidi mpwilààmambù wa dikuukwila.

⁹⁴ Ne leelù ewu nudi nubùmvwija, umwe wa kùdìbo mmuswè kwamba ne, bôbò: “Kaa, tudi tulwa ku mpungilu minène eyi,” kùdi màngumba aa àmwènzà. Ne—ne pashìishe tudi ne di—dikàngula dyà. . . mu Cimenga cyà Vatican, ne—ne dijidila dyà baapaapà, ne bikwàbò. Bôbò, bantu bònsò bàdi bàmba ne:

“Bivwa bikèngela bwà twètù bônso kuya ku bitùùdilu byà ba-Méthodistes, anyi mpungilu wa—wa ba-Baptistes wa mu Bible.” Anyi—anyi ne: “Bivwà bikèngela bwà twètù bônso kuya ku—ku Loomò, ne kwòkù aku kùdi mpwilààmàmbù munène awu,” mùdibo bàbiikila, “wa bwena Kilistò.”

⁹⁵ Mu cikondo cyà mvità yà ndekeelu, pàakadishindà Loomò, bàsàlaayi bàà beena Allemagne aba... Bààbúngì bàà kunùdi nwènù balúmyànà nudi bamanyè bwalu ebu. Bàsàlaayi bàà cyena Allemagne abu bààkaalukila e kukabwelabò mu Cimenga cyà Vatican mwàmwa, e kwasa beena Àmèrikè pàvwàbo bènda bàseemena. Mwanèètù Funk, ne Mwanèètù Roberson, ne bààbúngì, ne Mwanèètù Beeler, ne bààbúngì bàà ku bânà beètù bàvwà mu mvità ayi abu, mbamanyè. Kàdi nudi bamanyè anyi? Twàkapeta mèyi matùtùmina à ne kabàvwa mwà kwasangana mu cimenga aci to. Nwènù beena Àmèrikè, nuvwa biimàne mwaba awu, ne nwènù ke bàvwàbu bàludikila bingoma. Kàdi West-... Nzùbu wa badyambike wa ku Westminster lwà ku... mu Angleterre, uvwa mwà kwasamù cingoma kakuyi bwalu; ke mùvwà beena Mishònyì bakúngwile amu. Pa nàнку bivwa bìmpè bwà kwasamù bingoma, kàdi kí mbwà kwasa bingoma mu Vatican to. Bwalu, bu mùvwà Mfùmù wa ditunga Roosevelt... Mvwa mutèèlèje dyakula dyèndè pàdiye—pàvwàye wàkula ku tudyòmbà dilòlò adi, cibìikidiibwa ne: Muyuuki wà ku Luseke lwà Dyasa dyà bingoma. Yèyè kwamba ne: “Pàakadishindà Loomò,” yèyè ne, “bundù kaayi, bwalu Loomò ki mutù wà bwena Kilistò bwònsò.” Nudikù mwà kudifwànyikijila mwena Mishònyì wamba nàнку anyi?

⁹⁶ Pa nàнку mpwilààmàmbù munènè wa ntèndeleelelu wa beena Kilistò, èè, netùmutèèkè—netùmutèèke mùshindù awu bu Yèlusàlèrà, panwikale baswè. Nwènù baswè kwenza nàнку, tuteekàayi aci ku Yèlusàlèrà. Mutù wa bakwàbò bônso aba, Tubàdi twà—twà—twà beena Yuda, ne—ne twà Bàfaalèsà, ne twà Basàdokà, bônso bwàbò bàvwà bàbànda ku Yèlusàlèrà. Ki civwà bushùwà ciimamwèndè wa bukalenge ncyòci aci.

⁹⁷ Nènku mu nsòmbelu wa cyena bulongolodi, bikèngela witabè ne Èkèleeziyà wa Kàtòlikè wa cyena Loomò ki mamwèndè wa biine byònsò abi. Ncyà bushùwà nàнку. Cyàkabangila ku Mpenta. Ki pàakafikàbo mpòpò apu pàakadivwijàbo bulongolodi. Mpindiyewu twètù, beena Mishònyì, tudi ànu baakùnyì bàà bakàji bàà mwinè èkèleeziyà awu. Nènku mpindiyewu twàmbè ne neciikalè ku Vatican, leelù ewu.

⁹⁸ Anyi, mu Yèlusàlèrà amu, mùvwàbi mu ditùkù adi ne: “Pàvwàbi bikèngela bwà bantu bônso bàlwe ku Yèlusàlèrà bwà kwenza mudimu... kukuukwila.” Bàakacyèenza mu matùkù à—à Yesù bwà cinyì? Bàakamba ne bivwa bikèngela bwà bantu bônso kukuukwilabò mu Yèlusàlèrà bwà cinyì? Bwalu, kùdi mwaba ànu ùmwèpelè wikalà Nzambì mwà kubwela mu bwobùmwe ne

muntu, udi mwinshì mwà mashi à mulàmbù awu. Ki bwà cinyi byàkakèngela bwà kulwabò ku Yelusàlèma.

⁹⁹ Nzambì kààdyàkutwilanganakù ne muntu mwaba mukwàbò nànsha wùmwe to ànu mwinshì mwà Mashi. Wèwè mubènga Mashi, dîbà adi mwaba wèbè wà dituutakeena ne Nzambì mmuumùshìibwe. Nzambì wàkangata dipàngadika Dyèndè dyà kumpàla mu budimi bwà Edènà, muntu awu ùvwa ànu mwà kuMukuukwila mwinshì mwà mashi meela panshi à mulàmbù awu. Nènku ki mwaba wùmwèpelè wàkatwilanganà Nzambì ne muntu dîbà adi, ne ki mwaba wùmwèpelè wùkaadiku Nzambì mutwilàngàne ne muntu.

¹⁰⁰ Nènku ki mwaba wùmwèpelè wùdiYe ùtwilangana ne muntu leelù ewu, mmwinshì mwà Mashi meela panshi à Mulàmbù awu. Nwamònu anyi? Nànsha wèwè mwikàlè Méthodiste, Baptiste, Presbytérien; bu nwènù mwà kupwà mwoyi tulumbùlumbù twènù, nwènù Kàtòlikè kàà cyena Loomò, cyònsò cinùdì bafwànyine kwikala aci, ne kulwa mwinshì mwà Mashi meela panshi, Nzambì neàtwilanganè neetù bònsò bwètù muntwamu. Kí mwòmò amu mutùdì mwà kutuutakeena bònsò ne kubwela mu bwobùmwe pa bishìmikidi bìmwè. Kàdi, byòbì kabìyì nànkù, Yèyè kààkutwilangana ànu ne bwalu wèwè udi Méthodiste to; Yèyè kààkutwilangana ànu ne bwalu nudi beena Mpenta to. Yèyè neàdisangishè neebè mwinshì mwà mushingà umwèpelè, mbwena kwamba ne, mwinshì mwa Mashi meela panshi, pàdì mpèkaatù yèbè mitonda ne miipata mu Bwikadi Bwèndè, dîbà adi, ku Mashi. Ne Mashi àdi misangu yònsò ànu kumpàlà Kwèndè, ne ki bwà cinyi Yèyè ùdi mwà kukumwèna ànu mu Mashi meela panshi awu. Ne wèwè udi mutòòke bu nêjè, nwamònu's, paùdì mutondè mpèkaatù yèbè. Bwà cyanààna, kwènamù to, kwèna mwà kubwela mu bwobùmwe to.

¹⁰¹ Ki bwà cinyi kanwèna numòna bintu byènzeka mu maèkèleeziyà to. Bàdi bàjikula ne bàdi bìitabuuja Mashi, kàdi bàdi bàbènga ndongamu mwinè bwà kufika ku Mashi; Dìyì. Nwamònu anyi? Kùdi mùshindù ànu ùmwèpelà wàtwà Nzambì Dìyì adi mushinga. Kwàdyàkutwaku Dìyì adi mushinga to, mu kulwa wamba ne: “Mémè ndi mwena Kàtòlikè kàà cyena Loomò. Ndi ndòmba bwà *cikampànda* cyènjìlbwè.” Kwèna mwà kucyènza to. Méthodiste, Baptiste, anyi mwena Mpenta, kwèna mwà kucyènza to.

¹⁰² Mùshindù wùmwèpelè wùdìku mwà kucyènza nku luse lwà Nzambì, ku ngàsà Wèndè, nkupìcila mu Mashi meela panshi à Yesù Kìlistò, kwamba ne: “Mukalenge, ndi nna mulayì.” Nwamònu anyi? Ne pashiishe wèwè cyà bushùwà mwinshì mwà Mashi awu, Nzambì mmwenzèjìibwe ku Dìyì adi. Kàdi, dyàmbedi, bikèngela wìkalè mwinshì mwà Mashi awu. Nwacyùmvù mpindyewu anyi?

¹⁰³ Kabyèna bìkèmesha to mùdìbo kabàyì mwà kwitabuuja

bishimà. Kabyèna bikèmesha to múdì kùyikù mwà kwitabuuja citámbe-mfùkìlu. Kabyèna bikèmesha to pàdìbo bàcìpiisha. Nkabingilà kàmwèkàmwè kààkacìpiishilàbo kale wàwa, nkòkò kabingilà kàmwèkàmwè kàdìbo bàcìpiishilà leelù ewu. Mbapìile bapange ne mwà kupiila. Bwalu, ànu mwinshì mwà Mashi meela panshi!

¹⁰⁴ Nènkù aba bònsò bààteetà, mwanèètù mutekète kampànda udi uteeta, mu didìpwekesha, bwà kukwàcìla Nzambì ku Dìyì Dyèndè, ne kupàtuka kwaka ne kutonda mpèkaatù yèndè, ne kupwà mwoyi mèyì maswìka wònsò aa ne bikwàbò, ne kwimana mwaba awu mwinshì mwà Mashi ne kuDìitabuuja, dîbà adi mbaswè kumubiikila ne “mmukoleshi wa maalu.” Mbaswè kumutèeka ku mulongo wà . . . mutùdì mwà kucyàmba’s; kî m’mwàkù mwîmpè wà kwamba ku cyambilu to, kàdì bwà nwènu kuumvwa, yéyè ùdì “wa kàyì dyumvwa.”

¹⁰⁵ Twamb’eku twamb’eku, twètù bònsò katwèna bàà kabàyi dyumvwa anyì? Nwamònu’s, mwena kwitabuuja ng’wa kàyì dyumvwa kùdì mwena bupidyà, ne mwena bupidyà ng’wa kàyì dyumvwa bwà mwena kwitabuuja, pa nànkù wa kàyì dyumvwa kî nganyì? Nwamònu anyì? Cidimè ng’wa kàyì dyumvwa kùdì mwena kantu-ku-byanza; mwena kantu-ku-byanza awu ng’wa kàyì dyumvwa bwà cidimè, nwamònu’s, pa nànkù yéyè ùdì nganyì, yéyè mwine’s?

¹⁰⁶ Ndi nnwàmbìla ne, lupàndu mbwalu bwà muntu-nkààyà ne Nzambì, nkààyèndè, muntu-nkààyà, “twenda tudikèbela lupàndù lwètù lwà sungasunga ne bwòwà ne dizakala.” Nènkù ncyèna mumanyè nshindameenu mukwàbò to, bu mulongeshi, mu dindà emu, anyì bu mwambi wa kùdì Kilistò, pa kuumusha kucitèeka pa Dìyì. Ncyèna mwà kucitèeka pa cintu cikwàbò nànsha cimwè to.

¹⁰⁷ Mpindyewu tudì tusangana mwaba awu, dîbà adi ne, ànu mwinshì mwà mashi amu, ke mwàkatwilangana Nzambì ne mukuukwidi, kî kutwilanganabò mu Yèlusàlèmà.

¹⁰⁸ Ne Kilistò m’Mwànà wa mùkòòkò mulongolola wà Nzambì wà Mulàmbù. Ne leelù ewu kùdì mwaba ànu wùmwèpelè wikalà Nzambì mwà kutwilangana ne muntu, ne mmwinshì mwà Mashi à Yesù Kilistò. Mwaba mukwàbò kanà wònsò, mmupiishìibwe; Nzambì kààdyàkucitèejakù to. Udi mufwanyine kwenza masaluka à mùshindù wònsò, ne tusumbu twà mishindù yònsò, ne kunyukusha, ne kutupika, ne kwikala ne mashi ne kapyà ne mwìshì, ne bikwàbò byònsò; kàdì pàcidì ànu nsòmbèlu awu kàyì ùkùmbanangana ne Dìyì, ne Nzambì muleejè patòòke mu kaabujimà nsòmbèlu awu to, dîbà adi kakwèna dijinga dyà kuciteeta to, bwalu udi pambèlu. Nènkù Nzambì kàkutwilangana naacì pàdici kaciyì cilwè mwinshì mwà bukùbì bwà Mashi nànsha. Ncyà bushùwà.

¹⁰⁹ Pa nàнку, nudi numòna's, mu Mifùndu, tudi ne Yelusàlèrà, Èkèleeziyà ùdi nendè; ùdi mu Dyulu, Yelusàlèrà wa mu Dyulu, mùdi Nzambì mwikàle Nzambì. Nènku, leelù ewu, kî mmu twitabàayi kampànda anyì cintu kampànda to, mutùdi tuteeta bwà kucivwija Yelusàlèrà. Tudi baswè, ba-Méthodistes, mbaswè, mpindyewu, mbaswe bwà kwenza cii—ciimamwèndè wa bukalenge cyà ba-Méthodistes aci Yelusàlèrà. Beena Kàtòlikè mbaswè kucivwija Loomò. Ne—ne mu myaba mishìilèshìilàngàne mutùdi ne cyètù ciimamwèndè wa bukalenge, tudi baswè kwenza aci wetù. . . Yelusàlèrà. Kàdi Bible ùdi wàmba, ne: “Yelusàlèrà wetù ngwa ku Dyulu, udi mamwèndè wa beena kwitabuuja bònsò awu.”

¹¹⁰ Mpindyewu, ne Kilistò ùdi Mwànà wa mùkòòkò mulongolola wà Nzambì. Mònaayi mùdibi bikùmbànangane mpindyewu, bileeja ne Yelusàlèrà awu ùvwa munkaci mwà kujika. Dìbà kaayi? Ùvwa ne bwenzeji too ne pa dìbà adi. Mashì à mwànà wa mùkòòkò àvwa ènda ànu bìmpè too ne ku ditùkù adi, kàdi mpindyewu ku dipoopediibwa dyà pa nkùrusè àdi àshintuluka. Ndongolwelu wa kale awu mmujike. Kùvwa wa mupyamùpyà, ne—ne Mwànà wa mùkòòkò ùvwa ku Mulàmbù awu. Mwànà wa mùkòòkò, Mwànà wa mùkòòkò wà mulàmbù awu, ùvwa ùsanganyibwa mu cyalu. Bàvwa bàpiisha ne bènza cintu ciinè civwà cikèngelà bwà kwenzabò aci. Ncyà bushùwà.

¹¹¹ Nzambì àbèneshiibwè, bwà kumòna Bukènkè bulenga bwà mu Dyulu ebu mu ditùkù dyà ndekeelu edi! Bwalu, maèkèleeziyà àdi munkaci mwà kwenza cintu cimwècimwè aci leelù ewu. Too ne dìbà didi ntèndeleeleu wa bulongolodi mupiiishiibwe ne mujaadikiibwe ne ùdi munkaci mwà kulàmbula Kilistò Dìyi, kubangila ànu apu ki pàdi Dìyi dilwa, ne ànu Dìyi nkàayadi. Kuumukila ànu apu, mwànà wa mùkòòkò wà kale wà paasàkà awu kujìminayè ne Kilistò kulwaYè wetù Mwànà wa mùkòòkò, mu ditùkù dyà dipoopediibwa dyà pa nkùrusè. Ne ditùkù dyàkapoopelà dngumba Dìyi dyà Nzambì pa nkùrusè ne kwitaba twitabàayi kampànda pamutù pàà Dìyi adi, adi ke ditùkù dyàkadibwinkà Dìyi mu mudimu menemene. Aci's cidi ànu cyà matùkù mashàale aa.

¹¹² Mònaayi ne, nciibìdi. Cyàkumpàla, “mwab'awu,” Yelusàlèrà. Ciibìdi, “bòbò,” bòbò abu. Banganyi? Beena Yuda, bakuukwidi. Anji elàayibi pèènù meeji ku bwalu abu! Bakuukwidi bòbò biinè bàvwa munkaci mwà kushipa Ewu mene uvwabò bàmba ne bàdi bàkuukwila awu. Nuvwakù mwà kudifwànyikijila cintu bu nàнку anyì, bu bantu bàà lungenyi bàvwà baakwidi abu, bàvwà balongèshiibwe abu, bàvwsà ne màpòlomè à bu docteur abu mu mùshindù wà ne bafwànyine pàmwàpa. . . Bòbò, bìvwa bìkèngela bwà kupàtukabò mu lukòngò kampànda kumpàlà kwà bòbò. . . anyì—anyì cisàmbà, kumpàla mene kwà kwikalabò nànsha mwakwidi. Bivwa bìkèngela kwikalabo beena Lewi. Baatatwàbò bàvwa

baakwidi. Bààbò baakaakù bàvwa baakwidi. Baakakwëndè wa baakakwëndè wa baatatwëndè wa baakakwëndè bàvwa baakwidi. Bàvwa ne cyà kwenda lwendu lwà cijila, mu mùshindù wà ne, katòba kàmwè kàbàpiisha, bàvwa bafwànyine kwashiibwa mabwe. Luse nànsha lùmwe kalùvwa lufidiibwe to. Wa cijila? Ncyà bushùwà menemene, kàdi cijila cidikwàtakajila. Bàvwa ne cyà kwenza maalu mùshindù awu, bwà kuleeja mpalà yàbò bwà èkèleeziyà wabò. “Munda mwàbò,” mwàkambà Yesù, “nudi bùle tètè ne mifùbà yà bantu bafwè.”

113 Mùshindù mwine wùndi mufwànyine kutwàla difùdà dyà cilumbù ànu mwaba awu mene’s wè! Ne muntu udi mumanye ne Aci m’Bulelèlè, Dìyi *edi* dìdi ne cyà kwikala Bulelèlè, ne ùdyaPù cibàngà, bwà kuleeja mpalà kumpalà kwà bulongolodi kampànda, uh-huh, mèmè ndi ne bukenji bwà kumufùnda ku cilumbù, cyà bushùwà, pa Dìyi dyà Nzambi.

114 Mònaayi ne, “bòbò,” bakuukwidi, bantu bàvwa bindile mulayi abu, bantu bàvwa bawùkeba, munda mwà bidimu ne bikondo abu, ne kabàyi ne cikwàbò nànsha cìmwè cyà kwenza to ànu kulonga mu sèminèrè. Kàdi bàvwa bakòsòlòle Dìyi bilondèshile dilongesha dyà sèminèrè, ne bàkaavwa bapangile Bulelèlè mene bwàDi. “Bòbò,” baakwidi, mudimu wà bwambi wà ditùkù adi! “Mwab’awu,” ku ciimamwëndè wa bukalenge cyàbò, “bòbò,” mudimu wà bwambi wà ditùkù adi, ùvwa munkaci mwà *kushipa* Nzambi mwinè, *Mwànà wa mùkòòkò* mwinè awu. Mwinè uvwabò bamba ne bàvwa munkaci mwà kukuukwila awu, s’ki uvwabò munkaci mwà kushipa.

115 Nènku, leelù ewu, ndi mfùnda musùmbà wa bambi bajidila aba; mu twitàbàayi yàbò ne màngumba àbò, bàdi munkaci mwà kupoopela pa nkùrusè, bwà bantu, Nzambi mwinè udibò bàlaka mukana bamba mùdìbo bamunange ne bàmukwàcila mudimu awu. Ndi mfùnda bambi aba ku cilumbu, mu Dìnà dyà Mukalenge Yesù, pa dilongesha dyàbò, dyà bwena dìdi dyàmba ne “matùkù à bishimà àkaadi mamananè kupita,” ne “dibàtiiza dyà mu màyi mu Dìnà dyà Yesù Kilistò kí ndikùmbàne to ne kí ndijaalàme to.” Pa Méyi kanà wònsò aa, àdìbo bapingàjèpù twitàbàayi yàbò ayi, Ndi mbàfùnda ku cilumbu, ne mbapiile, ne Mashì à Yesù Kilistò adi pa byanza byàbò, bwà dipoopela cyàkàbìdì dyà Mukalenge Yesù pa nkùrusè, bwà musangu mwibìdì. Bàdi munkaci mwà kupoopela Kilistò pa nkùrusè, ku bantu, bàbànyenga cintu cidìbo ne cyà kubàpèèsha aci. Ne mbapingaje cintu kampànda cikwàbò pa kaaba kaaDi; twitàbàayi wa èkèleeziyà, bwà dimanyika.

116 Mwaba awu bòbò, “bòbò,” biinè bàvwa ne cyà kwikala bamanyè civwà cìmpè abu. Bu kòkò muntu uvwa ne cyà kwikala mumanyè cidì cìmpè, bàvwa ne cyà kwikala bambi abu. Bu kòkò muntu uvwa ne cyà kumanya bìmpè menemene, ùvwa ne cyà kwikala mulombodì wa ntèndeleeleu wa ditùkù edi awu. Bu muntu kanà yònsò ewu ne cyà kumanya, bèè—bèè—bèèpiskòpò,

ne bèèpiskòpò bàà kumutù, ne—ne bambi, ne baadocteurs en divinité, s’bivwa bikèngela kumanyabù dishiilangana. Kàdi bwà cinyi kabèèna mwà kucyènza? Uh! Dibèngangana dyà mèyi kaayi’s wè! Citùdì naaci kumpàlà kwètù mwab’ewu ncinyi s’ànù di—dibèngangana dyà mèyi! Bàdi bàmba mùdìbo bakuukwila Nzambì, pààbò munkaci mwà kushipa Mfùmù wa Mwoyi. Bòbò, “mwab’awu bòbò kuMupoopela pa nkùrusè,” kàdi’s mbòbò *aba* bènza cyàkàbìdì cintu cìmwècìmwè aci, bwalu Yèyè ùdì Dìyi.

117 Ki cidiYe ncyòci aci, cidi ànu didileeya dyà Dìyi adi. Nènku ki cidiYe leelù ewu, didileeya dyà Dìyi, ùteeta bwà kupeta muntu kampàndà bwà kuDìleejilakù.

118 Nènku bantu aba bàdi bàseemeja disangisha kule ne Nzambì. Ne—ne kòkò cintu kampànda cyenzèke, ne cyòci cyàmbiìbwe mu disangisha, bàdi bàcipiishila ku cibumba cyà ku cyambilu, ku cyambilu aku, bàmba ne: “Ndikolesha dyà maalu. Shààla kule naaci!” Mu kwenza kwà nànkù, bàdi bàpoopela Yesù Kilistò pa nkùrusè mu cidimu cyà 1963, ne biikàle bapiile ànu mwàkadì balùmyànà abu mu. . . mu ditukù adi amu. Adi’s ndíyi dikolè be, kàdi’s mbulelèlè. Pa. . . Ki cyòci aci menemene cìdìbo bènza leelù ewu.

119 Nènku pa bishìmikidi ebi, pa bishìmikidi byà dipoopela dyà Kilistò ku nkùrusè, pa bishìmikidi byà kwangata Dìyi ne kuDyùmusha kùdì bantu; ke cyòci cìvwàbo bènza menemene kuntwaku. Dìyi diinè dìvwà Nzambì ùleejila kùdì Mwan’Èndè mwinè, bwà kujaadika ne dìvwà n’Dyòdì, ne Ewu uvwabo bàlaka mukana bàmba mùvwàbo bamunange awu, Yèhowàh ùvwà muDìmwèneshe ku Mifundu awu, mwenze ànu menemene cyàkambàYe ne Neenzè, ànu menemene cyàkambà Nzambì ne Neenzè, ne kuCìleeja kumpàla kwàbò. Bwalu dinanga dyà bisùmbù byàbò byà èkèleeziyà, ne bintu byà mùshindù awu, baakapiisha Mfùmù wa Mwoyi.

120 Nènku ndi mpiisha kasùmbù kàmwèkàmwè aku leelù ewu, ne mbàfùndà, ne mbapiile kumpàlà kwà Nzambì, ku Dìyi dyà Nzambì, bwà ne bàdi bènza cintu cìmwècìmwè aci. Lukòngo elu ndufùndiìbwe ku cilumbù. Vùlukàayi ne Ebèlù 13.8: “Yèyè ùdì umweumwe awu makèlèlèlè, leelù, too ne kashidi.”

121 BàakaMufùnda bishi? Bwalu twitabaayi yàbò kayìvwa mifwànyine kuMwitaba to, ne munda mwà mwoyi wàbò bàvwa bamanyè bishiilàngàne. Nìkòdemù, mu nshapità mwi3 wa Yone Munsantu, kàakacyàmba bimpè patòoke anyi? “Laabi, twètù, Bàfaalèsà,” bayiishi, balongeshi abu, “tudi bamanyè ne Wèwè udi mulongeshi mutùmìbwe kùdì Nzambì, bwalu muntu nànsha umwe kì mmufwànyine kwenza bintu byùdì Wèwè wenza ebi Nzambì kàyì nendè to.” Nwamònu anyi? Bàakacìfidila bujaadiki patòoke kùdì umwe wa ku bantu bààbò bàà luumù, ne bindile. . . bwà twitabàayi yàbò, bàakapoopela Kilistò pa nkùrusè.

122 Ne leelù ewu kakwèna mubadi udi kàyì mwà kubala Byenzedi 2.38 ànu mûndi mwà kuCìbala emu, ne bikwàbò byà ku Cyòci, ànu mûndi mwà kuCìbala emu to. Kàdi bwà twitàbààyi yàbò, ne bwà tickets yàbò yà cyena-màngumba yidìbo naayi mu mpaaya yàbò, bimanyinu byà nyama wa lwonji bidìbo bambùle bu twartà twà bwobùmwe; ne kwangata bintu abi, bàdi bàpoopela cyàkàbidi bwàbò bôbò biinè Yesù Kìlistò pa nkùrusè, ne bàMupoopela pa nkùrusè kumpàlà kwà bantu, ne bàpenda Nzambì mwinè wàkalaya bwà kwenza Cyòci eci awu, biikàle bàtwàla dipiishibwa pa cisà cijimà.

123 Mpindyewu, mwaba awu, “bôbò,” kì nngènzàmpèkààtù to. “Bôbò,” mbwena kwamba ne, èkèleeziyà wa ditùkù adi, bààkasangana cilèma kùdì Muntu Uvwa Dìyi awu. Neyà bushùwà anyi? Bààkasangana cilèma kùdì Muntu Uvwa Dìyi awu. Mpindyewu bàdi bàsangana cilèma kùdì Dìyi didì dikwàcila mudimu mu muntu adi. Nwamònu’s, bàdi ànu bàcìtùmpwilangana. Pààbì, cìdì mu muntu awu, Eci, n’Nyumà Mwìmpè ùdi munkaci mwà kukwàcilamù mudimu, ke dishindika dyà Nzambì ndyòdi adi.

124 Bààkamanya bishi ne Yèyè ùvwa Kìlistò? Bwalu byenzedi Byèndè byàkajaadika cìvwàYe. Yèyè wàkamba ne: “Nganyi wa kunùdi udikù mwà kuMpiisha bwà mpèkaatù? Bingiikalà nciyi mwenzè ànu menemene cìvwà Mifùndu myàmbe ne ke Cìmvwà ne cyà kwenza’s! Ne ciinè aci. . . Muntu kampàndà àNgambilè mwaba wùmvwà Mémè mupangile mwaba kampànda, Mémè nciyi muleeje cimanyinu cyònsò cyà ne Mémè ke Maasiyà, bwà ne kì Mémè mene Awu ùvwà wèwè. . . mulyà.”

Kwambabo, bôbò kwamba ne: “Èè, twètù tudi ne Mòsà. Tudi twitabuuya Mòsà.”

125 Yèyè ne: “Bu ne nuvwa biitàbùùje Mòsà, nùnkù nudi bangiitàbùùje Mémè. Bu nwènù. . . Mòsà wàkamòna ditùkù Dyànyi ne kujingayè bwà—bwà kwikala ne mwoyi mu ditùkù edi. Mòsà wàkamwèna pa bule, ne bapròfetà. Kàdi’s ki nwènù aba, biikàle ne mwoyi ànu pabwipi naaCi, eku upiisha.” Yèyè ne: “Nwènù beena lubombo,” yèyè ne, “nudi mwà kujingulula mùdì maulu àmwènèka, kàdi cimanyinu cyà cikondo kanùyì mwà kucijingulula to.”

126 S’ki cyòci aci, cimanyinu cyà cikondo aci. CyàkaMutèèka ku luseke kaayi? “Mukoleshi wa maalu, muntu mupàle.” Èyowà, bààkasangana cilèma kùdì Muntu Uvwa Dìyi awu.

127 Yèyè ùvwa Dìyi. Yone Munsantu, nshapità wa 1, ùdi ùcìjaadika ne: “Ku cibangidilu kwàkadi Dìyi, ne Dìyi dyàkadi ne Nzambì. Ne Dìyi dyàkavwijiibwa mubidi, ne dyàkasòmbela munkaci mwètù.” Yèyè ùvwa Dìyi didì ne mwoyi dyà Nzambì, bwalu Yèyè ùvwa wèla patòòke Nzambì ku Yèyè mwinè. Yèyè ùvwa mutàmbe kwikala mudifile ku—ku Dìyi dyà Nzambì, mu mùshindù wà ne Yèyè ne Dìyi bìvwa cintu cìmwè. Nènku ki cyòci

aci menemene cìvwà cikèngelà bwà Èkèleeziyà kwikalayè leelù ewu, bwà ne Díyì dyà Nzambì diikàle cintu cìmwè.

¹²⁸ Mmunyì mûdi mwà kwikala citùpà cyà Díyì adi paùdi uDìvila pabwìpi ne dyònsò? Kabingila kàdibi byenzèkèle, kí mbwalu bantu; kí bwà cinyì ndi ngèèla méeji ne Nzambì mmwakùle naanyì bwà dibìikila dyà bantu Bèndè ne “Rickys” ne “Rickettas.” Mbwalu màngumba a citù aa, àdi àlekela bantu abu biikàle ne nsòmbelu wa mùshindù ùdibo nendè awu. Mbapoopèle Bulelèlè pa nkùrusè. Ne bantu bàdi bàCibìikila ne ndipenda dyà Nzambì, ne bàdi bàCìvwija dipenda dyà Nzambì’s wè, èyowà. Bàdi bàCibìikila ne ndikolesha dyà maalu, ne bikwàbò, kàdi bàpanga kumanya ne bàdi munkaci mwà kupenda Nzambì mwinè udibò bàyiila mu èkèleeziyà bwà kumukwàcila mudimu awu.

¹²⁹ Ki bwà cinyì, ndi mfùnda musùmbà wà balombodi ewu ku cilumbù leelù ewu. Ndi mfùnda lukòngò elu ku cilumbù, mu Dìna dyà Yesù Kìlistò, mu bukòokeshi bwà Díyì dyà Nzambì. Nudi nuMupoopela pa nkùrusè cyàkàbìdi.

¹³⁰ Mònaayi ne: “Yèyè ùdi umweumwe awu makèèlèlè, leelù, too ne kashidi,” Díyì dyà Nzambì dishìndika mu muntu.

¹³¹ Fwànyikijàayi Kàlvariyo yìbìdì ne difùnda dyàyì dyà cilumbù. Vùlukaàayi ne: “Bwalu Yèyè wàkaDivwija Nzambì, katwàkwitaba bwà Muntu ewu àtùkookèshèku to.” Ncinyì cìvwàbo mwà kusangana bwà kumufùnda naaci, mu cipàngù mu dindà adi, dìbà dyàkapoopelàbo Yesù pa nkùrusè adi? Ne: “Yèyè wàkaDivwija Nzambì.” Yèyè ùvwa Nzambì. “Ne Yèyè wàkashipa Nsabatu.” Ne Yèyè ùvwa Mukalenge wa Nsabatu. BàakaMupìisha ne bwalu Yèyè wàkaDivwija Nzambì. “Kwènà ne bukenji bwà kwenza cyòci eci to. Kwènà ne bukenji to. Baakwidi bèètù banène, cintu kampànda cyòci cilwa, cidi cipìcila kùdi baakwidi bèètù.” Mpindyewu fwànyikijàayi aci ne Kàlvariyo leelù ewu.

¹³² Pààbì, Nzambì, byàkatàmba kusànkisha Taatù, Nzambì, Nyumà, bwà kujuula Mwan’Èndè Sungasunga; wàkabwikila Màriyà ne mundidìmbi, ku Nyumà Mwìmpè, ne kutwàla mubidi wùvwà mwà kuMukwàcila mudimu ne kukùmbaja kiipàcìlè Kèndè kùdiYe. “Nzambì ùvwa munda mwà Kìlistò, kaabujimà kàà Buzambì mu mùshindù wà mubidi, munda Mwèndè,” ùleeja cìvwà Nzambì, kùdi bantu, ùlekela—ùlekela bàà pa buloba bujimà bàmanya cìvwà Nzambì muswè bwà muntu-nkààya kwikalayè: mwànà wa balùme, ne wa bakàji. Yèyè wàkangata Muntu umwèpelè e kucyènzayè. Ne bwalu Yèyè kààkaya kashàala wa mu milongo yàbò yà beena bulongolodi ayi to, bàakaMupìisha ne kuMupoopela pa nkùrusè.

¹³³ Mpindyewu fwànyikijàayi Kàlvariyo aku ne leelù ewu. [Katùpà kàà mukàbà wà mèyi munda mutupù—Muf.] Bwà lukìnu lwà cyeena bulongolodi, bwà dibenga kucyùka dyà maalu

munkaci mwà bamanyi bàà mabàla bàvwà ne cyà kumanya Dîyi ne ndongamu wa Nzambi abu; bwà cyôci eci, Nzambi ùdi mwà kwangata kasumbu kakesè kàà bantu kàdiYe mwà kukwàcila mudimu ku kwòkù, mu mwaba kampànda, ne kuDileeja, biikalà mwà kudipwekesha ku Dîyi. Nènku kabèena mwà kwamba ne kabyèna nàнку to.

¹³⁴ Kabàvwa mwà kwamba ne Yèyè kàakacyènta to, bwalu disangisha dyàbò divwa ntèmù wa cyôci aci. Cìvwa kumpàla kwàbò. Kabàvwa mwà kucivila to. Kabàvwa mwà kuvila mèyi Èndè to, bwalu, Dîyi diinè dyàkambàbo ne bàvwa biitàbùùje adi, divwa n'Dyôdi Dyàkajaadika ne ùvwa n'Yèyè Awu. Bwalu, Nzambi wàkangata Dîyi divwà ne cyà kwikala Maasiyà ne kuDileejila ku Muntu, nènku bàvwa ne cyà kutàpulukangana Nendè. Ki mùshindù ùmwèpelè ùvwàbo ne cyà kutungunuka, ùvwa ngwà kutàpuluka ne Maasiyà. Nènku bàakacyènzela ku bufofo ne bupangi, nànsha mùvwàbo ne dilonga dyà kàlaasà amu. Bàvwa ne meeji matwè, ne lungenyi; mu ngakwilù wa bàà pa buloba.

¹³⁵ Ànu bu mutwàkapàlakajà dilòlò kampànda adi, pàvwà Bukènkè butuute mukòokeshi wa citendè awu, tàngilàayi cyàkenzàye. Yèyè kubenga; muntu wa meeji matwè. Pòlò, muntu mukwàbò wa meeji matwè, Bukènkè kumulengabu. Cyàkenzàye ncinyi? Yèyè wàkaBwitaba. Wàkabipwa mwoyi, byònsò bivwàyekù mumanyè abi, bwà wàmòna mwà kumanya Kilistò. Aci cyàkavwija nsòmbelu wendè mukùmbànyine Èvànjeeliyò. (Diyiisha dyà dilòlò dyà dyàlumingu dyàshàadi edi.)

¹³⁶ Ki Cyôci aci leelù ewu. Cìdi cilenga pàngà apa muntu kampànda mukèsè, uvwa mupàtùke, mwikàle ne dibiikila dyà Nzambi, mudyùmvwa, muyè ku sèminèrè kampànda mukalonge twitabàayi kampànda. Ùdi ne cya kwitaba twitabàayi awu anyi kulekelela karta kèndè kàà buumambàlà. Yèyè mwenze nàнку, mmutwibwe cimanyinu cifiike, muntu mukwàbò nànsha umwe kàakumwakidila to, bwalu musangu kampànda yèyè ùvwa wa ku cintu kampànda cikwàbò kàdi mpindyewu kèna wa ku cyôci aci to. Bàdi badifwànyikijila ne kùdi cintu kampànda cipampàlàmuke mu muntu awu, ne kabàakumwakidila mu disangisha dyàbò to. Piinè apu, mpàdi disangisha munkaci mwà kukèba cimanyinu cimwèpelè, cyà ne, ni ùdi witabuujà cidìbo biitabuujà.

¹³⁷ Piikalàye ne kartà, piikalàye Méthodiste, yèyè mwikàle ne kartà. . .ngwa mu bwobùmwe bukwbò, anyi wa ba-Unitaires, anyi wa ba-Trinitaires, anyi cyònsò cidici cifwànyine kwikala aci, èkèleeziyà wa Nzambi, anyi mu milongo yà beena Mpenta, ne milongo yònsò ayi. Yèyè mwambùle kartà, bàdi bàdyùmvwa ne ciimamwèndè wa bukalenge ncimutàngile, ne ncimuteetè lungènyi lwèndè, ne ncimwele diteeta dyà beena mitù, ne cimòne

ne Cipidì cyèndè cyà Meeji ncikùmbàne bwà kwakula kumpàla kwàbò. Yèyè kàyi nànkù to, bàdi bàmbùnga. Ncyà bushùwà.

¹³⁸ Kàdi, nudi numòna's, bìvwa bìkèngela bwà disangisha kwikaladi dibandila cyaanza cyà Mukalenge, kumòna Nzambì ní mmumupèeshe dijidiibwa dyèndè mu mudimu wà bwambi anyi to. Ki cìvwa cìkèngela bwà twètù kwikala tutàngila ncyòci aci. Kàdi leelù ewu bàdi bàpoopela cyàkàbìdì pa nkùrusè Mwànà wa—wa—wa Nzambì. Pààbì, muntu ùdi ne bukolè, ku ngàsà wa Nzambì, bwà kubìkidiibwa kùdì Nzambì, bwà kulekela Nzambì ùDìleejila ku yèyè. “Byenzedi bìNdì ngenza nenùbyènzè pèènu,” mwàkambà Ye. Mònaayi ne mmu ditùkù kaayi mutùdì ne mwoyi's!

¹³⁹ Bòbò, bàdi bàngata, bàdi—bàdi bàngata Kalvariyo mene—mene aku, katùdì mwà kwangata mu dindà emu aka, ne kabingilà mene aku. Mpindyewu, bàvwa bamanyè ne cìvwa Bulelèlà; kàdi bwà mukawu, cipùmbishi. Yesù wàkabàmbila cinyi? “Piikalàbi ne Mémè ndi ngiipata badémòns ku munu wà Nzambì, dìbà adi nwènu nudi—nudi nubiipata mu dìnà dyà nganyi? Bòbò bìikalè bàkose cilumbù cyènu, nwamònu's, piikalàbi ne Mémè ku munu wà Nzambì Ndi ngiipata badémòns.”

¹⁴⁰ Mpindyewu, ànu bu munwàkuumvwa bàmba ne: “Udiku mwà kujaadika ne mmunu wà Nzambì anyi?” Mvwakù mwà kuswà bwà kumòna, mvwa mwà kuswà kuumvwa baMwela lukonko alu. Bàvwa ne meeji matwè bikolè be bwà bwalu abu.

¹⁴¹ Mònaayi ne: “Bwalu Yèyè wàkaDìvwija Nzambì,” ne Yèyè ùvwa Nzambì. “Nènku katwàkwitaba bwà Yèyè kutùkòokèsha to.”

¹⁴² Kàdi mpindyewu bwalu bùdi ne, lubilà lùmwlèlùmwlè lwà kale alu lùdi lùlwa cyàkàbìdì ne: “Bible awu wàkafùndiibwa kùdì muntu,” mùdìbò bàmba. “Kabyèna bìkèngela bwà twètù kwikala ne mwoyi ku Aci to.” Aci's ncyà Nzambì. Aci's n'Diyi dyà Nzambì. N'Nzambì, Yèyè mwinè.

Mvwa nyiikila ne muntu kampànda makèlèlèlè awu, wàmba ne: “Èè, muntu kampànda ngudi mufwànyine kwikala mufunde Bible awu.”

Mémè ne: “Èyowà's, mmùvwàbi. Dìnà Dyèndè, tudi baMumanyè bu Nzambì.”

¹⁴³ Wàkafùndiibwa mu bidimu pabwipi ne, binunu binaayi bishiilàngàna, Mifundu, kuumukila ku Yobò, too ne ku Dipungila Dipyadipyà, ne mufunda kùdì nkàmà kùdì—kùdì. . . ne nkàmà ya bidimu bitàpùlùke; ne wàkafùndiibwa kùdì bantu bashiilàngàne, ne biine abu kabayi bamanyàngàne ewu ne mukwàbò to, mu bitùpà bishiilàngàne byà ditùnga, ne Diyì nànsha dimwè dyàWù kadyàkupiishakù dikwàbò to. Ndi ngèela muntu kanà yònsò ewu kadyòmbo bwà àlwe mwinshì mwà Mashi

à Yesù Kilstò ne ànanè mulayi kanà wònsò ùdiMu! Nzambi mmwenzèjìbwe bwà kuWücyüka.

144 Kàdi kabàakucyènta to. Nebàlwe, bàmba ne: “Éyi Mukalenge, ndi muswè kwenza cintu kampànda. Mpèèshèku dipà dinène. Àlèluuyàh, Mukalenge! Butùmbi kùdi Nzambi, ndi ngiitabuujà ne ndi naaci. Àlèluuyàh!” Kabyàkukùmbanakù to. Udi mufwànyine kupàtula bintu byà mu meeji bùngi cyanààna, kàdi kabyàkukùmbanakù to.

145 Bikèngela bwà Nzambi àjingùlùlè kanyinganyinga aku. Bikèngela bwà Nzambi ènzè nànkù. Tudi bafwànyine kwamba byàbùngi byà bwena abi, kàdi ndi ntèkemena ne nudi—nudi nuumvwa.

146 Tàngilàayi, kàdi mpindyewu kabàakulekela Díyi dibàkòòkesha to. Ndi ngàmba ne: “Yònsò wa kunùdi àlukila. Nudi babàtìjìbwe bibi. Nudi babàtìjìbwe mu èkèleeziyà wa Kàtòlikè.”

147 “Wèwè udi nganyi bwà kutwàmbila aci?” Kí mmémè to; n’Díyi. “Kàdi ndi ntwàmbila ne, tudi—tudi twitabuujà...” Cyúdi witabuujà nànsha ciikàle cinyi; ncidi Bible wàmba ke cidi ne bwalu. “Kàdi kabyèna bikèngela bwà twètù kwikala ne mwoyi ku Cyòci aci to.”

148 Bidi binùkengela nànkù, anyi udi mwinshì mwà cilumbulwidi cyà Bible ewu. Bwalu: “Ewu yònsò wadidìnga kuumushilaKù Díyi dimwè awu, anyi wasàkidilaKù kantu, cintu cimwècimwè aci necyùmushiibwe ku, ku cyèndè citùpà, ku Mukànda wà Mwoyi,” nànsha yèyè mwikàle mwambi, mulombodi wa ntèndeleele, nànsha yèyè mwikàle nganyi mene. Bikèngela ùlwilè mwinshì mwà bulombodi bwà Díyi edi, bwalu Didi Nzambi. Bible ùdi wàmba ne Didi Nzambi.

149 “Katwèna baswè bwà Dyòdi adi ditùkòòkèshè to.” Bàdi bàngata twitabaayi yàbò, ne màngumba àbò, ne tuubintu twàbò—twàbò tukesè tùdibo biitabuujà atu, ne tukaadi twitabiibwe kùdi nsangilu yà bantu, ne bàcyàngata pamutù pàà Díyi dyà Nzambi.

150 Bààkenza cinyi? Bààkangata Baalàbààsà, mushebeyanganyi, pamutù pàà Mwàna wa Nzambi, mu ditùkù dyà dipoopela dyà pa nkùrusè dyà kumpàla.

151 Nènku leelù ewu bàdi bàngata díyi dyà muntu kampànda, didi mashimi ne njila wa lufù adi, ne babenga kulonda njila wa Mwoyi, Díyi dyà Nzambi. Ndi mpiisha lukóngò elu, ndùfunda ku cilumbù, mu Díyi dyà Mukalenge ne, mbapiile. Mbapiile bwà dipoopela dyà pa nkùrusè, anyi bàteeta bwà kupoopela Nyumà pa nkùrusè.

152 Bàdi bàkeba ditàbuluja, myaba yònsò. Mmunyi munwàpetà ditàbuluja piikalà Díyi Dyòdi diine kadiyi mwà kukwacila mudimu munda mwà bantu? Ndi muswè bwà muntu

àngandàmwinè cyôci aci. Bìdi mwà kwenza cinyi, paùdi uvila Ditabuluja Diinè? Èè mupròfeta wàkakula bwàbò ne: “cimwenekelu cyà difwànà dyà Nzambì.” Mmwenekelu yabo bôbò biine, kale wàwa, bààkavila Díyi dyà Mwoyi. Mmwenekelu yàbò bôbò biine, leelù ewu, bàvila cintu cidi mwà kubatwadila ditàbuluja aci; twitabàayi yàbò ne mmwènekelu yà kwisùkwisù ayi. Èyowà’s, mukalenge.

153 Bàdi bàngata dingumba ne twitabàayi yàbò pamutù pàà—pàà Díyi adi, ne aci cidi cìpoopele Díyi Dyèndè ku nkùrusè ne civwija Díyi Dyèndè kadiyi ne bwenzeji pa bantu to. Pàdìbo bàmona Díyi dyà Nzambì diikàle ditòòke tòò ne anu dìDìteeka Dyôdi diine pa kaaba, mu mùshindù wa ne Nzambì wàkenza mulayi ne Yèyè neènzè cyôci eci, kàdi’s ki Yèyè ewu munkaci mwà kucyènza, ne bôbò bàdi bàCyèlulwila kàdi bàCiseesuka, aci’s ndipenda dyà Nzambì. Nènku bàdi bàteeta bwà kupoopela Díyi Dyôdi diinè pa nkùrusè.

154 Bàdi bàDìpoopele pa nkùrusè bwà cinyi? Kabèèna mwà kupoopela Díyi pa nkùrusè kutàmba mùvwàbo mwà kupoopela Nzambì pa nkùrusè amu to. Bàvwa mwà kupoopela mubidi wùvwà mwambùle Nzambì awu pa nkùrusè, Mwànà wa Nzambì. Bàvwa mwà kupoopela aci pa nkùrusè, kàdi kabèèna mwà kupoopela Nzambì pa nkùrusè to. Bìvwa bikèngela kwikalaYè nàнку, musangu awu, bwà kwikala Mulàmbù, bwà kubweja bàna bààbùngì bàdi badyànjila kulongolwela Mwoyi wà Cyendèlèlè abu. Bìvwa bikèngela kucyènzabò díbà adi, kàdi kabèèna mwà kucyènza mpindyewu to. Kabèèna mwà kucyènzakù to, bwalu Díyi Dyôdi diinè nedìikale ne mwoyi. Kàdi bôbò . . .

155 “Cidìbo bènza ncinyi? Bàdi bènza bìshi? Cyùdi wamba díbà adi ncinyi, muyiishi? Mmunyi mùdi utèeka cishimikidi cyèbe mwab’ewu, díbà adi, bwà kuleeja ne bàdi bàMupoopela pa nkùrusè?”

156 Bàdi bàpoopele bwenzeji bwà Èvànjeeliyò pa bantu, ku twitabàayi yàbò. Ki dipoopela dyà pa nkùrusè ndyôdi adi. Bwà ne pàdi bantu bàsòmbe mu nzùbù eyi minène yà dilamina bitàlù, yidi yìbikidiibwa ne mmaèkèleeziyà, màngumba eyi, ne bèèla mushonyi wà twitabàayi, ne aci civwa ne. . .Díyi dyà Nzambì kadyèna mwà kwikala ne bwenzeji pa bôbò to, bwalu bàdi—bàdi bàpiùsha bintu mene bìvwà Kilistò mwambè ne nebyènzekè abi. Kabyèna ànu bìlwa bilondèshila twitabàayi wabò awu to.

157 Ne nànsha Yesù kààkalwa bilondèshile dyumvwa dyàbò dyà dilwa Dyèndè to. Yèyè wàkalwa mu mùshindù úvwà Nzambì muMutùme awu, ne Yèyè wàkalwa ànu menemene ne Díyi. Kabyèna bikèmesha to pààkambàYe ne Yèyè úvwà “muCisokòke ku mèsù kwà beena meeji ne batàlame, kàdi muCìbuulwile bàna bakesè bu bàdi bafwànyine kuyiila.” Nudi buumvwe anyi?

158 Kaa, mbapoopèle pa nkùrusè bwenzeji bwà Dìyì. Ndi ne musumbà wa Mifundu mwaba ewu. Ndi mufwànyine kuteela ànu yìbìdì anyì yìsàtù yà ku yôyi. Bàdi bàDìpoopela pa nkùrusè.

Wêwè udi wamba ne: “Bàdi bàpoopela Dìyì pa nkùrusè munyi?”

159 Pàakambà Yesù ne Yèyè ùdi umweumwe awu makèèlèlè, leelù, too ne kashidi, Ebèlù 13.8; bàdi bàmba ne: “Ùdi nàнку mu mùshindù kampànda awu.” Nwamònu anyi? Èyo.

160 Ne Yesù wàkamba, dîyì Dyèndè ditùma dyà ndekeelu kùdì Èkèleeziyà ne: “Ndàayi pa buloba bujimà,” Maakò 16, “ndàayi pa buloba bujimà, nùkayiishè Èvànjeeliyò. Bimanyinu ebi nebìfilè aba bàdi bìitabuuja. Buloba bujimà; kùdì cifùkùibwa cyònsò!” Nèku kí ncyanji kufikaku ku cyàbìbìdì cìmwè to. Nèku kùdì mìliyò yìdì yifwa cidimu cyònsò eci, yìdì kayiyì, kacya kayiyikù nànsha myumvwe bàakula bwà Dìnà dyà Yesù to. Pa nàнку, cìcìdì ànu mèyi matùma à bantu bònsò. Cìcìdì ànu dîyì ditùma dyà Nzambì. “Buloba bujimà, ne kuyiisha cifùkùibwà cyònsò Èvànjeeliyò. Ewu udi wìtabuuja ne ùbàtìijibwa neàsungidiibwè; ewu udi kàyì wìtabuuja neàpìishiibwè. Ne bimanyinu ebi nebìfile aba bàdi bìitabuuja: mu Dìnà Dyànyì bòbò nebìipatè badémòns; nebàakulè mu myakulu mipyamìpyà; bòbò bakwàte nyòka ne byanza, anyì banwè bintu bìdì bishebeyangana, kabyàkubènzela bwalu to; bòbò batentèkèle babèèdì byanza, babèèdì nebàsangale.”

161 Kàdì bòbò bàdi bàmba ne: “Aci cìvwa mbwà lukòngò *alu*,” ne bàdi bàvwija dîyì ditùma dyà Nzambì kadìyì ne bwenzeji pa Cyòci eci to, ne bàdi bàpoopela bwenzeji bwà Dìyì kùdì bantu pa nkùrusè. Amen.

162 Peetèlò wàkamba, mu Ditùkù dyà Mpenta, mwikale ne nsapì yà Bukalenge; yicìvwa Yesù ùfùminaku ku dimupèèsha ne: “Cyònsò cyùdì wamba apa aci, Mèmè nèncyàmbè Mwàmwa.”

163 Nèku mu Ditùkù dyà Mpenta bàakakonka cìvwbò bafwànyine kwenza bwà kupeta Nyumà Mwìmpè, bwà ne bàvwa bàMusànkidila; batàngila bakwàbò munkacì mwà kwenza maalu àvwàbò bafwànyine kwamba ne mmakùtàkàne awu; bènda bàtetuka, ne bàtùpika, ne badishinda, ne bèza maalu bu ne bàvwa bakwàcìke maalà.

Nèku bòbò, bàmba ne: “Bantu aba mbùle tètè ne mvinyò mupyamùpyà.”

164 Kàdì kùvwa muntu wàkiimana kuulu, dìnà dyèndè Peetèlò, uvwa ne nsapì yà Bukalenge awu, ki yèyè ne: “Bantu aba kí mbakwàcìke maalà to,” Byenzedi 2, “munùdì nwènù nucinka amu, pa kumòna ne tucìdì ànu pa dìbà citèèmà dyà ditùkù. Kàdì eci ncyàkambàbo aci.” Nwamònu’s, mwalùkìle buludì ku Dìyì kàbìdì, bìleeja ne Nyumà ùcìdì ànu Dìyì, ne Dìyì dìcìdì ànu Nyumà, Dìyì dyà Nzambì. “Ne nebyènzekè, bu mwàkambàbo kùdì mupròfètà Yowèlà, Yowèlà 2.38. ‘Ne nebyènzekè ne mu

matùkù à ndekeelu, mùdì Nzambi wàmba, Nèngüicikijè Nyumà Wanyì pa mubidi wónsò.”

¹⁶⁵ Tèelejàayi mupròfetà udi mwimàne pàapa wàwa. Mutàngilaayi nùmonè, kàyì bwòwà to, mwimàne mwaba awu pa musùmbà wa bantu awu, ne ùbàpìisha, ubàfùnda ku cilumbù. Yèyè ne: “Eci ki Mufùndu! Eci ncyàkambàbo kùdì mupròfetà! ‘Nèngüicikijè Nyumà Wanyì pa mubidi wónsò. Bânà bèènù balela bàà balùme ne bàà bakàjì nebàmbè bipròfetà. Pa basadidi Bàànyì balùme ne bakàjì Nèngüicikijè Nyumà Wanyì; ne Nèndeejè bimanyinu muulu mu maulu, ne pa buloba; kapyà, ne makunji à mwìshì, ne mabungi.” ÛCìjaadika ku Dìyì ne, Cìvwa n’Dìyì.

¹⁶⁶ Kàdì kuCìsekabò ne kuCyèlulwilabò, ki kuyabò ku cilumbulwidi. Ne cimenga aci cyàkooshiibwa, ne bàakadyàngana bânà muntu ne mukwèndè. Nènku leelù ewu mbantu batàngalàjìibwe pa buloba bujimà, bileeja ne Nyumà Mwìmpè ùcidi ànu mushààle Dìyì dyà Nzambi, bwà kutwàla Dìyì edi bwà kuDìvwija ne mwoyi.

¹⁶⁷ Yesù Kilistò nguvwa Mupèsonà awu, Muntu, Nzambi. Àlèluuyàh. Yèyè ùvwa dimwèneshiibwa dyà Nzambi. Yèyè ùvwa Nzambi mu mmwènekelu wa mubidi, bwà kuleeja Dìyì dyà Nzambi bwà cikondo aci, bwà kufikisha cikondo aci ku dimòna mulayì wà Nzambi bwà cikondo aci.

¹⁶⁸ Ne Nyumà Mwìmpè ùdi cintu cìmwècìmwè aci leelù ewu. N’Nyumà wa Nzambi pa Dìyì difùnda, ùteeta bwà kupeta muntu bwà kuDìleeja mu cikondo eci, bwà kujaadika ne Yèyè ùdi umweumwe awu makèèlèlè, leelù, too ne kashidi. Yone Munsantu 14.12: “Byenzedi bìNdì ngèza nenùbyènzè pèènù.” “Yesù Kilistò umweumwe awu makèèlèlè, leelù, too ne kashidi.” Nwamònu’s, mwikàle misangu yònsò ànu ùteeta bwà kupeta njila Wendè bwà kuDìleeja.

¹⁶⁹ Ne bòbò kabàvwa mwà kucyènza to. Bantu bàvwa bèèla meeji àbùngì ku màngumba àbò awu, maswa àbò makesè àvwàbo naawù awu, ne bikwàbò, bààbìikila ne “ng’èkèleeziyà yàbò,” pa nànkù kabàvwakù baswè mwà kucitèeleja to. Ki mùdìbo bènza kàbìdì leelù ewu, cintu cìmwècìmwè aci, bàpoopela cyàkàbìdì pa nkùrusè.

¹⁷⁰ Peetèlò, mu Ditùkù dyà Mpenta, wàkamba ne: “Nwènù bàdì basòmbele mu Yelusàlemà, mu Yudaàyà, tèelejàayi mèyì àànyì. Bantu aba kì mbakwàcìke maalà to. Bu nwènù mwà kushààla bapùwe, mèmè nènñùleejè cìdì bwalu.” Nènku ùdi ùtùngunuka ne kubùmvwija.

¹⁷¹ Pàvwà myoyi yàbò mikwàte kapyà, pàkuumvwàbo Cyôci eci, kwambabò ne: “Tudi mwà kwenza cinyì bwà twètù kusùngidiibwa? Cìtùdì mwà kwenza ncinyì bwà kupeta Eci? Tudi batwishìibwe ne dìyì dyèbè ndilèlèlè.”

172 Yèyè ne: “Nyingàlalaayi, muntu ne muntu wa kunùdì, nùbatiijibwè mu Dìna dyà Yesù Kilstò bwà dilekelediibwa dyà mpèkaatù yènù, nènku nenùpetè kupà kwà Nyumà Mwímpè. Bwalu eci cidì bwènù nwènù ne bânà bèènù balela, aba bàdì kule, mu bungi bwònsò bwàbiikilàbò kùdì Mukalenge Nzambì wetù abu. Eci ki cidì cikèngelà bwà kwenzabò. Nyingàlalaayi, nùbatiijibwè mu Dìna dyà Yesù Kilstò.”

173 Nènku, leelù ewu, èkèleeziyà wa Kàtòlikè wa cyena Loomò mmutèèke ne: “Taatu, Mwànà, Nyumà Mwímpè,” bwà kwangata kaaba kààCì. Pamutù pàà Cyòci aci, kòomunyò. “Kupàtula ludìmi ne kwangata cyòstiyà, ne nsaserdòsè wùnwa mvinyò, ne nudì umwe pàmwè.” Kàdì “kòomunyò,” pamutù pàà kwikala Nyumà Mwímpè, mubiikidibwe ne: “Ukàristiyà munsantu.” Ne “Taatu, Mwànà, Nyumà Mwímpè,” dibàtiiza dyà ba-trinitaires, pàdìbi mene kabiyi nànsha byàmba mu Bible to. Dìna dyà Taatu, Mwànà, Nyumà Mwímpè m’Mukalenge Yesù Kilstò. Nènku dibà dyùdì uleeja cyòci aci kùdì lukòngò lùdì lupingàne cyànyimà elu . . .

174 Ànu mwàkamba Peetèlò ne: “Disùngilaayi nwènù biinè ku lukòngò lùdì lutwà cìmpìngà elu.”

175 Paùdì ubàleejaCì, cidìbo bènza ncinyi? Bàdì bàCyèlulwila, bàmba ne: “Ekèleeziyà wetù kèna ùCilongesha mùshindù awu to.” Dìbà adi udi mupìile, udi mupìile bwà dipoopela dyà Yesù Kilstò pa nkùrusè, pa kuumusha bukolè bwà Nzambì mu bantu. Udi upoopela Dìyi diinè adi pa nkùrusè kùdìbo, kàdì udi udipiisha wèwè mwinè ne disangisha dyèbè adi, ubalombola mu butèyi bwà lufù.

176 Ànu mùmvwà ngàmba bwà mwambì awu mu dyàlumingu dishàale edi, ùvwa m’Martin Luther King kuntwaku ne bantu bàà musinga mukolè abu, ùbàlombola buludi mu butèyi bwà lufù. Kaa, bu muntu mwà kwakulaku ne muntu awu’s wè! Mwua mwà kujinga. Ànu bwà disaluka dikesè divwà dijuuke bwà lungenyi lufila bwà cilongelu, nwamònu’s, anyi cikampànda . . . Ndishiilangana kaayi’s? Ekèlekèle, Nzambì wanyi! Pìikala bantu kabàyi ne mwoyi mukumbàne bwà kuswikàkana ne muntu bwà diikala dyèndè, mbapiishibwe ne mbafwè, twamb’eku twamb’eku. Ditunga didi dibàpèèsha bukenji. Kanùcìlwishì to. Kanwenji nàнку to. Ambabi tũng bu muntu kampànda mwà kwamba ne mwena Irlande yònsò anyi muntu kampànda, mwena Allemagne yònsò, anyi muntu mukwàbò kampànda, bikèngela bàkòsolokè? Aci kì ncifwànyinekù kutàcisha beena Kilstò to. Mbafwànyine ànu kutungunuka. Ne muntu awu’s mmwena Kilstò. Bu—bu mwambi, kabivwa bikèngela bwà kulombolaye bantu abu bwà kubwelabò mu dilwishangana ne aci to. Nebàfikishe miliyò ku difwà. Necijuule dibìnduluka dikwàbò. Nènku mbundù be bwà kwenza cyòci aci.

177 Cìntu cìmwècìmwè aci cidì cyènzeka apa, cintu ànu

cimwècimwè aci menemene. Ncyà bushùwà. Nwamònu anyi? Bantu, mùshindù mwinè wùdibi ne bu bóbò ànu mwà kutàngila Bulelèlè ne kumòna cidi Bulelèlè abu's. "Èkèleeziyà wetù kèna wìtabuuja aci to. Tudi ne mùshindù mukwàbò kampànda." Èè, kí mmùshindù mujaalàme to. Kí ncyà dyenza to.

¹⁷⁸ Yèyè wàkamba ne: "Nyingàlalaayi, ne nùbatijiiibwè mu Dìna dyà Yesù Kilistò bwà dilekelediibwa dyà mpèkaatù." Mpindyewu ki mbaswe kucyènza to. Kaa, kàdi cyàkenzàbo ncinyi? Mpindyewu aci's cidi ànu cintu cimwèpelè, pa nkàmà. Netùkùfikèku, pàmwàpa, ne lùkàsà lwònsò.

¹⁷⁹ Mpindyewu dipoopela diibìdi dyà pa nkùrusè, dìbà adi. Muntu yèyè wìtaba "Taatu, Mwàna, ne Nyumà Mwìmpè," twi—twitabàayi pamutù pàà Dìyi, myànzu pamutù pàà Dìna, ùdi wènzela bantu cinyi? Ùdi ùpoopela bwenzeji bwà Dìyi pa nkùrusè kùdi bantu, pàdiye wàmba, ne: "Maakò 16 ùvwa ànu bwà lukòngò *alu* cyanààna."

¹⁸⁰ Kàdi Nzambì kwamba, Yèyè mwinè mwaba awu, Yesù wàkula naabò, wàmba ne: "Ndàayi pa buloba bujimà, nùkàyiishe Èvànjeeliyò kùdi cifukùibwà cyònsò. Ewu udi wìtabuuja ne ùbàtijiiibwa neàsungidiibwè; ewu udi kàyì wìtabuuja neàpiishiibwè. Ne bimanyinu ebi nebìfilè aba..." Too ne penyì? Ditùnga ne ditùnga dyònsò, twitabàayi yònsò, mwakulu wònsò, cisà cyònsò, bukwàbantu bwònsò, Èvànjeeliyò ànu umweumwe awu. "Ne bimanyinu ebi nebìfilè bàdi biitabuuja." Kàdi pàdi muntu ùteeta kuCikòsa kucyùmusha mu Bible, ùdi ùpoopela bwenzeji bwà Èvànjeeliyò pa nkùrusè bwà disangisha adi. Pa nàнку ndi nnùfunda ku cilumbù, mu Dìna dyà Yesù Kilistò! Nudi bapìile bwà dishebeya dyà Mukalenge!

¹⁸¹ Èkèleeziyà uvwa muMukìne. Bwà cinyi? Yèyè ùvwa Nzambì wabò mene. BààkaMukìna, ne kuMuvilabò ne Yèyè kàvwa Maasiyà wabò nànsha. To, mukalenge, kabàvwa baswè Maasiyà wa mùshindù awu to.

¹⁸² Nèuku leelù ewu èkèleeziyà ùdi wènza cintu cimwècimwè aci. Ùdi ùvila Dìyi. Kí mbaDiswe to. Didi dibèngangana ne cidibo balongeshiibwe bwà kwitabuuja ku twitabàayi yàbò ayi.

¹⁸³ Ne Dìyi ki Maasiyà awu. Nudi nwitabuuja nàнку anyi? Èè, dileeja dyà Dìyi dìbà adi ncinyi? Maasiyà mwikàle ùdileeja, udi mwikale Nyumà Mwìmpè munkaci mwètù awu. Ùdi ùdileeja Yèyè mwinè, ùteeta bwà, mwaba wònsò ùdiYe mwà kupeta mwèndù ùdiYe mwà kutàngidilamù awu, ùdi kawùyì mufwimisha ne mwìshi wà twitabàayi ne bikwàbò to, kùdiYe mwà kufidila Bukènkè.

¹⁸⁴ Vùlukàayi ne: "bàkabìika ne bàkalongolola myèndù yàbò," ne kuumusha makàlà ku mikàbà, kàdi dìbà ndimanè kupìta. Nàнку pàdi muntu ùmòna ba-Luthériens aba, ba-Presbytériens, ba-Méthodistes, bàteeta bwà kubwela mu matùkù à ndekeelu aa bwà kupeta Nyumà Mwìmpè, mòna's, s'udi mumanyè ne

kabèèna bàMupeta to. Èè, bàdi mwà kwakula mu myakulu ne kutùpika kuya muulu, kàdi tàngilàayi nùmonè cidi cyènzekà. Kakùyi mpatà to bôbò. . . Ncimanyinu cyà cikondo cyà ne yèyè ùkaadi mumanè kujika. Tukàadi ku nshìikidilu.

¹⁸⁵ Pa díbà kana dyònsò, Èkèleeziyà ùdi—ùdi mwà kuumvwa kadyòmbò aku, kàà ne: “Banda mu Dyulu!” Amen.

¹⁸⁶ Basòmbè ànu menemene mu bulongàme. Nyumà Mwìmpè mwab’ewu munkaci mwà kuvwija Yesù Kilstò bulelèlà mu aba bàdiYe mwà kukwàcilamù mudimu, ùdishindika Yèyè mwinè; mupwèkè, mukwàcishe fòtò Wendè, kucileeja, wèza ne maalu à mamanya àkwatè, àakule bwà cyòci aci, ne cintu cikwàbò cyònsò, ùjaadika ànu menemene cyàkambàYe ne Neénzè. Wèza ànu menemene bintu byàkambàYe ne Neénzè abi, bilondèshile Mifundu. Mpindyewu, kí ntwitabàayi kampànda to, anyi lungènyi lwà muntu kampànda lukwàtaja to, mashi àbúngi, kapyà, ne mwìshì, ne bikwàbò to; kàdi cileeji cyà mu Mifundu cyà Maasiyà. Kùdi ditentula búngi cyanààna, ne batentudi ne tuyaayi tukamòne, ne—ne bikwàbò; kàdi aci cidi ànu cyèza ne Díyi dilelèlà dikenkesè ne mwàDi mwònsò, ncyà bushùwà, dilekela bantu bàà nyumà, bàdi mwà kutàpulula cilelèlà ne cyà mafi abu. Nwamònu anyi?

¹⁸⁷ KuMuvila! Bààkavila Maasiyà wabò awu ne: “Katùvwa baMuswè to.” Nènku cintu cimwècimwè aci ncìdìbo bènza leelù ewu eci, “Èè, byòbì bikèngela bwà mémè kupweka kuntwaku ne kwenza maalu bu musumbà awu, ncyèna muCiswe nànsha kakesè to.” Eyo, díbà adi kwèna Nendè to, nànsha kakesè. Kwàjikì. Nwamònu anyi? Byà mwomùmwè mpindyewu.

¹⁸⁸ Nànsha mùvwàYe mufwànyìkijìibwe mu mùshindù mujaalàme amu, kabàvwa baMuswè to. BààkaMukìna. Cìvwa bwà cinyi? Tudi tubìikila bampaasàtà bààbò ne mmusumbà wà “nyòka.” Yèyè kwamba ne: “Nwènù musumbà wà bimanu bilaaba lupèmbà. Nudi ànu nkità cyanààna. Pambèlù pèènù mpalengeja ne mizàbì ne nshìngù yà nkoolù, kàdi munda mmifùbà yà bantu bafwè.” Yèyè kàakadyànganakù mukana to. Mwena Ngalèlà mukesè menemene ewu, mwàna wa mukoonyi wa mabaya, kàdi Yèyè kàakadyànganakù mukana to. Wàkabàmbila.

¹⁸⁹ “Kanwèdyanganyi meeji,” mmwàkambà Yone, mudyànjididi Wendè, wàmba ne. . . Yèyè’s ke mukwàbò uvwa kàyì ùdyàngana mukana to. Yèyè ne: “Kanùseemenyi apa nwamba munùdi ne Abraham bu taatù wetù to. Nzambì ùdi ne bukolè bwà ku mabwe aa kujjudila Abraham bàna.” Eýowà’s, mukalenge. “Cisuuyi ncitèèka ku muji wà mucì, ne mucì wònsò ùdi kawùyì ùkwàma mamuma to ùdi ùkòshìibwa ne wèdiibwa mu kapyà.” Eýowà’s, mukalenge. Nzambì ùdi mmuumishe maalu, kàyì ùnyunga to ne dísu dyumisha ne Díyi Dyèndè. Eýowà’s, mukalenge.

¹⁹⁰ Mònaayi ne, Yesù, mmujaadikiibwe ku Mifundu's! Nudi nungumvwa anyi? [Disangisha didi dyamba ne: "Amen."—Muf.] Yesù wàkamanyishiibwa kùdì Nzambi, ku Mifundu ne, Yèyè ùvwa Maasiyà. Ncyà bushùwà anyi? Netùfikè ku difundà dyà ku cilumbù dyà Peetèlò, mu tusunsa tukesè emu, ne nenùjandule ne bìvwa nànkù anyi kabìvwa nànkù. Wàkamanyishiibwa ànu menemene ne, Yèyè ùvwa Nzambi mumwènèshiibwe mu Muntu, ùbìikidiibwa ne Mwànà wa Nzambi. Ncyà bushùwà. Nànsha nànkù, Yèyè wàkamanyishiibwa ànu menemene ne wàkashindika Dìyì dilaya ne, Yèyè ùwa Maasiyà. Mòsà wàkamba ne: "Maasiyà ewu, pààlwàYe, Yèyè neikalè mupròfetà," ne bintu byònsò ebi nebyènzekè.

¹⁹¹ Mukàjì mutekète uvwa ne . . .mwimàne ku ciinà cyà máyi awu, ne ngiikàdilù yònsò wa bukooyà uvwayè ùsanganyiibwamù awu, cyòci aci civwa cileeja cinyi? Ne Nzambi mu matùkù à ndekeelu aa mufwànyine kwela nshòòbò.

¹⁹² Vùlukàayi makèèlèlè dilòòlò, ku dibàkà . . .Anyi, musangu mukwàbò wùmvwà muyiishe kaaba aka awu. Ku didyà dyà dibanji, bàakamba mwàkambàbo amu. "Mèmè ndi mwenzè difestò dinène, ne bikwàbò. Nènku bantu bònsò aba, mèmè ndi mubàtùmìne dìyì, kàdi muntu ne muntu ùvwa mufile kabingilà. 'Ncyèna mwà kucyènzakù to, bwalu ncifwànyine kunyangakaja twitabàayi yètù. Ncyèna mwà kulwa to, bwalu ndi ne wanyi. . . Ndi musèle mukàjì; yèyè kàakungiiitabilakù bwà mèmè kulwa to. Ekèlekèle, ndi—ndi musèdiibwe kùdì èkèleeziyà kampànda lwà kwìnshì eku. Màmù wanyi ùvwa Méthodiste, anyi Baptiste, anyi mwena Kàtòlikè, anyi Mwena Mishòò- . . .Ncyèna ànu mwà kutwà Aci nyama ku mikòlò to.'"

¹⁹³ Yèyè kwamba ne: "Nènku kwàkulwa to. Nànkù kwàkulabulakù didya Dyànyì dya dilòòlò to! Kàdi kupàtuka kwaka ne kwenzeja bandumba ne bakàjì bàà masandi, ne bakwàciki bàà maalà, ne cyònsò cidìku aci. Bwelàayi naabò muneemu, ne Mèmè nemboolòlè. Ndi mwenzu didyà Dyànyì dyà dilòòlò, ne babìikidiibwè Bàànyì—Bàànyì. . .Mèèsà Aànyì àkaadi matèèka, ne nekwikalè muntu kampànda muntwamu." Kabààkalwa to. Ùvwa munkaci mwà kupiisha beena Yudà abu.

¹⁹⁴ Kàdi bìshi bwà leelù ewu? "Mèmè—mèmè—mèmè ndi wa mu ba-Presbytériens. Ncyèna—ncyèna mwà kucyènza to. Mèmè ndi Méthodiste, Luthérien. Mèmè ndi unitaire. Mèmè ndi binitaire. Ndi *cikampànda*. Ncyèna mwà kucyènza to. Ncyèna mwà kucyènza to." Kàdi's ki bwalu mbwòbù abu. Kwàkwikalaku dìbà adi to! Ki cyòci aci menemene cyàkambàYe. Èyo.

¹⁹⁵ Mushindikiibwe ànu menemene, Maasiyà. Mushindikiibwe ànu menemene, Dìyì, Dìyì dilaya. Nzambi wàkalaya Dìyì awu, ne civwà Maasiyà mwà kwikalà aci, ki Yèyè ulwàlwa ewu ne wìmana ànu menemene. Yèyè wàkabàmbila ne: "Mpindyewu, mpenyi pàNdi mupangile? Panwikalà kanùyì mwà

kungiitabuuja Mémè bu Muntu to, itàbùùjaayi byenzi bîndi Mémè ngèza; bwalu byôbi ke bintu bîdi byàmba ne Mémè ndi Nganyi. Byôbò abi ke bîdi byàmba ne Mémè ndi Maasiyà. Nwènu kanwèna baswè kungiitabuuja Mémè to, bwalu nudi nutùma meeji ènu kùdi Yözefù kwàka... Ne Nààkalediibwa kuntu kwàka mu kazùbu kakesè aku, ne—ne Tawányi mudiishi ewu mmwenji wa mabaya kuntu kwàka. Nènku—nènku nwenù... ”

¹⁹⁶ PààkabwelàYe mu Ngalèlà amu, bôbò, ne bàvwa ne cyà kwenza... Yèyè kwamba ne: “È, Ewu Muntu Nganyi? Ewu Ewu nganyi? Èè, Muntu ewu, kî nguvwa... Aba kî n’Josè ne bânà Bààbò bônso anyi? Bânà Bààbò bàà bakàji kabèena neetu mwab’ewu anyi? Mamwèndè kèna ùbiiikiibwa ne m’Màriyà, ne Tatwèndè dyèndè Joseph anyi? Nkwèpi, nkwèpi kunùdi bapete Muntu wa mùshindù awu? Mmu cilongelu kaayi mudiyè mufùmìne? Kèna ne kartà kàà buumambàlà to. Yèyè, Kèna ne mikàndà yà dijaadikiibwa naayi to. Nkwèpi kùvwà Mulùmnyànà wa bwena awu... Nkwèpi kunùdi bakapetèle mwinè awu, twamb’eku twamb’eku?”

¹⁹⁷ Ne Bible mmwàmbe ne Yèyè ùvwa—Yèyè wàkapediibwa. Wàkamba ne... Kàvwa mwà kwenza byenzi byábungì byà bukòlè to; nènku Wàkabèèla ànu nyimà e kuumuka kubàshiya. Wàkamba ne: “Mupròfetà ki mmupangila butumbi to ànu mu cisàmbà cyàbò mene, nwamònu’s, mu ditungà dyèndè sungasunga,” tângilàayi, “anyi mu ditungà dyèndè sungasunga.”

¹⁹⁸ S’ki Yèyè awu, mushindikiiibwe ànu menemene, Maasiyà awu. Kabààkamwangata ne musinga kùdi Bèndè mene nànsha. Wàkamba ne: “Ndi mwà kwenza ànu c’Ndi mmòna Taatù munkaci mwà kwenza.” Ki Yèyè kubèèla kadyòmbò bwà kukonka awu ní ùvwa m’Maasiyà.

¹⁹⁹ Nènku tângilàayi mukàji mukesè wa lwendu lubi awu; yèyè wàkacijingulula. Yèyè, kàvwa mupàya mutù tètè ne dimanya to. Mwèndù kawùvwa... Yèyè ùvwa mupiiile bwà mu nsòmbelu wa bukàlàngà, mu bushùwà bwà bwalu. Kakwena muntu uvwa mwà kutwa aci nyama ku mikòlò to. Mikenji yà Nzambi yidi yipiisha cyòci aci. Yèyè ùvwa ànu mupiiile bwà nsòmbelu wa bukàlàngà. Kàdi yèyè...

²⁰⁰ Nwamònu’s, Nzambi kèna ùkulumbulwisha pa webè... cyùdi aci to. Yèyè ùdi ùsànka... Kèna ùlumbulwisha bilondèshile bunène bùdi anyi bukesè bùdi to. Yèyè ùdi ùlumbulwisha mwoyi webè, cyùdi muswè kwikala aci.

²⁰¹ Ne yèyè kàvwa muswè cintu nànsha cìmwè cyà ku bintu abi to. Kàdi pààkapenyà Eci kumpàlà kwèndè, Aci’s ke cìvwàye muswè ncyòci aci. Nànsha byôbi ne yèyè ùvwa cinyi dîbà adi, ùvwa mudilongòlòle bwà kulwa. Nwamònu anyi? Nzambi ùdi ùlumbulwisha mwoyi. Muntu ùdi ùlumbulwisha mmwènekèlu wa pambèlu. Nzambi ùtu ùtàngila mwoyi. Nànsha byôbi ne yèyè ùvwa cinyi; Bukènkè abu bwàkapenya, ne aci cyàkakòsa

bwalu. Wàkakwàta cyà—cyà—cyà—cyà mushinga cyà Mwoyi wà Cyendèlèlè.

²⁰² Kaa, ekèlekèle, mùshindù mwinè wùdì eci cibanjike's wè, bwányi mémè, nwamònu's, bwà kumòna ne kumanya ne m'Bulelèlà. Nè—nèngiimanè ku luseke lwàBù ebu. Nèndekele. . . Nzambi wa mu Dyulu neàjuule panshi, ne dīyī dyānyī nediikalè pa mukàbà wa mēyī wa cikondo cinène cyà Nzambi dyām̀wām̀wa, ne nedīpiishè lukòngò elu mu ditùkù dyà ndekeelu. Bwalu, cidi—cidi pa mukàbà wà mēyī, dībà adi neciikalè pa mukàbà wà mēyī wà Cyendèlèlèlè dībà adi. Ncyà bushùwà. Kupiisha lukòngò lwà bayiishi bàdì ne cimwènekelu cyà difwànà dyà Nzambi, kàdì biikàle bàvila Bukolè bwà Dīyī ne dimwèneshiibwa Dyàdì pàdìDi dimanyishìibwe menemene ne Yèyè ùcidi ànu Yesù Kilistò awu, umweumwe awu makèèlèlà, leelù, too ne kashidi. Ndi mbàfùnda ku cilumbù, ku Dīyī dyà Nzambi.

²⁰³ Nebikengelè nye ku mulayi mukwàbò, ne lùkàsàlùkàsà, bwalu tudi ne tusunsa tutwè ku dikùmi ne tùtaanu cyanààna.

²⁰⁴ “Mwab'awu bôbò—mwab'awu bôbò. . .” Cinyi? Kaa, ekèlekèle! Kàlvariyo! Ki bôbò “kuMupoopela pa nkùrusè,” ciisàtù. BààkaMupoopela pa nkùrusè, kabàyi bājingulula Dīyī dilaya dyà Nzambi dimwèneshiibwe to. Kàdì bàakapoopela Muntu awu pa nkùrusè bwà cinyi? Nudikù ànu mwà kudifwànyikijila anyi? Ngānji ngàalukilè cyānyimà kakesè. Bantu abu mbafwānyine kupoopela Muntu pa nkùrusè mùshindù awu bwà cinyi? Bu Màriyà. . .

²⁰⁵ Mùm̀vwà mubalè mukàndà musangu kampànda, wùdì wùbiikidiibwa ne *Mfùmù wa Nzùbu wa Davidi*. Wàkafundiibwa kùdì Ingraham, Docteur Ingraham. Mukàndà mulenga wà dikèma! Ndinàya, mucinkiibwe ne mmulelèlà citùpà, wà ku yimwè yà ku mifundù yà kale mwangata kùdì mukàji kampànda dīnà dyèndè Adina, ne wendè. . . Wàkaya ku Pàlèstinà, ùfùmina ku—ku Èjiipitù kwàka, ku Caire, ngèèla meeji ne mmùvwàbi, bwà kujikija dilonga dyèndè dyà tulaasà. Ne yèyè ùvwa kuntwaku aku mu cikondo cyà—cyà Kilistò, ne yèyè ùvwa ne cyà kufundila tatwèndè mukàndà. Bivwa bifwānyine kwikala bimpè bu nwènù mwà kuwùpeta ne kuwùbala. Wòwò, ùdì mwìmpè menemene, *Mfùmù wa Nzùbu wa Davidi*. Muntu umweumwe wàkafùnda *Dikunji dyà Kapyà* awu; nènku, mu cyôci aci, Cecil DeMille mmupàtùle *Mikenji Dikùmi*.

²⁰⁶ Mpindyewu tudi tusangana ne, mu mukàndà ewu, Adina ewu wàkafundà kale wàwa. Ki kwambayè, mu ditùkù dyà dipoopediibwa dyà pa nkùrusè, mùvwà Màriyà wa ku Magàdàlà, ewu uvwaYè mwipàte démons mwandamutekète awu, kupatukaye lubilu kumpàla kwà musumbà wa bantu awu, wamba ne: “CidiYe mwènze ncinyi? CidiYe mwènze ncinyi? Ànu kwondopa babèèdì ne kuteeta bwà kusungila aba bàvwa

mu màlòkò! CidìYe mwênze ncinyi pa kuumusha ànu bwîmpè? Muntu kampànda àmbaku's!"

207 Nènku muntu kampànda kubàngulayè mukàji awu, kwamba kumwimansha mu lupangu amu, ki yèyè ne: "Nudikù bafwányine kwitabuuja mukàji wa mukùtakàna awu, pamutu pà baakwidi bèènù anyi?"

208 Ki bwalu mbwòbù abu's. Nwamònu anyi? CyàkenzàYe ncinyi? Yèyè kààkenzakù cintu nànsha cimwè to. BààkaMupoopela pa nkùrusè bwà cinyi? Bwà cinyi? Bwà cinyi? Bwalu kabààkajingulula ne Yèyè ùvwa Nganyi to.

209 Ncintu cìmwècimwè aci leelù ewu. Bayiishi, ne bantu bàà mu matùkù aa, ne balongeshi bèètù bàà cyena leelù aba, mbapàye bantu bikolè bwà kwitabuujabò ne Eci cidì "mupongo, anyi dyabùlù, anyi lubùkù lwà mu meeji, anyi diyelè kampànda, anyi dijìmbu kampànda," too ne pàdi bantu kabàyi bàjingulula ne ki dishindika dyà Dìyi dyà Nzambi bwà ditùkù edi to. Ki bimanyinu byà ditùkù dyà ndekeelu mbyòbi abi.

210 Maèkèleeziyà, wèwè kùyi wa mu bulongolodi bwàbò to, nebàmbè ne: "Aa, èè, aci's ncikwàtakaja ku bukolè. Aci's—aci's ndijìmbu. Èè, tàngilà *Kampànda* ne *Kansanga* kunweku." Kàdi bàlekelè bàjaadika ne Cintu cilelèlè aci cidì ndiyelè musangu nànsha ùmwè. Uh-huh. Bàlekelè musangu cyanààna bàjaadikè ne Ncyà mafi. Kabèèna mwà kucyènza to. Kacya kacitu cimanyike ne ncyà mafi to, ne Kacyadyàkwikala cyà mafi to, bwalu n'Nzambi. Nwamònu anyi? Kàdi mbaswè kufunkuna.

211 Bàdi bèèla meeji ne: "Kaa, èè, bu ne ùvwa mmuntu kampànda mwikàle ne dìnà dinène!" Bwalu nkasumbu kakesè, musumbà mukesè mwenza bu mudyombola, "Èè, twètù's tukàadi biipàte muntu awu mu èkèleeziyà wetù." Nwamònu anyi? "Bòbò, bàvwa ne ciibidilu cyà kulwa kùdi kasumbu kèètù, nwamònu's, kàdi bàakaya ne *cikampànda*, ne bàakasabuka ne *cikansanga*, nènku mpindyewu, nudi numòna's, mbatwè cishindaayi. . . Èè, tàngilàayi cidì bwalu, ne nganyi mwinè awu."

212 Kabyèna ne bwalu to. Bàvwa bafwányine kwamba cintu cìmwècimwè aci bwà Peetèlò, Yakòbò, ne Yone. "Muntu mupangi ne kàyi mulonge kàlaasà to," mwàkambàbo. Kàdi byàkakèngela bwà kumanyabò ne, cintu kampànda cìvwa cyenzèke kubangila ànu pa dîbà adi. Bàvwa ne Yesù. Ki cìvwa cìfila dishiilangana ncyòci aci. Nwamònu anyi?

213 Bàakacyènza bwalu kabàvwa bamanyè ne Yèyè ùvwa Nganyi to. Kabàvwa bamanyè ne dishindika dyà Dìyi dyà Nzambi kadivwa diimàne kwàka mu ditùkù adi to. . . Mpindyewu, divwa mu ditùkù dimwè, ne ciine aci cìvwa cìmpè; mmùvwàci, mu ditùkù kampànda, ànu byà kulama mikenji ayi ne bikwàbò. Kàdi mikenji yimwèyimwè yìvwàku ayi, yìvwàbo bàlama ayi, yàkabàfunkwina cikondo cìvwaYe mufwányine kulwa ne

kwikala Muntu ewu uvwaYè ne cyà kwikala awu. Bàvwa ne *eci* citupà, kàdi kabàyi bangàte *cikwàbò* citupà aci to.

214 Nènku ncintu cimwècimwè aci cìdìbò munkaci mwà kwenza mpindyewu. Bàdi ne èkèleeziyà kampànda, ne bàdi “biitabuuja Yesù Kilistò,” ne bàmba ne bàdi biitabuuja, ne bikwàbò, kàdi biikàle bàvila díbà ditùdì ne mwoyi edi! Biikàle bààluja kàbidì ànu lusùmwinù lwà kale alu ne: muntu ùtu misangu yònsò ànu ùtùmbisha Nzambi bwà citùYe mwenzè, mwindila cìdìYe mufwànyine kwenza, ne, anyi cyènzaye, kàdi ùlèngulula cìdìYe munkaci mwà kwenza, nènku cimupiiisha. Nwamònu anyi? Bàdi bèèla meeji ne: “Nzambi mmulenga wa dikèma. Mùshindù mwine wùdiYe munène’s wè! CyenzàYe: Yèyè neálwe, ne nekwikalè Dyambwibwa, díngà ditùkù, ne neàlukilè Kumbèlu,” kàdi biikàle bavila bimanyinu biinè ne maalu à kukèma mwab’ewu mene mu cikondo cìdì Mifundu yàmba ne Yèyè neikalè munkaci mwà kucyènza. Bàpangila Cintu cyònsò mu kaabujimà!

215 “Mpofò yèyè ùlombola mpofò,” mwàkambà Yesù, “bònsò nebàdishindè mu mùkìdì amu.” Sambilaayi ànu bwà Nzambi kukangulaYè mèsù ètù mu matùkù à ndekeelu aa. Èyo.

216 Mpindyewu, byà mwomùmwe, bàdi bènza cintu cimwècimwè aci leelù ewu. Bàdi bàvila ne bapoopela Nzambi umweumwe awu pa nkùrusè, leelù ewu, mu dipanga kuMumanya. Byà mwomùmwe, pa kuMuvila Yèyè. Ne mu kwenza kwà nànkù, mu kuvila, bintu bìdìbò bènza leelù ewu ebi, kabèèna bàpoopela cyàkàbidì Kilistò pa nkùrusè to, menemene, kàdi bàdi bàpenda Nyumà Mwímpè. Ne mu kwenza kwà cyòci aci, bàdi. Bàdi bàpenda Nyumà Mwímpè munyi? Mmunyi?

217 Mmunyi mwàkaMupendàbo, kale wàwa? Mòna’s, kabàvwa mwà kuMupenda díbà adi to; Yèyè kàvwa mwànji kulwa to. Bààkabiiikila Yesù ne: “Beelèzèbùlà,” kuMubiikilabò ne “Beelèzèbùlà,” bwalu Yèyè ùvwa mwà kumanya mìnsokòntù yà myoyi yàbò, ne bikwàbò. Kwambabò ne: “Ewu n’démon.” Mu ngaakwilù mukwàbò ne: “Mmwena lubùkù. Mùshindù awu ki wùdiYe wènza cyòci eci, nku dyamba dyà lubùkù. Yèyè ùdi ànu démon pa yèyè.” Nwamònu’s, kabàvwa bapetè mupròfetà to munda mwà bìdimu nkàmà yinaayi, kabàcìvwa kàbidì biibidilàngàne naabù to. Nwamònu anyi? Bàvwa bòbò ànu ne mikenji yàbò ayi. Kwambabò ne: “Ewu m’Beelèzèbùlà.”

218 Ne Yesù wàkamba ne: “Nènnùfwilè luse bwà cyòci aci, kàdi piikalà Nyumà Mwímpè mulwè,” nwamònu’s, mpindyewu, “udi wamba díyi dibì bwèndè Yèyè, ne dyòdì kadyàkukufwìdiibwakù luse to.”

219 Vùlukàayi ne, kacyakwikale, ne kacýèna mwà kwikala, nànsha byà munyi, ne luse nànsha lukesè to, paùdi upenda Nzambi, ne ubiiikila Nyumà wa Nzambi, Díyi dyà Nzambi didì munkaci mwà kushindikiibwa kùdi Nyumà . . . Nwamònu’s, Díyi

dìdi dyàmba *nàнку*, Nyumà ùdi munkaci mwà kuDishindika, ne wêwê uCibiikila ne “ncintu cikooyike,” ukaadi musambûke mukàlù udi pankaci pàà luse ne cilumbulwidi, ne kwèna mwà kufwidiibwa luse bwà bwalu abu to.

220 Ki bwà cinyi ndi mfùnda lukòngò elu ku cilumbù, bwà dipiila, bwà dipoopela pa nkùrusè, dipenda dyà Mwànà wa Nzambi mumwènèshiiibwe patòòke mwàkalayiibwàbi kùdi baprófetà bònsò, ne Kilistò Yèyè mwinè, bwà kwikala mu matùkù à ndekeelu; ànu mwàkadibi mu matùkù à Noà, mu matùkù à Sodomà. Dipenda dyà Nzambi! Bwalu, bàdi bàpoopela pa nkùrusè, kùdi bantu, Mwànà wa Nzambi cyàkàbìdi, Dìyì Dyèndè dishindika. Dìyì dibì dimwè bwà Yèyè awu kadyàkufwidiibwakù luse to.

221 Mpindyewu ciwènzà ncinyi díbà adi? Newìmanyine penyì? Mbapiishiiibwe, mbindile ànu díbà dyà ciiji cikolè cyà Nzambi bwà kupòngolokaci. Nebàbàsunsulùle tusùnsùkìla.

222 Banangà dilongesha dyà màngumba menza ku byanza byà bantu ne mèyì maswika kutàmba mùdìbo banange Dìyì dyà Nzambi; lukòngò lwà bantu elu. Kaa! Mvwa—mvwa ànu njinga bwà ngìkalakù ne díbà dyàbùngì bwà cyòci eci. Nwamònu anyì? Lukòngò lwà bantu elu, lukòngò elu lùdi lùtwila dibuulula dyà *Nzambi*. Kàdi tуди twendela mwaba ùvwà bààpostòlò bendèle. Mmwòmò.

“Nzambi,’ mùdi wamba? Èè, bakwàbò bàdi bàmba pààbò *nàнку*.” Nzambi’s ùdi ùCishindika.

223 Yesù wàkamba ne: “Piiikalà—piiikalà—piiikalà byenzedi kabìyì byàkula Bwànyì to, *nàнку* tùngunukà wêwè ànu ne kwamba ne Ndi ncyàmba Mèmè mwinè. Kàdi byenzedi byòbì byàkula, mbìmpè nwènù kwitabuujaayi byenzedi, nwamònu’s, bwalu ki díbà ndyòdi edi.” Yèyè kwamba ne: “Nudi numanyè ne mààlabà díbà nedikenkeshè, anyì kuulu nekwikalè kubwitè bikolè; ku dyulu dìdi dikùnzùbile ne dibwitè, mààlabà nekwikalè kwìmpè.” Yèyè ne: “Nudi mwà kujingulula mmwènèkelu wa maulu; kàdi bimanyinu byà cikondo, kanwèna bamanyè kantu nànsha kàmwè pa byòbì to. Bu ne nuvwà bamanyè Nzambi, nùnkù’s nudi bamanyè ditùkù Dyànyì.”

224 Ki bòbò kwamba ne: “Wêwè udi uDyàngata ne lumù lwàbùngì be; Udi uDìvwija Nzambi.” Ki kuMwelabò ku nkùrusè.

225 Ne Nyumà Mwìmpè, leelù ewu, kí m’Mupersona mwisàtù nànsha. N’Nzambi, Yèyè mwinè, mumwènèshiiibwe mu mubidi wà buntu, ku Mashi à Yesù Kilistò, bwà kujidila mwoyi bwà Wàmòna mwà kuDileeja mu wòwò. Nènku bàdi bàpoopela Dìyì dimwèdimwè dìdi dimwènèshiiibwe adi ku nkùrusè. Nudi bumvwè anyì? Dipoopela dyà pa nkùrusè dyà Kilistò, leelù ewu, mbantu bààbèngà kwitaba Mwànà wa Nzambi mushindika ne mumwènèshiiibwe munkaci mwà bantu abu, ku bintu Byèndè—

Byèndè byàkambàYe ne nebyènzekè mu ditùkù edi ku Dìyì Dyèndè abi. Nwamònu anyi?

226 Mpindyewu, dishindika òmwèdimwè adi, òvwa ne cyà kwikala òmwèdimwè adi, pìikalàbi ne Yéyè udi Mwàna w Nzambì umweumwe awu, bwalu Yéyè mmwambè mu Yone Munsantu 14.12, mpindyewu, ne: “Byenzedi bìNdi ngèza nenùbyènzè pèènu.” Ebèlù 13.8: “Yéyè ùdi umweumwe awu makèèlèlè, leelù, too ne kashidi.” “Nwènu bashààle munda Mwànyi,” Yone 15, “nwènu bashààle munda Mwànyi, ne méyi Àanyi mashààle munda mwènu, lòmbaayi ànu cinùdi baswè aci ne nebànùpèèsheci.” Èyowà’s, mukalenge!

227 Vùlukàayi ne, bàvwa batèndeledi bàà dikèma bàvwa benzè cyòci aci. Kabàvwa bantu bàà pambèlu to. Bàvwa batèndeledi bàà mu ditùkù adi. Nèku ki cidi cicyèza leelù ewu aci’s, mbatèndeledi; dipoopediibwa òmwèdimwè dyà pa nkùrusè, cintu cimwècimwè aci leelù ewu. Lùkàsàlùkàsà . . .

228 “Mwab’awu bòbò kuMupoopela pa nkùrusè,” dîbà adi, dîbà adi. Bushùwà’s. Dîbà adi bàvwa bàbènga Dìyì dyà Nzambì òmwèndèshìibwe patòòke, bìitaba twitabàayi yàbò pamutù pàà Dìyì.

229 Ki cìdìbo bèza leelù ewu aci anyi? Ki cyòci aci menemene, munkaci mwà kwenza cimwècimwè aci leelù ewu. Yéyè ùvwa Dìyì; ne bòbò bàkabènga Dìyì. Aci ke kanungu kàmwè kàndi muswè bwà nwènu kanùpangi kumòna to, nwamònu’s, ncyèna muswè bwà nwènu kupanga kumòna to. Yéyè ùvwa Dìyì, ne pààkaMubèngàbo, bààkabènga Dìyì. Nèku pààkaMubèngàbo, ndekeelu wa byònsò bààkaMupoopela pa nkùrusè. Nèku ki cìdìbo benzè leelù ewu ncyòci aci: bàbènga Dìyì dyà Nzambì, ne bìitàbe twitabàayi yàbò; ne mbapoopèle pa nkùrusè, bantu bitwilàngàne, kumpàlà kwà disangisha dyàbò, cyenzedi cyà Nyumà Mwìmpè. Ne bòbò mbàdi bapiile, ne mèmè ndi mbàfùnda mu Dìna dyà Yesù Kilistò.

230 Bidimu dikumi ne bitaanu ndi muMumòne ùkwàta mudimu mu ditùnga dijimà, kàdi nkacya bàshààla bakwàte ku twitabàayi yàbò. Mbapiile! Bòbò kwangata Dìyì òvwa difwànyine kutwàla èkèleeziyà, èkèleeziyà yònsò nkòong pàmwè, ne kwenza bwàna bwètù bunène bwà busanga munkaci mwà beena Mpenta ne bakwàbò bònsò abu; pamutù pàà kwenza nàku, bààkaCibènga, ne kuCìdyombolabò, kuCyèlulwilabò, ne kuCìtwabò mènà ònsò mpindyewu.

231 Nèku mpindyewu, ku nsangilu wa èkèleeziyà, ku ndongamu wa dyabùlù, ùteeta bwà kubwela ne kwamba ne: “Mpindyewu netùlwe, kusùmbakù ndambù wa Maanyi.” Mbabèngiibwe. Ne bàdi ne . . . Mbapiile bwà dipoopela dyà Yesù Kilistò pa nkùrusè. Nudi ncyàngata pa mishìngà yà Nzambì, anyi yènu mishìngà kayààkukùmbanaku to. Nwamònu anyi?

²³² Bààkabènga Dîyî dyà Nzambî dimwènèshìibwe, bwà twìtabààyi yàbò, ne bàdi munkaci mwà kwenza cintu cìmwècìmwè aci leelù ewu. “Yèyè ùvwa Dîyî,” Yone, Yone Munsantu 1. Ebèlù 13.8 ùdi wàmba ne: “Yèyè ùdi umweumwe awu makèèlèlè, leelù, too ne kashidi.” Mpindyewu bàdi munkaci mwà kuMupoopela kàbìdì pa nkùrusè.

²³³ Nuvwakù bamanyè ne Bible mmwambè ne tudi bafwànyine kwenza nànkù awu anyi? Mbanganyi bàdiku baswè kubala ànu ndambù mukèsè? Nudiku mwà kumpèèsha ndambù mukwàbò wa tusunsa dikumi ne tùtaanu twà cyôci aci anyi? [Disangisha didi dyàmba ne: “Amen.”—Muf.] Èyo. Tùbuululàayi mpindyewu, katanci kakesè cyanààna, “mupoopèdiibwe cyàkàbìdì pa nkùrusè.” Tùyaayi mu Ebèlù, nshapità mwi6, bwà tùbalè ànu kakesè ndambù. Ebèlù 6, bwà kumòna ní tudi “tupoopèla cyàkàbìdì Mwànà wa Nzambî pa nkùrusè,” bwà tùmonebì ní cìdì mwà kwenzeka.

Wèwè udi wamba ne: “Kwèna mwà kuMupoopela pa nkùrusè musangu mwibìdì to.”

²³⁴ Netùjandulè ne tudi mwà kuMupoopela anyi katwèna mwà kuMupoopela to. Dîyî dyà Nzambî ndilelèlè. Ncyà bushùwà anyi? Ng’Ebèlù 6.1.

Ki bwà cinyi tùshiyà maalu à ku cibangidilu à dilongesha dyà Kilistò, tùyaayi kumpàla too ne ku bupwàngàne; kî nku ditèèkà dyà cishìmikidi cyà kanyinganyinga ne byenzedi bifwè, ne diitabuwja kùdì Nzambì to,

Ne byà dilongesha dyà dibàtiiza, . . . ditentekelangana dyà byanza, ne dyà dibùikà dyà bafwè, ne dyà cìlumbulwidì cyà cyendèlèlè.

. . . cyôci eci nciwìkala mwà kwenzà, bu Nzambì mwà kwanyisha.

²³⁵ Nwamònu’s, Pòlò mmuswè kumanya ne bintu ebi mwab’ewu kakùyì mpatà to mbyà musinga munène; mabàtiiza, ditentekelangana dyà byanza, dibùikà dyà ku lufù, Dilwa diibìdì. Bintu byònsò ebi mbyà Cyendèlèlè. Kakùyì mpatà to m’Bulelèlè.

²³⁶ Mpindyewu mònaayi:

Bwalu kabyèna mwà kwenzekakù to . . .

Nwacibalaayi pamwè naanyi, mvensà umwèpelè ewu, ndi muswè nùcibalè pàmwè naanyi mpindyewu, mvensà mwi4:

Bwalu kabyèna mwà kwenzekakù to bwà aba bàkaavwà bamana kukenkeshila, ne balabùle dipà dyà ku dyulu, ne bàakavwijiibwa baabanyanganyi bàà Nyumà Mwìmpè,

Ne balabùle dîyi dîmpè dyà Nzambì, ne bukolè bwà buloba bùcìlwalwà,

Bòbò badishinde, bwà kubààlujulula cyàkàbìdì ku kanyinganyinga; pa kumòna ne bàdì bàpoopela cyàkàbìdì bwàbò bòbò Mwânà wa Nzambì pa nkùrusè, ne bàmufrwisha bundù bwà patòòke.

237 Mpindyewu, aci n'dîyi dyànyì mèmè, anyi Dyèndè? “Muntu udi ufika ku dimanya awu.” Vùlukàayi ne, bòbò kabàvwakù baMupete to. Bàvwa beena kwitabuuja bàà ku mikàlù. “Paanyimà pàà twètù bamanè kupeta dimanya dyà Dîyi dyà Nzambì,” udi udìpetela ku dimanya kampànda, ku dibala ne kuDìmòna, “ne pashìishe kuDìbènga, dìbà adi, wèwè, kabyenàku mwa kwenzeka ne wèwè usungidiibwakù to.” Nuvwakù babale aci mpindyewu anyi? Nwamònu's: “Bapete dimanya dyà Bulelèlè,” nudi ànu, bùmfvwè, kààkaBùpetakù nànsha.

238 Mbyenze ànu bu beena kwitabuuja bààkapàtuka abu. Ncimfwànyì menemene cyà lwendu. Eci, ciisàtù eci, cimwangi ciisàtù eci, cidi ànu cifwànyikijilu cyà bikwàbò abi. Tàngilàayi, tàngilàayi paanyimà pààpa. Lekelàayi nnùleejèku cintu kampànda mpindyewu, katanci kakesè cyanààna. Numfwilaayikù luse bwà cyakwidi aci. Tàngilàayi.

239 Izalèlèlè wàkapatula bantu dikumi ne bàbìdì, umwe mu cifuku cyònsò, mutù wà dīgumba, ne kuya naabò ku lusongo lwà mikàlù, yà buloba bulaya, ne kubàleeja bintu bîmpè bicìvwà bìlwa, bìvwàbo naabi. Kì kwalukilabò, bàdyàbakeena, ne: “Katùvwà bakùmbàne bwà kucyènza to.”

240 Kàdì kùvwà bàbìdì pa dikumi ne bàbìdì abu, Yoshùwà ne Kaalèbà, kwambabo ne bààkatàngila Dîyi. “Nzambì mmwambe ne mbwètù twètù, ne twètù tudi batambe ne bukolè bwà kubùkwàta.” Ncyà bushùwà anyi?

241 Cìvwà ncinyì ciinè aci? Beena kwitabuuja bàà ku mikàlù. Nwamònu's, ncyà bushùwà ne bòbò mbalediibwe mu èkèleeziyà. Bàvwa bamfùmù bàà bantu. Bàvwa bèèpiskòpò, mutùdì mwà kwamba, bàvwà bènda bàpweka batàngile kùvwà Dîyi dyà Nzambì dileejiiibwe ne m'Bulelèlè aku. “Kì buloba mbwòbù abu's!” Kacyà kabàvwà bânji kudyatamù to. Kabàvwà bamanyè ne bùvwakù to. Kàdì bààkalwa bwà kumòna ne bùvwakù. “Kì bwòbù abu's!” Nènku Kaalèbà ne Yoshùwà kuyabò kuntwaku, e kutwàlabò ci—ci—cisùmbù cyà tumuma twà mvinyò ne kubàlekelabò bàdya ndambù wà ku twòtù. Ne bààkalabula byà mu buloba bwìmpè, ne pashìishe kwalukilabò bàmba ne: “Katwèna mwà kucyènza to. Nwamònu anyi? Katwèna ànu mwà kucyènza to.”

242 Musùmbà wùmfwèwùmfwè awu ngwòwò ewu, mu cikondo cyà Yesù Kìlistò. “Laabi, tudi bamanyè ne Wèwè udi mulongeshi mufùme kùdì Nzambì.” Nwamònu anyi? Mukàlu! “Tudi

bamanyè ne Wèwè udi mulongeshi mufùme kùdì Nzambì. Muntu nànsha umwe kí mmufwànyine kwenza bintu byùdi Wèwè wenza ebi to. Tudi tujungulula ne bikèngela bwà Nzambì ikalekù.” Kabààkaciitaba bwà cinyi? Kabààkacyàngata bwà cinyi? Mukàlu! Mukàlu!

243 S’ki bôbò aba mu cimwangì ciisâtù eci; cimanyinu cimwècimwè aci, dimwèneshiibwa dimwèdimwè adi, Kilistò umweumwe awu, Nyumà Mwimpè umweumwe awu, byenzedi bimwèbimwè, Nzambì umweumwe, Mukenji ùmwèùmwè, kàdi kabàyi mwà kuWàngata to. Mbafwànyine kulekela kartà kààbò kàà buumambàlà aku’s. Ncinyi aci’s? “Mbapete dimanya dyà Bulelèlà.” Bààkatàngila ne kumòna ne m’Bulelèlà bwà kabùyì kwela mpatà to. Kabèèna mwà kuBùvila to. Bikàndàkàndà bìdi ne cyà kujaadika ne bôbò mbaBùmòne. Bimfwànyì, bibèjibeji, cileeji, dibìikà dyà bafwè, mèyi à bangàngàbukà bàà babèèdi, bikèngela bãmbè ne n’Yèyè. Ne mèyi madyànjila kwamba, nànsha dìmwè dyà ku òwò kí ndyanji kuya panshi munda mwà bidimu, dyònsò dyà ku òwò ndyùle ànu mu katòba menemene, kabèèna mwà kwamba ne kí n’Nzambì to. Kàdi kabèèna mwà kuCìtabakù to.

244 Musumbà wa bambi bàà mu Chicago awu, nkàmà yisâtù ne byà mu njila byàbò, bàvwa mwà kupweka bwà kubàtiiiibwa mu Dìna dyà Yesù Kilistò. Bàdi penyì? Mushinga mmutàmbe bunène. Kabèèna mwà kucyènza to. Ncinyi aci’s? Bible mmwambè ne, pàdìbo bènza nànkù apu, cidìbo bènza ncinyi? Bàdi bàditàpulula pankaci pàà luse ne cilumbulwidi. “Bwalu mbikolè bwà aba bàkaavwà bamana kukenkeshila musangu kampànda,” bafikisha ku diCìtàngila, “ne biikàle ne dimanya dyà Bulelèlà, ne balabùle Dìyi dimpè dyà Nzambì, bôbò buumùkeKù, mwaba ùvwabo bafwànyine kwikala badìvwijulula bapyabàpyà bôbò biine, bàmba ne: ‘Èè, mpindyewu, nèngiikalè mwà kucyènza, èyowà’s, . . .’”

245 Nwènù ba-Presbytériens, nwènù ba-Méthodistes, ne ba-Baptistes, ne ba-Luthériens, ne cintàkanyì cyà Beena Kantuku-byanza bàà Èvànjeeliyò mu Kaabujimà eci, bàmba mùdìbo “bàbwela,” mbàbènge Mukenji. Èkèleeziyà wenù awu neàbèngè. Nèkwikalè bantu-nkààya bààbwelàmù, bushùwà. Kàdi, kí ng’èkèleeziyà to; bikèngela ùpatukè mu èkèleeziyà, bwà kuMupeta. Nwamònu anyi? Ncyà bushùwà. Bantu-nkààya bàdi ànu bimpè.

246 Kàdi panùdi nwela meeji ne èkèleeziyà wa ba-Presbytériens neàpetè Nyumà Mwimpè, ne bònsò bwàbò bàtèèka mikàndà yàbò panshi, nènku, kanwèdikù awu meeji to. Nènku nudi nwela meeji ne nwènù ba-Méthodistes nenùcyènzè anyi? Kanwàdyàkucyènzakù to. Nudikù nwela meeji ne nwènù ba-Trinitaires nenùpetè Dìna dyà Yesù Kilistò ne nùbatiiiibwè muntu ne muntu wa kunùdi mu. . . Kanwàdyàkucyènzakù to. Kanwàdyàkucyènzakù to. Kàdi bantu-nkààya nèbàpatukè ne

nebàcyènzè, ncyà bushùwà, ne cyôci aci ki cimanyinu cyà Dilwa Dyèndè. Kàdi èkèleeziyà miine yidi mimòne Bulelèlà ayi, ne miBùbènge mu nsangilu yàyi ayi, “kabyèna mwà kwenzekakù to.”

²⁴⁷ Dìbà adi, mbapiile bwà dipoopela dyà Yesù Kilistò pa nkùrusè. Ne ndi mbàfùnda ku Dìyì dyà Nzambì ne, Nzambì ùdi ne... “Udi ubàfùnda bishi, Mwanèètù Branham?” Ndi mbàfùnda ne, Nzambì mmuDimanyishe patòke mu Dìyì Dyèndè, mu matùkù à ndekeelu, ne muDyenzèje bwà kumanya ne Yèyè ùcidi ànu umweumwe awu makèèlèlà, leelù, too ne kashidi, kàdi mbaDibenge boosha ne munu mwìkù. Ne nudi bapiile bwà dipoopela dyà Yesù Kilistò pa nkùrusè, mu kupenda kwà Nyumà Mwìmpè. Ncyà bushùwà.

²⁴⁸ Tudi tuya neenù mu Ebèlù 10, cyàkàbìdi, mwómò amu mmùdici cìtwàmbila cyàkàbìdi mu Mifùndu, kabìyì ànu ne “kabyèna mwà kwenzekakù to,” kàdi kwèna mwà kucyènza to kashidi. Cidi cikutàpulula ne Nzambì, Cyèndèlèlè. Kwèna mwà kubwela cyàkàbìdi mu Bwikadi bwà Nzambì to, paùdi udyombola Nyumà Mwìmpè ne uMwelulwila.

²⁴⁹ Mpindyewu, nwamònu’s, “balabùle Dìyì.” Nwamònu’s, beena kwitabuuja bàà ku mikàlu!

“Kaa, nwènù nudi nwamba ne balùmyànà abu kabàvwa beena kwitabuuja anyi?”

²⁵⁰ Bàvwa beena kwitabuuija, anyi beena kwitabuuja bàà ku mishikù, kàdi pàakafikàbi ku Dìyì... Bàvwa Izàlèlèlà. Bààkapàtuka mwinshì mwà mashi. Bààkapàtuka mwinshì mwà bimanyinu byà Mòsà. Bààkamòna bimanyinu abi bikwàta mudimu.

Nzambì kwambaYè ne: “Nènye neenù dyàmwàmwa.”

²⁵¹ Nènku pàakafikàbi ànu ku díyì dikùlù dyà Dìyì dilaya òvwà ne cyà kulwa adi, cìvwàbo bafwànyine kwamba ncinyi? “Kaa, katwèna mwà kucyènza to.” Nwamònu anyi?

²⁵² Kàdi’s ki bóbò bàdi bààlukila aba, ne tumuma twà mvinyò ne bikwàbò byònsò, bwà kujaadika ne buloba abu bùvwa bwà cyà bushùwà. Dìyì dyà Nzambì ndilelèlà. Nzambì wàkamba ne: “Ndi nnùpèeshabù.”

²⁵³ Kàdi maalù àvwà ènzekà awu, “Ekèlekèle,” mwàkambabò, “twètù tudi tumwèka ànu bu tupasu, ku luseke lwàbò. Katwèna mwà kucyènza to, nànsha byà munyì.”

²⁵⁴ Kùkaadi ndambù wa bidimu pàvwà cipusu cyà kale eci ciimàne mwaba ewu bu tabernacle, Muntu kampànda kubwelayè, ne kupàtukayè kuntu kwàkà e kuyiikilayè naanyi, wamba ne: “Billy, neuyiishe makunji ànaayi, òmwè dyà ku matùkù àdi panshi aa, ne Mayiisha à mùshindù awu.”

²⁵⁵ Mèmè ne: “Nèngìikalè nyiisha makunji ànaayi, bwalu Nzambì’s ùdi ne bukolè bwà kujuudila Abraham bàna ku

makunji aa.” Èyowà’s, mukalenge. M’Bulelèlà. Mémè ne: “Wèwè ne cintu kampànda cyùdi mwà kuCidyùla naaci, tùpèesheci.” Mbanange ànu kupeta tubingilà, kàdi pàkaadibi bìkèngela kucileeja, apu’s mbishìilàngàne. Èyowà, ke cidì cyènza dishìilangana ncyòci aci. Èyo.

²⁵⁶ Èyowà, ne twitabàayi yàbò bàdi bàMupoopela cyàkàbìdi pa nkùrusè. Mpindyewu Èbèlù nshapità mwi6, nènku tudi tuyà kumpàla. Nènku tuvwa ànu mwà kutùngunuka ne kubala too ne kwinshi, tutùngunuka too ne apa. Tudi ne dîbà dyàbùngì. Ndi mwenze cimanyinu ku Mufundu mwaba ewu wikalàci, Èbèlù nshapità mwi6. Ànu, ngèèla meeji ne, kumwàngata wònsò. “Kabyenà mwà kwenzeka to bwà aba bàkaavwà bamana kukenkeshila, bavwijìlbwe baabanyanganyì bàà Nyumà Mwímpè...” Katwèna ne dîbà dyà kuya kule menemene to, bwalu ndi ne Mufundu mukwàbò wùndì muswè bwà nwènù kubala ànu mu katanii kakesè emu. Mònaayi eci: “Bàdi bàpoopela cyàkàbìdi bwàbò bóbò biinè Mwànà wa Nzambi pa nkùrusè.” Cyàkenzàbo ncinyi? Ncinyi? Bamanè kulabula, ne bamanyè ne Cidì m’Bulelèlà, ne pashiishe kukùdimuka kàdi kuCivìla. Ncìfwànyine kwenza cinyi? “Kabyèna mwà kwenzekakù to...”

²⁵⁷ Pa nàнку aci ncìdi ditùnga edi dyènzè. Ke cidì bantu aba bènzè’s. Ke cyòci aci cidì èkèleeziyà eyi myènzè. MbaCìbènge, ne mbapoopèle Mukenji pa nkùrusè. Mbapoopèle Bulelèlà pa nkùrusè, bwà bantu. Mmunyì mùdìbo bafwànyine kwenzela Yesù? BààkaMufwisha bundù, kuMuvùùlabò bilàmbà Byèndè, kuMukùdikabò ku nkùrusè ne kuMupoopelabò ne misonso kuulu aku, Mfùmù wa Mwoyi awu. Cintu cimwècimwè aci ncìdìbo bènzè leelù ewu ne twitabàayi yàbò ayi! Mbènzè cintu cimwècimwè aci. Mbakòpòle bintu, mbavùùle bwì—bwímpè ne divwàlà dyà Èvànjeeliyò, mu kuteeta kuCitèeka mwaba kampànda mukwàbò, ne kuMukùdika ku nkùrusè. Kaa, èkèlekèle! Bwà cinyi?

²⁵⁸ “Mwab’awu bóbò—mwab’awu bóbò kupoopela pa nkùrusè,” mpindyewu dîyi dyamba dyà ndekeelu: “Yèyè,” Yèyè, Muntu wa mushinga mukolè mutàmbe ewu. Bààkacyènza bwà cinyi? Kabàavwa baMumanyè to. Bwà cinyi bàdi munkaci mwà kucyènza leelù ewu? Kî mbamanyè ne eci m’Bulelèlà to. Bàdi—bàdi tumàmà ne mpofò ku Bwòbù abu. Kî mbaBùmanyè to. Ki kabingilà nkòkò aku. Twitabàayi yàbò ne bilèlè mbibàtùme kule ne Dîyi dyà Nzambi.

²⁵⁹ Mpindyewu kunùdi nwènù bàdi apa, ànu bwà kujikija mpindyewu, mpèèshaayi macì. Nwamònu anyi? Ndi mumanyè ne luuyà lùdikù. Ndi mùmvwè luuyà, mémè pàanyi.

²⁶⁰ Kàdi, kaa, mwanèètù, Dîyi edi dìdi Mwoyi bu wèwè mwà kushààla mukwàteKù. Tàngilàayi, Kî ncintu kampànda citùdi twamba to, cidì mwà kwenzeka apa ne paanyimà;

Ncintu kampànda cikaadi neetù kaaba aka ne munkaci mwà kwenzeka mpindyewu. Kí ncintu kampànda cyàlwà kwenzeka to; cintu kampànda cikaadiku. Katwèna tufila bujaadiki ne: “Tudi bamanye cidìYe mwénzè; tudi bamanyè cyènzàYe,” to kàdi mpindyewu tudi twamba cidìYe munkaci mwà kwenza. Nwamònu anyi? Kí dyètù dībà ndyôdi edi.

²⁶¹ Bidi mwà kwenzeka ne katwìkadi ne mwoyi too ne ku dimònà dyà Dyambwibwa to. Ndi mwà kufwà leelù ewu; udi mwà kufwà leelù ewu. Ncyèna mumanyè to. Kàdi Dyambwibwa dilwalwa. Aci’s—aci’s, pààlwàdi, netwìkalèku, kanùditàcishi to; uh-huh, kí mwìkalà bakwàbò bònsò mu bikondo byàkapità, bàvwà baciitàbuuje ne bacindile. Bààkendela mu Bukènkè bwà ditùkù dyàbò.

²⁶² Nènkù ki Bukènkè mbwòbù ebu, Yesù Kìlistò umweumwe awu makèlèlè, leelù, too ne kashidi. Lekèlaayi twìtabàayi yènù ne nwìtabuujaayi Dìyì edi. *Eci* ke Bulelèlè. Dìyì didi Bulelèlè. Yesù wàkamba ne: “Dìyì Dyànyì didi Nyumà, Dìyì Dyànyì didi Mwoyi.” Mmunyì muwàpetà Mwoyi paùdi ubènga Mwoyi? Mmunyì muwàngatà dìyì diswìka, didi lufù adi, ne Dìyì dyà Mwoyi? Kudyombola Dìyì dyà Mwoyi, bwà kwangata lufù, mmunyì muwìtaba bibìdi ebi musangu ùmwèpelè? Kwenàku mwà kucyènza to. “Dìyì dyà muntu yònsò diikalè mashimi, dìyì ne dìyì diswìka dyònsò mmashimi.” Dìyì dyà Nzambì didi Bulelèlè.

²⁶³ Ndi ngèlè muntu kanà yònsò kadyòmbò bwà kundeejayè, muntu kanà yònsò . . . Ne ndi mumanyè ne mukàbà wà mèyi ewu wùdi wùya pa buloba bujimà. Muntu kanà yònsò, mwèpiskòpò kanà yònsò ewu, wìkala mwa kulwa ku bìrò byànyì, anyì kumpàla kwà disangisha edi, ne kufunkuna munu mu mwaba kampànda wùkaadiku muntu mubàtìjìibwe mu Dìnà dyà “Taàtù, Mwànà, Nyumà Mwìmpè,” mu Dìpungìla Dìpyadìpyà. Nènnùleejè mwaba wùkaadiku muntu yònsò mubàtìjìibwe . . . Ne aba bàkaavwà babàtìjìibwe bishìilàngàne, kukèngelabì bwà kulwabo ne kubàtìjìibwa cyàkàbìdi, bwà kupeta Nyumà Mwìmpè.

²⁶⁴ Nenwenze cinyì bwà bwalu abu? Nenùshaalè pambèlu apu mu twìtabàayi yènù ayi anyi? Nenùshaalè pambèlu apu mu mèyi ènù maswìka ne kufwà anyi? Nudi bapìile! Ne byanza byà lwonji, nudi bangàte Mfùmù wa Mwoyi, Dìyì dyà Mwoyi adi, ne baDìpoopele pa nkùrusè kùdi bantu.

²⁶⁵ Mpindyewu bààkenza cinyì? Kabàvwà bacimanyè to. Leelù ewu bantu bàdi bènda mu dipanga. Kí mbamanyè ne aci m’Bulelèlè to. Bàdi bèlè meeji ne nkasumbu kàà mùshìndù kampànda. Kabèèna bùumbula mu ndòndò bàpweka bikolè bwà kubwela mu Nyumà wa dibuulula to. Kabèèna bàsambila bikùmbàne to. Kabèèna bàsòka Nzambì bikùmbàne to.

266 Bàdi bàCyàngata ànu mu mùshindù mupepèle ne: “Kaa, èè, ndi ngiitabuuja ne kùdi Nzambi kampànda. Bushùwà’s!” Dyabùlù’s ùtu wìtabuuja cintu cìmwècìmwè aci. Dyabùlù ùtu ùciitabuuja kupìta mùdì bângà bantu bàlàka mukana bàmba ne bàdi biitabuuja amu. Dyabùlù ùdi ùciitabuuja ne ùzakala. Bantu bàdi ànu bàciitabuuja ne bàtùngunuka. Kàdi dyabùlù ùdi ùzakala, mumanyè ne Cilumbulwidi cyèndè cìlwalwa, ne bantu bàdi bàciitabuuja kàdi kabàyi bàtèya ntèmà nànsha mikesè ku cilumbulwidi cidi cìlwa to.

267 Bapiile bwà diMupoopela dyà pa nkùrusè! Bushùwà’s! Ndi mfùnda lukòngò elu ku cilumbu, mubàsangàne bapiile, ku Dìyi dimwèdimwè dyà kabàsanganà bapiile ku cibangidilu adi. Ncyà bushùwà. Yesù wàkamba ne: “Nganyi udi mwà kuMpiisha?” Yèyè ùvwa Dìyi divwijiiibwe mubidi. Ne leelù ewu Dìyi dimwèdimwè adi ndivwijiiibwe mubidi.

268 Peetèlò wàkamba mu difùnda dyà ku cilumbù cyèndè, mu Byenzedi. Twanjàayi ànu kucìbala. Peetèlò, pàakamònaye cyòci eci cyènzeka, cìvwàbo benzè aci, Nyumà. . . Tàngilàayi, Peetèlò ùvwa wàkwila Kilistò, cìvwàbo benzè aci. Mémè ndi ntwà nyama ku mikòlò cidi Èvànjeeliyò ayi aci. Mémè. . . Peetèlò nguwà ùbàfùnda ku cilumbù bwà kushebeya Muntu awu, Kilistò, Uvwa Dìyi awu. Ndi mfùnda lukòngò elu bwà kuteeta kushipa Dìyi didi dimwènèshiiibwe mu bantu edi. Tàngilàayi cyàkambà Peetèlò. Ciiji cyèndè cyà muntu mwakàne aci’s cìvwa ne cyà kwikala cibànde ànu menemene. Mutèlèlèjaayi mu Byenzedi nshapità mwi2 emu, ne kubangila ku mvensà wa 22.

Nwènu beena Izàlèlèlè, tèèlejàayi mèyi aa; Yesù wa mu Nazàlèlètà, mwanishiibwe, muntu mujaadikiibwe kùdi Nzambi munkaci mwènu ku bishimà, . . . bimanyinu, bivwà Nzambi mwenzèle kùdiye munkaci bu . . . mwènu, ànu bu munùdi nwènu pèènu bamanyè:

269 Yoyòyò! Nudikù nudifwànyikijila mwàkadyūmvwàbo’s! Tèèlejàayi aci.

Nwènu beena Izàlèlèlè, mfùmù, nwènu beena èkèleeziyà, nwènu bantu bàà cijila, nwènu baakwidi, nwènu bàdi ne cyà kwikala bantu bàà Nzambi abu, tèèlejàayi mèyi aa; Yesù wa mu Nazàlèlètà wàkanyishiibwa kùdi Nzambi munkaci mwènu . . .

270 Mpindyewu ndi nzwambila nwènu balombodi bàà èkèleeziyà, ne nwènu cisàmbà. Yesù wa mu Nazàlèlètà, Nyumà Mwímpè, Yèyè ùdi kaaba aka mu Mupèsonà wa Nyumà Mwímpè, uvwa Mwoyi wùvwà munda Mwèndè awu. Yèyè ùdi kaaba aka ùkwàcila mudimu mu bantu, ne ùdileeja Yèyè mwine ku bimanyinu ne maalu à kukèma bìdiYe wènza. Kàdi’s ki byòbì ebi bilembeleja ku bimanu, dimanyishiibwa dyà maalu à mamanya. Ne bantu mbasòmbe mwab’ewu, bàvwà bafwè, biikàle ne mwoyi leelù ewu; ne badyà kùdi kànsèrè, bàdi

basàngàle leelù ewu; bampofò, bàdi munkaci mwà kumòna leelù ewu; ne bikalàbà, bidì munkaci mwà kwenda leelù ewu ebi. Yèyè ùdi Yesù wa mu Nazàlèètà.

Yèyè, mufidiùbwe ku dipàngadika ne didyànjlila-kumanya dyà Nzambi, mudyànjlila kulongolola bwà mudimu Wèndè, nudi bangàte, ne ku byanza byà benzàvi nudi . . . bashipà

271 Aci—aci ndifùndà dyà ku cilumbù anyi? Yèyè ùdi ùfùnda cinyi? Nsangilu wa Tubàdi twà beena Yudà awu.

272 Nèngu ndi munkaci mwà kufùnda, mu dindà emu, nsangilu wa maèkèleeziyà. Ndi mfùnda beena Mpenta. Ndi mfùnda ba-Presbytériens, ba-Baptistes, ne dngumba dyònsò pa buloba. Ku lukùkà lwà beena lwonji, lwà budìsu nwènu nudi bangàte Dìyì dyà Mwoyi ne baDìpoopèle pa nkùrusè kumpàlà kwà bantu, ne baDìpenda, ne baDìbiikila ne “ndikolesha dyà maalu,” udi Nzambi mubiishe munkaci mwètù bwà kujaadika ne Yèyè ùdi umweumwe awu makèèlèlè, leelù, too ne kashidi. Ndi mfùnda lukòngo elu ku cilumbù!

273 Nzambi mmuDiijaadike nkààyèndè ne ùdi ne Mwoyi. Nzambi wàjaadiki ne Eci n’Dìyì Dyèndè. Cyùdi naaci ncinyi piikalàci kaciyi ànu musùmbà wà dìyì diswika ne twitabàayi! Nudi mwà kuleeja Nzambi udi ne mwoyi penyì? Bwalu nwàbèngi Dìyì dyà Mwoyi divwà mwà kwikala dìnùpèèshe bintu ebi. Èyowà’s, mukalenge! Kaa, ndìbà kaayi ditùdì ne mwoyi mpindyewu edi’s wè. Yoyóyò! Byà mwomùmwè! Kaa, mèmè’s ndi mbiikila . . .

Peetèlò wàkamba ne . . . nudi bangàte, ku byanza byà bantu babì ne nudi bapoopèle pa nkùrusè ne bashipè:

Ewu uvwa Nzambi. . . mubiishe ku bafwè, mumanè kukòsa bìsaamà byà lufù: bwalu kabìvwa mwà kwenzeka to bwà Yèyè kushààla mulamùbwe kùdilu to.

274 Ne ku twitabàayi yènu, ne malongolodi ènu awu, ne màngumba ènu awu, ne cimwènekelu cyènu cyà difwànà dyà Nzambi, ànu munkaci mwà kwakula. Mmwènekelu yènu yà difwànà dyà Nzambi ayi, nudi bavile bukolè bwà dibìika Dyèndè dyà ku lufù.

275 Kàdi díbà dyàfikì, matùkù à ndekeelu ngwòwò aa kaaba aka, pàakalayà Nzambi, bilondèshìle Maalàki 4, ne Yèyè neàjuulè mu matùkù à ndekeelu, “ne ùvwa ne cyà kwaluja myoyi yà bantu buludì ku mabènesha à ku muji à Diitabuuja dyà Mpenta à baataatù awu.” Kàdi kanwèna mwà kucivila to, ne kanwèna mwà kucikàndameena to.

276 Mpindyewu ndi nnupiissha, ne nudi bapiile, ne nnwela kadyòmbò, ne nnufùnda ku cilumbù kumpàlà kwà Nzambi, bwà ne ne byanza bibi, byà budìsu, byà cyena màngumba nudi bapoopèle Dìyì dyà Nzambi pa nkùrusè kumpàlà kwà bantu.

Ne ndi nubiikila ne bapiile ne bakumbanyiine Cilumbulwidi. Amen. Eyowà's, mukalenge!

²⁷⁷ Ndi mbiikila cintu cimwècimwè cyàkenzà Peetèlò aci. Yèyè ngwàkabiikila kanyinganyinga kàà lukongo alu. Ndi mbiikila kanyinganyinga bwà lukongo elu, kanyinganyinga bwà kwalukila kùdi Nzambi, ne kwalukila ku Bulelèlè bwà ku cibangidilu bwà Dìyi. Alùkilaayi ku Diitabuuja dyà baataatù bèètù. Alùkilaayi ku Nyumà Mwimpè, bwalu Nzambi kèna mwà kuDishintulula to.

²⁷⁸ Pàakambà Nzambi ne: “Bimanyinu ebi nebifilè aba bàdi biitabuuja,” Bikèngela àshaale ne cyòci aci too ne mu Cyendèlèlè cijimà. N'Dìyi Dyèndè.

²⁷⁹ Paùdi wamba ne: “Labùlàngànaayi ku cyanza, anyi angàtaayi mèèsà à Mukalenge,” anyi cintu kampànda cyà mwshindù awu, anyi cikampànda pa twitabàayi awu, anyi cintu kampànda pa mmwènenu awu; ne muntu kanà yònsò ewu, mukwàciki wa maalà kanà yònsò ewu, mwena bupidyà kanà yònsò ewu's ùdi mwà kucyènza. Mutentudi kanà yònsò ewu, ndumbà kanà yònsò—ndumbà kanà yònsò ewu's ùdi mwà kwenza nàнку. Nwangata mèèsà à Mukalenge, biikàle ne mmwènekulu yà kwisùkwisù ne bintu byà mùshindù awu, nudi bafwànyine kucyènza.

²⁸⁰ Kàdi Yesù wákamba ne eci neciikalè cimanyishilu: “Bimanyinu ebi nebùikalè,” kî ne bìdi mwà kwikala to, “nebùikalè, mu nkongo yònsò, kùdi aba bàdi biitabuuja! Mu Dìna Dyànyi bóbò nebiipate badémóns; nebààkulè mu myakulu mikwàbò, nebààkulè mu myakulu mipyamìpyà; ne nebàkwatè nyòka ne byanza; nebànwe bintu bìdi bishebeyangana, kabyàkubènzela bwalu to; bàtentékela babèèdi byanza, babèèdi nebàsangalè.” “Ondòpaayi babèèdi, nùbiishè bafwè, nwiipatè badémóns; ànu munùdi bapetè cyanààna amu, nùfilè cyanààna.”

²⁸¹ Màyelè manène ónsò à dyenza naawu mfranga aa ne bikwàbò, ne baswikàkàne mu bintu leelù ewu, kabyèna bikèmesha to mùdibo bùle tètè ne cilumbulwidi. Eyowà's, mukalenge! Kaa, ekèlekèle!

²⁸² Tùmónàayiibì mpindyewu. Èyowà's, mukalenge. Kubiikila ku kanyinganyinga, ne difundà dyànyi dyà ku cilumbù mpindyewu.

²⁸³ Kàlvariyo kapyakàpyà aka ke—ke èkèleeziyà, cidìbo bàbiikila ne, myaba mitàmbe cijila, byambilu binène, cyoshelu cyà bwena Kàtòlikè, cyoshelu cyà Kàtòlikè, cibùikidiibwa ne cyambilu cyàbò. Ba-Méthodistes, ba-Baptistes, ba-Presbytériens, ba-Luthériens, beena Mpenta, myaba mitàmbe cijila, mwómò amu ke mùdiYe ùpetela misongolo Yèndè yà mitàmbe kuuma. Kàlvariyo kapyakàpyà! Kàdi kàsanganyiibwa penyì? Mu myaba ya cijila, èkèleeziyà.

²⁸⁴ Yèyè mmupoopèdiibwe pa nkùrusè penyì? Kùdi bampaasàta. Nwènu beena lubombo aba, nudi bamanyè cidì cimpè kutàmba

aci! Ncyêna mufiike munda to, kàdi cintu kampànda munda mwànyì emu cidi civùnduluka. Nzambi mmumanyishiibwe ànu menemene munkaci mwènù.

²⁸⁵ Mpenyi pàkapetelàYe mafùmà Èndè, mmu lubadi Lwèndè anyi? Mpenyi pàkaMutùbwilàbo? Pa Kàlvariyò. Yèyè ùdi ùbipetela penyi leelù ewu? Mu cyambilu. Mbafùmìne penyi? Ku Yelusàlèrà. Mbafùmìne penyi? Mu Dingumba. Biinè bàvwà bàlaka mukana bàmba mùvwàbo baMunange abu, ki bàakacyènzà. Ki bàdì bàcyènzà leelù ewu abu. Kàlvariyò Kèndè kiibìdi aku, mwaba ùdiYe ùpetela ditùbudiibwa Dyèndè ku dilwisha dyà Dìyi, ki cidi ciMutùbula ncyòci aci. Yèyè ùdi Nganyi? Yèyè ùdi Dìyi. Yèyè ùdi Dìyi. Mpenyi pàdiYe mutùbudiibwe bikolè menemene? Mu cyambilu mu myaba yà cijila, ànu mwàkadìbi kale wàwa amu.

²⁸⁶ Ndi ne bukenji bwà kufùnda lukòngo elu ku cilumbù. Ndi ne bukenji bwà kucyènzà, bu mwambi wa Èvànjeeliyò wa Yesù Kilistò, ne bimanyinu Byèndè, ne kujaadika ne Yèyè ùdi Nzambi. Ndi ne bukenji bwà kufikisha lukòngo elu ku cilumbù. Bwalu, songo mikolè menemene yà difùmà Dyèndè mmifùmìne buludi ku byambilu, mwaba ùdìbo badyule ne bambe ne: “Kanùpàtuki bwà kutèèleja bintàkanyi abi to. Mbyà dyabùlù.” Ànu mu mwaba mene ùdìbo ne cyà kuMunanga awu!

²⁸⁷ Ne bimanyinu mene byàkambà Yesù ne nebyènzekè ne: “Dìyi dyà Nzambi nditwè kutàmba mwelè wà mvità wà nseke yìbìdi; Dìyi, dijinguludi dyà meeji, dyà mapàngadika à mu mwoyi.” Ne Dyòdi didi dìbìikidiibwa ne dyabùlù, bìdi byùmukila penyi? Mu byambilu, myaba yà cijila.

²⁸⁸ Kaa, Nzambi, mmunyi mùdiYe mwà kutàngila panshi? Ànu— ànu luse's wè, kwàjiki, ngàsà. Katwèna mwà kwenza cingà cintu to ànu kushààla bindìle cilumbulwidi. Tukààdikù. Uh-huh.

²⁸⁹ Elàayi meeji pa bwalu abu. Ditùbudiibwa Dyèndè dikolè menemene didi difùmìna mu cyambilu. Ki mwaba ùdi Kàlvariyò Kèndè kapyakàpyà kàsanganyiibwa. Bàdi bàMupoopela pa nkùrusè, Dìyi adi, ku cyambilu. Ncyà bushuwà. Mmunyi, mmunyi mùdìbo bafwànyine kucyènzà? Ku mmwèkelu yàbo yà difwàna dyà Nzambi ayi. Aci's mmwòmò menemene!

²⁹⁰ Mwashiiibwe cifulu cyà butùmbi kùdi batèèleji, kùdi basekyanganyi! Yèyè ùdi ne cifulu cyà butùmbi cipyacipyà cyà mèbà, basekyanganyi! Mutùbula kuumukila ku cyambilu; mwashiiibwe cifulu cyà butùmbi kùdi basekyanganyi. Yèyè ukaadi mupoopediibwe cyàkàbìdi pa nkùrusè, cyàkàbìdi anyi? Mujuudiibwe mibùndàbùndà kùdi twitabàayi yà myenza kùdi bantu, balongeshi bàà dingumba bàlwisha Dìyi Dyèndè. Bàdi baDìjuula mibùndàbùndà, mu bundù, bàDìpiisha.

²⁹¹ Yesù wàkamba ne: “Bàdi bàNkuukwila mu cijèngù.” Mu *cijèngù*, “kabiyi ne dikwàcisha to.” Bàdi bàkuukwila nganyi? Bàdi bàkuukwila Nzambi umweumwe awu. Bàvwà munkaci

mwà kukuukwila Nzambì umweumwe awu ku dipoopediibwa Dyèndè dyà pa nkùrusè dyà kumpàla, ne civwa ndikuukwila dyà cyanààna. Ncintu cìmwècìmwè aci leelù ewu. Bàdi bìibaka ànu mu cijèngù màngumba aa. Bàdi bìibaka ànu mu cijèngù maasèminère aa. Bàdi ne twitabàayi eyi mu cijèngù, balongesha mèyi matùma à bantu bu dilongesha, kàdi bavila Diyì dyà Nzambì. Mbapiile mu dipoopeela dyà Mfùmù wa Mwoyi pa nkùrusè, balongesha malongesha à bantu bu Diyì Dyèndè. “Mu cijèngù bàdi bànkukwila Mémè,” mujuudiibwe mibùndàbùndà, mutùbùdiibwe, mwashiibwe cifulu cyà butùmbi.

²⁹² Panùdi numòna aci cipweka ne mùsèèsù, ne bàmwè bàà kunùdi nwènù bainàbànzà ne nsuki mile; bàmba ne: “Yèyè ngwa cyena kale, kí mmwòmò anyì?” Vùlukàayi ne, ki basekyanganyi mbòbò abu, ki cifulu cyà butùmbi cyùdi muvwàle ncyòci aci. Nzambì mmwambe ne civwa bwèbè butùmbi; bùvwàlaaku ne maleela. Àlèluuyàh! Cìvwàlaaku ne maleela, ànu mùdi mufwànyine kuvwàla cifulu cyà mèbà bwà Mukalenge webè amu. Cìvwàlaaku ne maleela. Kùmvu bundù to. Yèyè ngudi mwambe nànkù, cìdi ba-Izàbèlà aba bàmba leelù ewu nànsa ciikàle cinyi. Cìdi batentudyanganyi bàdi biimàne mu cyambilu aba, bapoopedi bàà Kilistò pa nkùrusè, cìdìbò bàmba nànsa ciikàle cinyi, wèwè udi ucìvwàla ne maleela. Nzambì ngudi mwambè nànkù. Wèwè cilamè.

²⁹³ Mwashiiibwe cifulu cyà butùmbi, ne basekyanganyi cyàkàbìdì, mèbà. Mutùbùdiibwe kuumukila ku cyambilu, ne twitabàayi.

²⁹⁴ Ùdi ne Gològòtà mupyamùpyà, kùdìbò bàya Nendè: nkwaya yidì miwvèle mizàbì eyi, bakàjì bavwàle tùpùtulù aba, nsuki mibebula, kwìsù kulaaba bilaabu, bìmba misambu mu kòralè bu Banjèlò, ne mamanya. Kì Gològòtà Wendè mupyamùpyà awu’s, ànu bavùùdi bàà bilàmbà bàà mu misèèsù bàà cyena leelù aba bakùbiiibwe kùdi mikenji, ànu bu Sodomà ne Gomòlà.

²⁹⁵ Nudi numòna kabwà kakesè kakàjì kàpweka ne mùsèèsù. Misangu mikwàbò kakwèna kabwà kalùme kiiikalà nànsa mwà kupàtuka pambèlu bwà kuya mwaba ùdìku awu to. Cintu kampànda cyènzekè, ne twònsò twà kùditu netùkàlondè mu nyimà. Kùdi cintu kampànda cìdi cikenzèkèle. Nudi bamanyè ne mbwà cinyi. Lekèlà . . .

²⁹⁶ Bakàjì aba bàdi bàvùùla bilàmbà byàbò bwà cinyi, ne bàpweka ne mùsèèsù? Kanùngambidiku ne kí ncintu cìmwècìmwè aci to. Ndimanyishiibwa. Kanùpiishi bantu balùme to. Kàdi mbakùbiiibwe kùdi mukenji wà mu Sodomà. Mukenji awu ùvwa ne cyà kwikala mwàmbè ne kí mbilondàngàne ne mikenji bwà bòbò kwikala pambèlu apu nànsa.

²⁹⁷ Ne bambi mu cyambilu bàvwa ne cyà kwikala ne bìzakù pamutù pàà nkooci wa balombodi bàà ntèndeelèlu; biimàne pambèlu pàapa ne nebàbaanyishilèci, kàdi biikàle ne bundù

bwà kucìdyula, bwalu dīgumba dyàbò dìdi mwà kubìipata. Udi upoopela pa nkùrusè, bwà—bwà disangisha, Dìyì dyà Nzambì dìdì dyamba ne: “Ncinyangu bwà muntu mukàjì kuvwàlayè civwàlù cìdì cikùmbànyìne muntu mulùme.”

²⁹⁸ Ndi—ndi mpiisha cintu aci. Ndi—ndi—ndi—ndi—ndi—ndi ncipiisha bwà dipoopela dyà Dìyì dyà Nzambì pa nkùrusè kumpalà kwà bantu. Bakàjì ne nsuki mibèbula, bavwale tuntu twìpì, ne cifulu cyà butùmbì. . . biimàne mu kòralè amu’s!

²⁹⁹ Muntu kampànda wàkangambila, dīgà ditùkù, mukàjì kampànda kunkonkayè, wamba ne: “Èè, mpènyi paudi wela meeji ne udi mufwànyìne kusangana aci’s?”

³⁰⁰ Mémè kwamba ne: “Bu Mukalenge mwà kundòmba bwà mémè kubàkula bantu dikumi ne bàbìdì, pa buloba bujimà, s’mvwa mufwànyìne kwikala—s’mvwa mufwànyìne kwikala ne bwòwà bwà lufù.”

³⁰¹ Pàdibi ne, ku dijingulula dyà Nyumà, kwimana mwaba awu kubàtàngila, ne kwimana mùshindù ewu ne kumòna bintu abi pambidi pààbò; manyaanù, bukooyà, bushààdile, bapwici bàà mfwankà, pambèlu apu bènda bèza maalu à macimbu mùshindù awu, ne biimàne bavwàle mùzàbì wà kòralè ne bimba misambu mu ngiikàdìlù awu, ne bàlekela batèèleji babàtàngile. Nebàmbè ne: “Èè, pìikalayè yéyè mwà kucyèenza, mémè pàànyì’s ndi mwà kucyèenza.” Nsòmbelu wa bwena Kìlistò mmwoyi wà cijila ne bukezùke, kàyì mwenzè bwalu to!

³⁰² Ndi mbàfùnda ku cilumbù, mu Dìnà dyà Yesù Kìlistò, bwà manyaanù àbò ne bwà bukooyà bwàbò. Mbafikishe Èvànjeeliyò ku bundù. Ne aba bàdi bateeta kuMukwàta, bàdi bàbìikidibwa ne “bakoleshi bàà maalu,” bàbìikila ne: “Aci’s ndukutukutu lwà cyena-kale.” Ndi mbàfùnda ku cilumbù, mu Dìnà dyà Yesù Kìlistò.

³⁰³ Tukàjì tuvùudi twà bilàmbà mu mùsèèsù, twimba mu kòralè, bànwà mfwankà, benza minèkù yà manyaanu, ne balùme bàsàtù anyì bànaayi, ne paanyimà pàà mwisambòmbò, ne pashiishe bimba misambu mu kòralè bwalu bàdi ne dīyì. Nwènù beena mamanya à mu mitù bakwàte ne byà luse aba, beena lungènyi lukònyàngàle, babèngiibwe mu buloba bwènù mene. Nudi nubala Bible umweumwe udi muntu mukwàbò kanà yònsò ewu mwà kubala awu, kàdi nudi badyombòle Nyumà wa Nzambì, mu mùshindù wà ne Bible mmwàmbè ne nudi bafwànyìne “kwikala babwejiibwe mu cibwejakàjì cicolè, bwà kwitabuuja mashimi ne kwikala bapiishiibwe kùdìwu.” Udi witabuuja cyà bushùwà ne udi mubingè, ne Bible ùdi wamba ne wèwè neucitàbùùje ne neùpiishiibwè ku mashimi àmwèàmwè aùdì witabuuja ne ki Bulelèlà awu.

³⁰⁴ Ki bwà cinyì, ndi nnufùnda ku cilumbù ku Dìyì dyà Nzambì. Nudi nulongesha bantu cilèma, ne nupoopela mèyì-makùlù à Kìlistò pa nkùrusè, à cijila ne Mwoyi wà kuulu, bwà muntu

awu wàmòna mwà kupàtuka mu mùsèèsù ne kwikalayè muntu mushiilàngàne.

³⁰⁵ Bayiishi biimàne mu cipalu cyà ndundu, bànwa mfwankà; mabwe à bilèndwishì; bintu bikwàbò byònsò byà budingibudingi bìdìbo bàányishila abi. Bakàji mu kòralè wabò, bavwàla tùpùtulù, nsukì mibèbula, ne benza bintu byà lukutukutu mùshindù awu, kwìsù kulaaba bilaabu, ne pashiishe kucibìkila ne: “Mwanèètù wa bakàji, *kampànda* ne *kansanga*,” pèndè Bible ùdi ùpiìsha bintàkanyì abi’s. Ncyà bushùwà. Kuya ku maafètes ne kwenza maalu à lukutukutu, mwikàle ànu cidimba cyà èkèleeziyà; mushààla mulamè bujaadiki bwèbè, ne mwikala ne nsòmbelu wa mùshindù kanà wònsò wùdi muswè awu.

³⁰⁶ Kanwèdi meeji ne ndi ngàakula ànu menemene bwà ba-Presbytériens to. Ndi ngàakula bwènù nwènù beena Mpenta. Ncyà bushùwà. Wèwè ukààvwakù mumanyè Bulelèlà musangu kampànda, kàdi wèwè kwela meeji ne kwèna mufwànyine kuBwàngata. Kwèna mufwànyine kutwà mpaasàtà webè nyamà ku mikòlò to. Mpaasàtà wèbè—wèbè kàvwa mwà kwikala ne mudimu bunène nàнку awu ne nkàmà yà ndola bùngì nàнку ku lumingu to, ne èkèleeziyà munène wa kuyiishamù, ne kwendesha ne kwenza maalu à lukutukutu mùshindù wùdibo bènza awu. Yèyè mupiìshe aci, bulongolodi’s mbufwànyine kumwipata; pa nàнку’s bikèngela àcilamè, bikèngela àcyámbe. Ki bwà cinyi, yèyè wàkasumbisha bukenji bwà bwanaàbutè bwèndè, ku dilongo dyà musàbù wa byà pa buloba, wà nsupù wa Esawù. Nènku ncinyi cyàpetàye bwàci? Bònsò bwàbò bàdi bàdishinda mu mùkidi wà dipiìshiiwbwa, ne kupiìshiiwbabò. Ndi mbàfùnda ku cilumbù, bu bandumbà bàà Èvànjeeliyò.

³⁰⁷ Mvwa mu kòralè, umwe wa ku yidi myèndè lumù, mu myaba minène, matùkù mashààle aa, ùmwè wà ku milongo mitàmbe kutùmbuka yà Mpenta yidiku. Nènku kwenzekabi ne ngiikale musòmbe mu birò byà mwanèètù ewu pàvwà kòralè yinaayi anyi yitaanu midìsangishe pàmwè. Nènku nku òmwè dyà ku... òmwè bwà ku malongolodi àdi matàmbe bwimpè à beena Mpenta. Kàdi kabàvwa bamanyè ne mvwa mu birò byà mwambi ewu to, mu Oklahoma. Mvwa musòmbe mwaba awu, lwà kwìnshì aku, kùvwà mwambi ewu ùlonga kumpàlà kwà kufikayè pa cibùmbà cyèndè cyà ku cyambilu apu. Nènku pàmvwà musòmbamù... .

³⁰⁸ Muvwa tu-Rickys tukèsè atu pambèlu apu; ne tu-Rickettas, tupenta, nànsha umwe wa kùdìbo kàvwa ne nsukì mile to, yònsò wa kùdìbo mwikàle ne nsukì mibèbula, muntu ne muntu wa kùdìbo muvwale mizàbi pambidi. Ne kaaRicky kiimàne pabwìpì apu, kènda kàya mùshindù *awu*, (ne muntu mukwàbò ùvwa wàngata mulàmbù wà bumpàndànjàl), ùvwa wènza maalu mwenze bu mpofò mwikàle ne lupànzà, ne wènda ùnyunguluka munkaci mwà kupenda bintu biinè bìvwàye wàngacila mulàmbù

abi, ne bintu byà mùshindù awu. Kàdi kupàtukayè kuntwaku ùteeta kwimba musambu wà—*Maasiyà Awu*, kaa, èkèlekèle, ne—ne ùvwa mwà kuwimba ànu bîmpè, kàdi kacivwa ne mwadi awu to. To, civwa cifwè, nwamònu's. Kaa, èkèlekèle! Ki bwalu mbwòbù abu's. Ki Gològòtá Wendè mupyamùpyà nyèyè awu.

³⁰⁹ Nudi nwela meeji bìshi bwà mwànà wa bakàji kampànda mutekète, anyi mukàji kampànda mutekète muntwamu? Mòna's, bu yèyè mwà kubwelamù, muvwàle bilàmbà bu mùvwàbi bìkèngela kwikalayè muvwàla, ne nsuki mile, kàyi ne bilaabu byà kwísù, ne bintu byà mùshindù awu, nunku's mbamwelùlwile; bu yèyè mwà kwikala mwimányine kuulu, nènku díbà divwàbo bènza lukutukutu kuntwaku, musùmbà wa bansonga awu, batwè ku makumi àsàtù anyi makumi ànaayi nàнку awu. Citùpà cisòbola cyà Mpenta aci, ciinè aci cyènza bintu byà mùshindù awu! Nènku bu inàbànzà mutekète awu mwà kwikala mwambe cintu kampànda pa bwalu abu, nunku's mbamwipàte mu kòralè amu.

³¹⁰ Muiishi wà Èvànjeeliyò imane ànu mu cyambilu àmbè cintu kampànda pa bwalu abu, mbafwànyine kumwipata mu bulongolodi amu. Nudi nupoopela cyàkàbìdì Mwànà wa Nzambì pa nkùrusè, ne nuMufwisha bundù bwà patòòke tòò. Èvànjeeliyò Wendè ùdì wèwè ulàka mukana wamba mùdì uyiisha awu, udi uMupoopela pa nkùrusè. Ndi mfùnda lukòngò lùdì lùbènga Kilistò elu, ku Dìyì dyà Nzambì, ne ku bukòlè Bwendè bwà cishindikì cyà matùkù à ndekeelu cyà ne Yèyè ùcìdì ànu ne mwoyi eci. Èyo. Bàdì balwishangana ne Dìyì díkezùkè, dishindikì dyà Nzambì. Malongolodi àbò kaèna mwà kutembangana naaDì to.

³¹¹ Èkèleeziyà minène ne màngumba's ke Kàlvariyo Kèndè kapyakàpyà. Ndi ncyàmba cyàkàbìdì. Eci, bakàji bààbò bàdì bàja maja bàvùula bilàmbà bàà cyena leelù aba, ki yàbò kòralè.

³¹² Mwakwidi munène wa òngumba ne òngumba dyònsò ùdì wèla lubila bu mwakwidi munène wa ditùkù adì ne: “Mpindyewu lwàku ùtùleejè cishimà.” Uh-huh. Aci's civwa ndipoopediibwa dyà pa nkùrusè dyà kumpàla.

³¹³ Bidi ànu byà mwomùmwè leelù ewu. Nkàadi mubuumvwa bàmba ne: “Èè, mpindyewu, wèwè udi ujuula bafwè, mmwòmò anyi? Bwà cinyi kùyiku uya kuntwaku? S'udi ne mukàji mu nkità mwàmwa. S'udi ne mwànà wa mu dibòko kuntwaku.”

³¹⁴ BààkaMwambila ne: “Twètù's tukàadi baKuumvwè mubiishe bafwè. S'tudi naabù tètè mu nkità emu. Lwàku ùbàjuulèbi's.” Kaa, dipanga's nedilelè dipanga. Nwamònu anyi? Uh-huh.

³¹⁵ Èkèleeziyà minène, kòralè minène, baakwidi banène bàà mu ditùkù edì, “Lwàku, ùtùleejè cishimà cìdì òngumba dyètù kadiyi mwà kwenza to.”

³¹⁶ Mvwa ne muntu kampànda, àbìdì adì panshì aa, uvwa mwambè dìyì kampànda pa . . . paanyimà pàà muiiki mukese

wà ku tudyòmbà úmýwà mwênzè mu Jonesboro, mu Arkansas, ngàakula bwà mukàji kampànda uvwa mwondòpiibwe. Muntu ewu ùvwa wa mu dingumba kampànda dyà èkèleeziyà, ki kujuukaye paanyimà apu kwàmbaye ne: “Ndi ngèèla muntu kanà yònsò kadyòmbò bwà kuntwàdila ne kundeejaye cishimà.”

³¹⁷ Ki mêmè kuya ne kwangata ngàngàbukà kampànda. Muntu ùvwa mwondòpiibwe, ku kànsèrè. Mêmè kuya kangata mukàji uvwa mu dikalù dyà balèmà munda mwà bidimu bitwè ku makùmi àbidi; ùvwa mwondòpiibwe ku binyòka, ùkaavwa mu dikalù dyà balèmà. Mêmè kumwangata e kulwa kwamba ne: “Mpindyewu ndi muswè mfranga, ndola cinunu.”

³¹⁸ Yèyè ne: “Èè, uh, uh, uh, uh, kayèna apa to. Yidi mu Waco, mu Texas mwàmwa, mùdi ciimamwëndè wa bukalenge cyètù cisananyiibwa.”

³¹⁹ Mêmè ne: “Èyo, netùye ànu kuntwaku bwà kukayàngàta.” Yèyè ne: Mêmè ne: “Ùdìlongòlòlè bwà twàya mààlabà.” Nwamònu anyi? Mêmè ne: “Netùfundè mukàndà...” Mêmè ne: “Ngàngàbukà nyèyè ewu bwà kwabayè ne bantu aba kakùyì mpatà to bàvwa ne kànsèrè. S’ki cyòci eci pa dibeji dyà mènà, mu cyamù cyà mîdimà. Muntu mukàji nyèyè ewu udi beena mutumba bònsò bamanyè ne ùvwa musòmbe mu dikalù dyà balèmà adi kùkaadi bidimu makùmi àbidi, kàdi nyèyè ewu wènda bîmpè mpindyewu mene. Ne bangàngàbukà, bàvwa ngàngàbukà paanyimà pàà ngàngàbukà paanyimà pàà ngàngàbukà paanyimà pàà ngàngàbukà, ne bikwàbò byònsò, kàdi’s ki yèyè ewu ne mwoyi leelù ewu. Mpindyewu, wèwè’s wàmbi ne udi mufwànyine ‘kufila ndola cinunu.’ Ndi muswè kuyèla mu cibucilu cyà bumpàndànjilà. Ki cîndi muswè.” Nwamònu anyi? Nwamònu anyi?

Yèyè ne: “Èè, yidi ku Waco kwàka, mu Texas.”

Mêmè ne: “Netùye mààlabà.”

³²⁰ Yèyè ne: “Anji indila kakesè. Lekèlè nkwambileku cintu kampànda. Nentwalè mwànà wa bakàji mutekète. Nènku lekèlè ngàngatè kapaaya mmukòsè dibòko dyèndè, ne pashiishe wèwè ùdyondapè, kumpalà kwà kwà bàna bèètù. Nènku nebàkupè mfranga ayi.”

Mêmè ne: “Wèwè udi démon!”

³²¹ “Wèwè ní udi Mwànà wa Nzambi, tuuluka ku nkùrusè ewu.” “Twàmбилèbi wàKutuutù awu,” ne mukùsu muMujìngìla ku mutù. KuMutuutayè pa wòwù, wàmba ne: “Mpindyewu, Wèwè ní udi mupròfetà, twàmбилèbi ne nganyì wáfi- . . .” “Wèwè ní udi Mwànà wa Nzambi, tuuluka ku nkùrusè.”

³²² Balombodi bafòfo bàà bampòfo! Bàdi dijinga ne dyondopa dyà byeledi byàbò byà meeji, muntu udi wenza cintu bu nàнку awu, anyi wàmba díyi bu nàнку. Cyà bushùwà.

323 Lubilà lwà kale lwà ciibidilu alu, nànsha nànkù: “Tùmonèbi mùdì Wèwè wenza cishimà. Mulongeshi, s’tudi bafwànyine kujinga cishimà cyà Kùdì.” Piinè apu, ditùkù dyònsò, dibà dyònsò, byènda byènzeka ànu kwenzeka, ànu mùvwà Nzambì mufwànyine kucilombola bwà kwenzekaci amu. Kàdi kabàvwapù to. Bu ne bàvwapù, bàvwa bàcibìikila ne “Beelèzèbùlà, dyabùlù.” Nwamònu anyi? “Mulongeshi, tudi bafwànyine kujinga bu Wèwè mwà kucyènza mu mùshindù utùdì baswè bwà Wèwè kucyènza awu.” Ki cyòci aci. “Nda kutùdì baswè bwà Wèwè kuya aku, wènzè citùdì twètù baswè aci.” Kaa, èyowà’s. Uh-huh. Kabàvwa ne myonji miMwela to. To, mukalenge. Ki bwà cinyi byàkakèngela bwà kuMupàtùlabò munkaci mwàbò. Èyowà’s, mukalenge. Bàdi bàteeta kwenza cintu cimwècimwè aci leelù ewu. Ne ku nsangilu wa maèkèleeziyà, ndekeelu wa byònsò nebàkumbajè bwà kucyènza, nwamònu’s, bònsò bwàbò bèndela pàmwè. Lubilà lwà kalè lwà ciibidilu alu.

324 Apa tudi tumòna, cyàkàbìdì ne, mwaba ùdì mutàmbe kwikala wa ntèndeleeu, beena tèlòlòjì bàà batàmbe bwimpè, bàà kapelu, munkaci mwà kubìikila cyàkàbìdì bwà kupàtuka, ne kuMulwisha, ùbìikila bwà kupàtuka. Beena tèlòlòjì bàà batàmbe bwimpè, bàvwa ne cyà kumanya dishiilangana abu; èkèleeziyà yà mitàmbe kutumbuka, ne beena tèlòlòjì bàà batàmbe kulongeshiibwa bimpè, bàdi bàMwipata munkaci mwàbò. Kí mbaMuswè to.

Wèwè udi wamba ne: “Aci’s ncibi, Mwanèètù Branham.”

325 Nànkù wèwè kùvwa mwab’ewu bwà kumòna *Bikondo Byà Èkèleeziyà*, anyi kucitèeleja cìyiishiibwa. Wèwè kwàkadi mwab’ewu to, pàvwàbi ne, Cikondo cyà Èkèleeziyà wa Laodikiya eci ke cimwèpelè cyàkaMwelàbo pambèlù pàà èkèleeziyà. Ne Yèyè ùvwa pambèlù, pambèlu apu, ùkookola, ùteeta bwà kwalukilamù. Bààkamwela pambèlù bwalu kabàvwa ne cyà kwenza Nendè to. Bàdi bàMupoopela cyàkàbìdì pa nkùrusè. Amen! Tudi bafwànyine kuya too ne dibà kaayi?

326 Vùlukàayi ne, mupròfetà wa Dìyì dyà Nzambì ùkaavwa mudyànjile kutwàmbila, mu Timòtè Mwibìdì 3, panwikalà nwenda nucifùnda. Katwèna bapetè dibà dyà kucibala to. Kàdi mbàmbè, ne: “Mu matùkù àà ndekeelu, baseki nebàlwe. Bàvwa mwà kwikala bapapè mitù, badibàndishi, banangi bàà bisànkasanka kutàmba kwikala banangi bàà Nzambì; bashiminyinyanganyi bàà maalu, kabàyi ne kudikànda, beena lwonji, ne badyombodi bàà aba bàdi bimpè, batungidyanganyi, beena mutù mukolè, badibàndishi, bamanyi bàà mabàla; biikàle ne cimwènekelu cyà difwànà dyà Nzambì, kàdi bàvila Bukolè bwàdì: tàpulukà ne bàà nànkù awu abu! Bwalu bàà mùshindù ewu mbàdì bangata bakàjì bakùtākàne, ne nsukì mibèbula,” bavwàle tùpùtulu, kwìsù kulaaba bilaabu, “ku mwaba ne ku mwaba, ne kubakwàta ku bupika.” Aci’s mmwòmò menemene.

327 Yèyè kwamba ne: “Nwèpukè bàà nànkù abu, mu matùkù à ndekeelu.” Tùtùmikilàayi mupròfeta. Tùumukàayi ku bintu abi mu matùkù à ndekeelu. Bàdi kaaba aka. Ndi munkaci mwà kubiikila Èkèleeziyà mpindyewu. Èyowà’s, mukalenge. Umùkàku’s!

328 Bàdi ne, bôbò, ba—bambi bàà ditùkù edi abu’s, bìvwa bikèngela kumanyabò maalu aa. Bìvwa bikèngela bwà kwikalabò bamanyè Yesù mu matùkù Èndè. Bìvwa bikèngela kwikalabò bamanyè. Nènku mpindyewu bìvwa bikèngela kwikalabò bacimanyè, kàdi kí mbacimanyè to. Ànu mùvwà balongeshi bàà beena Yudà bàà mu matùkù Èndè ne cyà kwikala baMumanyè ku ditùkù Dyèndè, ki mùdibi kàbìdi leelù ewu, bwà Dìyì dishindika bitòòke tòò musangu awu. Yèyè ùvwa Dìyì, ne Wàkajaadika ne Yèyè ùvwa Dìyì. Wàkajaadika ne Yèyè ùvwa Dìyì bwà ditùkù adi. Ne Nzambi mmujaadike leelù ewu ne Yèyè ùdi Dìyì dyà ditùkù edi, Bukènkè bwà dībà edi. Nènku bìvwa bikèngela bwà kwikalabò bacimanyè dībà adi, ne bìvwa bikèngela bwà kucimanyabò mpindyewu.

329 KuMupoopelabò pa nkùrusè dībà adi, ne bàdi bàMupoopela pa nkùrusè mpindyewu. Ndi mbàfùnda ku cilumbù bwà cyôci eci! Mmwômò. Cidi ànu munkaci mwà kwela nsèsè mu mémè emu ne: “Bàfunde ku cilumbù, bwalu Nzambi ùdi ne cyà kubàfucishaci!”

330 Beena Yudà bàà mu ditùkù dyàbò. Nzambi cyàkàbìdi, mu matùkù aa pa buloba, Yesù wàkamba ne: “Yelusàlèmà, Yelusàlèmà, mmisangu búngi kaayi ínkaadiku Mémè ewu muswè bwà kukusangisha mu cisumbù cinène cimwèpelè, kàdi wèwè kwèna muswè to.”

331 Mùshindù mwinè wùdi Nzambi muteetètètè, mu matùkù à ndekeelu aa, bwà kusangisha bantu Bèndè pàmwè, kàdi nwènù kanwèna baswè to. Nuvwa bajinge twitabàayi wenù awu, nànkù mpindyewu nudi balongolwela kabùtù. Ki cyàkapetà Yelusàlèmà aci; wàkashimbudiibwa, kubùtudiibwa mu kapyà, kàcyenàku kàbìdi to. Nènku ki ciikalàku menemene ncyôci aci, òmwè dyà ku matùkù adi panshi aa, ku bintu byònsò binène ebi kaaba aka. Twitabàayi yènù minène ne màngumba awu nebifwe ne nebibùtukè, kàdi Dìyì dyà Nzambi nedìikalè dyà Cyèndèlèlè ne nedìikalè ne mwoyi kashidi. Nwamònu anyi?

332 Mpùtà Yèndè myondòke ayi yìdi yifùmina mu nzùbu udi ubiikidiibwa mùdiye wa balundà bendè. Elàayi meeji, elàayi meeji pa bwalu abu. Elàayi meeji pa bwalu abu’s! Imànaayi! Ndi mwindile katanci. Bambi, anji elàayi meeji pa bwalu abu’s! Mpùtà Yèndè ayi yàkafùmina penyi? Mu nzùbu wa bàvwà bàdìbìikila mùvwàbù balundà Bèndè. Ànu mùvwàbi amu, ke mùdibi. Elàayi meeji pa bwalu abu’s! Ku Kàlvariyo Yèyè kàvwa munyungulukila kùdì—kùdì bantu bàà cisuku, baamùyàpàndi to, kàdi kùdì bambi bàvwà balaka mukana bàmba mùvwàbo

baMunangè. Ne leelù ewu, pàdi Èvànjeeliyò mumanyishiiibwe ànu menemene, pàdi bimanyinu binène byà dibiika Dyèndè dyà ku lufù bijaadikiibwe munkaci mwètù, kí mmùsèèsù wùdi pambèlù pààpa ùdi wùkutùpikila pambidi pèèbè apu to, mbàdi bàdyamba ne mbambi abu.

³³³ Aba bàdi ne cyà kuMunanga abu, ki bàdi baMunyungulukile leelù ewu. “Katwàkwikala ne Cintu aci munkaci mwètù to. Katwàkwitaba bwà Muntu ewu àtukòòkeshè twètù to. Katwàkutwàla to. Katwàkwelangana NaaCi mu dibòko to, mu cimenga emu, piikalà Cintu aci cilwa mu mùshindù ewu. Kí ncíngà cintu to kàdi ànu ditèndeleele dyà mikishi. Ndyabùlù.” Kabàyi bamanyè Díyi dyà Nzambi to, bampofò bàlombola bampofò. Ànu mwàkadìbi musangu awu, elàayi meeji, ke mùdìbi kàbìdi mpindyewu. Ànu mwàkadìbi musangu awu, ki mùdìbi kàbìdi mpindyewu. Elàayi meeji’s!

³³⁴ Bukolè Bwèndè bwà kwondopa ne kupikula balùme ne bakàji ku dinanga dyà maalu àà pa buloba bùdiku mpindyewu ebu, kuumuka ku nsukì mibèbula, ba Yezàbèlè bàà kwìsù kulaaba bilaabu bàdi bàdibiikila mùdìbo beena Kìlistò abu; ne bàlela nsòmbelu wa mùshindù awu, banù bàà mfwankà, beedi bàà minèkù yà manyaanù. Kusòmba panshi ne kwikala ne kùmpànyi wa bampàndànjàlè, ne kutelakaja ne kutela, ne kwakula, ne cilèndwishi, ne—ne kupàtuka mu mùsèèsù ne kuvwàlà tùpùtulù, ne bintu byònsò byà mùshindù awu; ne pashiiishe kudibiikila mùdìbo beena Kìlistò, kumpàlà kwà bakàji bakwàbò. Nudi bavùlùke bwalu-bulonda bwànyi bwà mupika awu uvwa mumanyè ne ùvwa mwànà wa mfùmù, ngiikàdilù wendè. Bivwa bikèngela twètù kwikala cinyi? Balùme ne bakàji, kàdi bàvila . . .

³³⁵ Balombodi bàà ntèndeleeleu aba, byambilu ebi mwaba wùdìbo bàMutàpila mpùtà Yèndè ayi, mbabàndishe ne biitàbe nsòmbelu wa mùshindù awu munkaci mwà bantu, mwaba wùdìbo bàMutwilà difùmà. Bàdi bàvila Bukolè bwà—bwà kubàpikula ku cyòci aci, ne bàciitaba bu ne cìvwa nàнку. Pààbi, s’mbibèngangane ne Díyi dyà Nzambi, bwà mukàji kubèbulayè nsukì yèndè, anyi kudilaaba bilaabu kwìsù, anyi kuvwàlà tùpùtulù. Bìdi bibèngangana ne Díyi dyà Nzambi, kàdi bóbò bàdi baciitaba, bènza kakwàbò Kàlvaryìyò (penyi? mu mùsèèsù anyi? mu cinwinù cyà maala anyi?) mu cyambilu, mu cyambilu.

³³⁶ Nènku, kàbìdi, cìvwa lubilà ncinyi? “Yèyè ùdi ùDìvwija Nzambi.” Bàdi bàvila Bunzambì Bwèndè. Bàdi bàteeta kuMupandulula ne kwenza Nzambi yìsàtù anyi yìnaayi mu Yèyè amu. Pààbi, Yèyè ùdi Nzambi; Yèyè ùvwa Nzambi; Yèyè neikalè misangu yònsò ànu Nzambi, umweumwe awu makèèlèlè, leelù, too ne kashidi. Paùdi wakula bwà Nzambi umwèpelè, kùdìbò bóbò, bàdi bàkuseka. “Tudi twitabuuja bùsàtù bwà cijila.”

³³⁷ Ndi ngìtabuuja Nzambì umwèpelè wa cijila, èyowà's, mukalenge, Bukolè Bwendè bwà kwondopa, bwà kushiya bantu badishikàmìne, ne kupàtula bantu aba mu dinanga dyà byà pa buloba, bwà kubàsùlulula mwàkasùlulaye Màriyà wa ku Magàdàlà awu amu. Vùlukàayi ne, yèyè ùvwa pèndè Yezàbèlà wa kwìsù kulaaba bilaabu, yèyè pèndè. Ùvwa ne démòns mwandamutèkète munda mwèndè. Ùvwa muji wa maja wa ùvùla ne bilàmbà.

³³⁸ Ànu mùdì mukàjì wa cyena leelù mu mùsèèsù leelù ewu; udi uya mwaba wònsò wùdiye muswè kuya ne kutàngila awu. Wèwè kùyi witabuuja ne bantu bàdi binamina lupìngù lwà bakàjì butakà to, tàngilà pambèlù mu mùsèèsù leelù ewu. Ànu mwàkadibi mu matùkù à Sodomà, ke mwìkalàbi kàbìdì. Tàngilàayi pambèlù, panwìkalà kanùyì nuciitabuuja to, ndàayi ànu mwaba kanà wònsò. Kàngulàku cibèjibeji, kàngula cikàndàkàndà, tàngilà ùmonè mboodi wa mamanyisha, cyùdi upeta ncinyi? Nudi bavùlùke cyàkambaci anyi: “Pàakamònà bânà bàà balùmè bàà Nzambì ne bânà bàà bakàjì bàà bantu bàvwa balenga, bààkabàngata bu bakàjì.” Tàngilàayi cilèndwishi mu Angletterre, tàngilàayi cilèndwishi mwab'ewu, tàngilàayi cintu cyònsò mu kaabujimà, ncishàale nzùbu wa bundumbà.

³³⁹ Bwà cinyi nàнку? Russie mmulwè communisme bwà cinyi? Mbwà maalu àà ciipanshì ne bukooyà, dipanga dyà Bukolè dyà èkèleeziyà wa Kàtòlikè. Nènku ke bwà cinyi menemene ditunga edi ndicimùnyiiabwe, communisme ne nsangilu wa maèkèleeziyà, ne dikalamakana dyàdì ne èkèleeziyà wa Kàtòlikè. Byà bwalu, communisme ne cyena Kàtòlikè nebìdisangè, nudi bamanyè's, kàdi's ki bóbò aba munkaci mwà kucyènza. Bwà cinyi? Bwalu mabènge Èvànjeeliyò udi ùbàtápulula ne ùbàvwija bantu bashùlàngàne! . . . ? . . . Ki kabingilà nkòkò aku menemene.

³⁴⁰ Ne bambi mu cyambilu mbatwè ku cyòci aci, bwà ticket wa byàkudya, bwà cipidì kampànda cyà mu nsòmbelu wa bantu ne twìtabàayi kampànda, wàmba ne: “Mémè ndi wa mu *Cikampànda*,” ùshintakaja dilonga dyà kàlaasà ne Bukolè bwà Nzambì; kubàsùlulula ku cisà cyà cibùlùke eci, mùvwà Màriyà wa ku Magàdàlà.

³⁴¹ Bukolè mene bùvwà mwà kwangata mukàjì mukesè muvùudi wa bilàmbà mu mùsèèsù awu, ne kumuvwàdika bilàmbà ne kwenza maalu bu inàbànzà, kumuvwija mwena Kilistò, bààkapùisha Bukolè abu, ne bààkapoopela Muntu uvwa naaBù awu pa nkùrusè, ku Kàlvariyo.

³⁴² Nènku leelù ewu, Èvànjeeliyò mwinè ne Nyumà Mwimpè wìkala mwà kwangata kakàjì kaji kàà maja kàà kavùula bilàmbà aku ne kukàfikisha ku divwàla bilàmbà bu inàbànzà ne kwenza maalu bu mwena Kilistò, bàdi bàMubiikila ne “ndikolesha dyà maalu.” Bóbò kí mbaswè kuMusopakaja

munkaci mwà disangisha dyàbò to, kuMuvwàndulula munkaci mwàbò, bàfikisha bakàji bakwàbò ku dicyènza. Cidìbo bènza ncinyi? Bàdi bàMukùpa pambèlu, ànu mwàkenzàbo musangu awu amu. Nènku mpindyewu bàdi bàpoopele Dìyi mene pa nkùrusè bàmba ne Divwa bwà cikondo cikwàbò. Ndi mbàfùnda kàbidì ku cilumbù, èyowà's mukalenge, byà mwomùmwè ne mwàkafùndìbwàbo mu cikondo aci amu.

³⁴³ Cimanyinu cyàkenzejà Legònà wa kale awu bwà kuvwala bilàmbà. Vùlukàayi ne, muntu udi uvùùla bilàmbà byèndè awu mmupàle. Nwamònu anyi? Kàdi bìshi bwà muntu mukàji? Legònà's ùvwa mupàle; wàkadivùùla bilàmbà. Nzambi wàkangata Bukolè Bwèndè ne wàkamuvwàdika bilàmbà byèndè. Ùvwa muvwàle bilàmbà, mu meeji èndè majaalàme, musòmbe ku makàsà à Yesù.

³⁴⁴ Tàngilàayi Bukolè bwà kafikisha mukùlumpè Batimàayi mpofo ku dimòna, ànu munkaci mwà twitabàayi yàbò amu mene. Yèyè ùvwa pa buloba cikondo civwàku bupidyà bwàbùngi ànu mùdìbukù leelù emu, kàdi kabwàkaMwimanyikakù to. Yèyè wàkatùngunuka. Yèyè kàakadyànganakù mukana kùdìbo to. Yèyè wàkabàmbila ne: “Nwènù nudi bàà tatwènù, dyabùlù.” Wàkapiisha cintu cyònsò mu kaabujimà.

³⁴⁵ Bukolè bùvwà mwà kubiisha Lazàrò mu lukita abu, ne kwalujila mukàji wa mu Nayinà mwanèndè wa balùme abu! Èyi Nzambi wa yààya! Bukolè bùvwà mwà kwenza bintu abi abu, bùvwà mwà kudyànjila kwamba maalu àkenzekà awu. “Kùdi bàbidì...Mwànà wa mpundà, kùdi mwànà wa mpundà muswikila pa masangu à njila,” ne bintu byònsò bidìYe mudyànjile kwamba ebi. Muntu mwinè uvwa ne Bukolè abu awu ne: “Muumushaayi apa. Katwèna baswe kwikala Nendè munkaci mwà cisàmbà cyètù nànsha. Ùdi ùkooyisha malongesha ètù,” ne kuMupoopelebo pa nkùrusè.

³⁴⁶ Cintu ànu cyòcì cimwècimwè aci leelù ewu ne: “Uumushaayi Nyumà Mwimpè,” bòbò kì mbaswè kwikala Nendè bwalu to. “Ùdi ùpiisha ne wènza bintu ebi, ne wàmabila bantu bèètù bintu bitùdi katùyi baswè bwà kubwelakananganabi munkaci mwà malongolodi ètù ebi to. Aci cidì cibèngangana ne twitabàayi yètù.” Bàdi bàMupoopele cyàkàbidì pa nkùrusè. Kaa, ekelekele!

Mònaayi mpindyewu patùkaadi tujikija apa. Bikèngela twimanyikè.

Nènku, kàbidì, bàdi bàMubiikila ne “ndikolesha dyà maalu.”

³⁴⁷ Kàdi's bààkaMubiikila ne “mmukoleshi wa maalu.” Kwambabò ne: “Yèyè's ùvwa mupàle.” Muntu kanà yònsò ewu mmumanyè ne Bible mmwambè ne: “Yesù ùvwa,” mwàkambà Bàfaalèsà abu ne: “Muntu ewu mmwena Sàmaalèyà, ne Yèyè mmupàle.” Mpindyewu mwàkù ewu *mutombòke* ùdi ùswa kwamba cinyi? “Mupàlè.” “Muntu awu mmupàle. Mmusùmbà wà bantu bapàle bàdi bàMulonda. Yèyè's m'Beelèzèbùlà.”

348 Nènku, kàbìdì, bàdì bàmba cintu cimwècimwè aci ne: “Mmupongo wà mûngà mùshindù. Nditempa dyà lubùku,” bàMutèèka cyàkàbìdì pa nkùrusè wa bundù. Nkùrusè kaayi? Bundù kaayi? Dìyi Dyèndè dishindika; kuDìseka, kwambila bantu ne Didi dyabùlù. Dyenza cintu kampànda, ne kubiikila . . .

349 Yèyè ne: “Bàdì bàbìikila byenzedi byà cijila byà Nzambì ne ‘nyumà mubi ngudi ùbyènza,’ kakwèna difwidiibwa dyà luse bwà bwalu abu to.”

350 Ûfwisha Dìyi Dyèndè bundù, ùteeta bwà kuDitèèka patòoke ne kuDibiikila cintàkanyi anyi dikolesha dyà maalu ne: “Kùyì kuntwaku to. Kùbwedi mu masangisha awu to.” Uh-huh.

351 Cìdìbo bènza ncinyi mu kwenza kwà nànkù? Bàdì bàngata misonso yàbò yà cyena-màngumba ayi. Ncyà bushùwà. Balongeshi bàdì bènza bipatangana ne bisànkasanka, byà pa buloba aba, kabàyi bàneemeka Nzambì, bapàle bàà cyena-dingumba, bàngata misonso yà cyena-màngumba ne kupoopela naayi Mwànà wa Nzambì pa nkùrusè, cyàkàbìdì, ku cyambilu cyàbò.

352 Bàdì bènza nùnkù bwà cinyi? “Mbanangè disaamuna dyà bantu,” màpòlomè àdì èkèleeziyà mwà kubàpèèsha awu, “kutàmba dinanga dyà Dìyi dyà Nzambì.” Ndi mbàpiisha. Kabèèna mwà kufwànangana ne maalu à pa buloba to, bwalu bàdì . . . Kabèèna mwà kufwànangana ne Dìyi to, bwalu bàkaadi bamanè kufwànangana ne bàà pa buloba. Bàkaadi bamanè kucyèna. Ditùkù dyà cyena lubombo ditùdì ne mwoyi edi! Eci kì . . .

353 Kàlvariyo kàmwèpele kì nkakùmbana bwà Mukalenge wanyi anyi? Bwà cinyi nudi baswè kwenza nùnkù? Nwènu bàdì ne cyà kuMunanga abu, nwènu bàdì bamanyè ne Eci n’Dìyi Dyèndè, nwènu bàdì mwà kubala Bwàkabuulwibwà nshapità wa 22, udi wamba ne: “Ewu yònsò wàdìdinga kwangata Dìyi òmwè anyi wasàkidila dīyi òmwè awu,” udi ucyènza bwà cinyi? Kàlvariyo kàmwèpele kì nkaMukùmbana anyi?

354 Mèmè ndi mwimàne mu baMwakwidi. Mèmè ndi muMulumbulwidi, ne ndi nnùfùnda ku cilumbù ne Dìyi dyà Nzambì. Shintulula njila yèbè cyanààna nèuye mu ifèrnò. Màngumba èbè awu neàtaayikè. Ndi nkufùnda ku cilumbù mu Bwikadi bwà Mulumbulwishi, cyà bushùwà, nwènu, ne bimwènekelu byènu byà difwànà dyà Nzambì, lubombo. Bwà cinyi nudi nuCibiikila . . . Kàlvariyo kàmwèpele kì nkakùmbana anyi?

355 Mwàkambà Peetèlò ne: “Baataatù bèènu bàà cyena-màngumba,” Peetèlò wàkanùfùnda ku cilumbù ku . . . Wàkamba ne: “Nganyi wa ku baatatwènu udikù kàyì mwenzè eci?” Stèfanò wàkenza cintu cimwècimwè aci: “Ne byanza byà lwonji nudi bapoopèle Mfùmù wa Mwoyi pa nkùrusè.” Yesù kàakambakù, Yèyè mwinè ne: “Nganyi wa ku baatatwènu uvwa kàyì mwèlè

baprophetà mu nkita? Ne nwênù nudi nuyilengeja pashiishe”? Ki mùdìbì kàbìdì bwà muntu mwakàne munda mwà bikondo!

³⁵⁶ Kî mmùndì mfùnda musùmbà wà bantu batùmbùke bàà maalu à kapelu ewu, bayi bàà mu èkèleeziyà, wà bantu babèngi bàà Kilistò bàà ditùkù edi. Nwênù, ne mmmwènekelu yènú yà difwàná dyà Nzambì, nupoopèle Kilistò wanyì pa nkùrusè bwà musangu mwibìdì, pa kwambila bantu, ne: “Mèyi aa àdi bwà ditùkù dikwàbò kampànda, ne Dyòdì kadyèna bwà ditùkù edi to.” Ndi nnùfùnda ku cilumbù. Nudi bapìlle bwà bwenzàvi bùmwebùmwe bùvwàbo naabu abu, mu ditùkù dyà dipoopediibwa dyà pa nkùrusè. Nyingàlàlaayi ne nwàlukile kùdì Nzambi, cyanààná nudi nubùtuka.

³⁵⁷ Ne kàbìdì ndi ngàmba ne: “Apa,” maèkèleeziyà, “bòbò,” balongeshi, “bàdi bàpoopela pa nkùrusè,” ku dipenda dyà Nzambì, “Yèyè,” Dìyi. Nzambi ikalèku ne luse! Ngànji ncyàmbùlùlèbi. Ncifwànyine kwikala cibwelàkàne pa mukàbà wà mèyi. “Apa,” maèkèleeziyà, “bòbò,” balombodi bàà èkèleeziyà, “bàdi bàpoopela pa nkùrusè,” ku dipenda dyà Nzambì, “Yèyè,” Dìyi. Kabyèna bikèmesha to mùdici cyàkàbìdì ne:

Munkaci mwà mbwebwe yitaayika ne mauu
àshààla à mîdimà,
Musungidi wanyì wàkiinyika mutù Wèndè
panshì ne kufwà,
Kàdi dikàngula dyà cilàmbà cikùdika
dyàkakàngula njila
Ku masànkà à mu Dyulu ne ditùkù dyà kadiyi
ndekeelu.

³⁵⁸ Ndi ncyàmba pa mukàbà wà mèyi ewu, ne bwà batèeleji aba, ndi ngàmba nùnkù ku disonsodiibwa dyà Nyumà Mwîmpè ne: Udi ku luseke lwà Mukalenge awu, àlwe mwinshì mwà Dìyi edi! Nzambì neàfikishe bulelèlè lukòngo lubì elu, luvidi lwà Kilistò elu, lubèngi lwà Kilistò elu ku cilumbulwidi, bwà dipenda dyà Nzambì, dipoopela dyà Dìyi Dyèndè dimanyishìibwe pa nkùrusè. Bàdi bàlwa ku Cilumbulwidi. Mémè ndi ncifùnda! “Udi ku luseke lwà Mukalenge nganyì,” mwàkambà Mòsà, “àlwe kùndì,” piine apu mpàvwà Dikunji dyà Kapyà dilembèlèle kwàka bu cileejì. Udi ku luseke lwà Mukalenge awu nganyì, àmbulè Dìyi, àvilè twitabàayi wèndè, ne àlondè Yesù Kilistò ku ditùkù ne ku ditùkù. Nènku nèntwilanganè neebè mu dindà.

Twìnyikàayi mitù yètù mpindyewu bwà mwàkù wà disambila.

³⁵⁹ Éyi Mukalenge Nzambì, Mufidi wa Mwoyi wà Cyendèlèlè ne Mwena Dìyi edi, Wàkapatula kàbìdì ku bafwè Mukalenge Yesù awu, Wàkacimanyisha ànu menemene kumpàla kwà—kwà lukòngò lwà beena bupidyà. Kùkaadi ntàntà mule, mu dindà emu. Bààbùngi mbasòmbe kaaba aka. Èkèleeziyà mmùle

patapata. Bantu mbiimàne kuulu myaba yònsò. Ne mikàbà yà mèyi yidi munkaci mwà kukwàciibwa, bwà kuya pa buloba bujimà, mu myaba mishiilèshiiàngàne. Bambi nebàteeleje eci mu birò byàbò. Ndi mbasambidila, Mukalenge. Enzàku bwà Mèyi aa àmate mu ndòndò wa mwoyi, àbwelè mu ndòndò, àkosè byà pa buloba byònsò. Bwà bààmòna mwà kwamba bu . . .

³⁶⁰ Mwambi mukesè wa ba-Méthodistes wa mu Kentucky ewu, kulwayè kùndi dîngà ditùkù, kwambayè ne: “Pàmvwà ngumvwa *Bikondo Mwandamutekètè Byà Èkèleeziyà* abi, mvwa mùmvwe cyèla lubilà ne: ‘Pàtukààyi mu bimanu byà Babùlòonà abi,’” wamba ne: “Ndi mumulekele kàdi muumùke. Ncyèna mumanye njila wa kuyila anyi cyà kwenza to, kàdi ndi muumùke.” Bukitù bwà nsongàalùmè awu bùbeneshiibwè, ne mukàji, ne bânà bàbìdi anyi bàsàtù.

³⁶¹ Nzambi, swàkù bwà bààbúngi bàpetè njila wabò ku Díyi dyà Nzambi, njila umwèpelè wà Mwoyi, bwalu Yèyè ùdi Díyi. Ndi ndòmba bwà muntu ne muntu, Taatù. Míngà misangu mu kwamba kwà bintu ebi, kabyèna mu lwonji to; bìdi mu dinanga, bwalu dinanga ditu dilongolola bilèma. Nènku ndi ndòmba, Nzambi, bwà bantu bààmònakù mwà kucyùmvwà ne cìvwa mùshindù awu, mbwena kwamba ne kwikala dilongolola dyà bilèma. Wèwè Uvwa ne cyà kulongolola, kàdi wàkabàsambidila ku nkùrusè wamba ne: “Taatù, bàfwilèku luse. Bòbò, bàdi mpofo, kabèèna—kabèèna ànu bùmvwà cìdìbo bènza aci to.”

³⁶² Ndi nsambidila bambi abu leelù ewu bàdi bàpoopela Díyi pa nkùrusè cyàkàbìdi abu, mu kwangata kwà twitabàayi yàbò ne màngumba ne mèyi maswika, ne kubìpingaja pa Díyi dyà Mwoyi. Ne pashiishe, kumpàla kwà bantu, bàdi—bàdi badyùla Bulelèlè bwà cyà bushùwà bùdi Nzambi ùshindika ne ke Bulelèlè Bwèndè abu. Tudi tubàlòmbela, Taatù, bwà Wèwè kubàbìkila cyàkàbìdi ku Didya dyà Dibanji. Nènku swàkù bwà bàlwe pa díbà edi, ne kabàpeci tubingilà to, bwalu ndi mumanyè ne dibìikila dyà ndekeelu didi mwà kwikala dimanè kuya. Díbà didi mwà kwikala dimanè kupita mpindyewu. Ndi ne dyeyemena ne kî nnànku to.

³⁶³ Bènesàku disangisha dikesè didi apa edi, nkàmà mikesè yà bantu bàdi badisangìshe kaaba aka mu dindà emu aba, ditùkù dyà luuyà lukolè edi, basòmbè mwab’ewu bwà disangisha dyà mukùngùlù mule, pàmwàpa bwà mèbà àbìdi anyi mapite, ne bàtèeleja. Kî mbumùke to. Mbashàale basòmbè bapùwe batèeleje. Bààbúngi bàà kùdìbo bindile didya dyàbò dyà mundaamunya, ne bakàji biimàne ne bânà bààbò bàà mu mabòko, ne mbindile. Mbakwàte ku Díyi dyònsò.

³⁶⁴ Mukalenge, ndi mfika ku dyumvwa cìikalà mwà kungenzekela mu Ditùkù dyà Cilumbulwidi bu mèmè mwà kupàmbula bantu abu. Ndi mumanyè, Mukalenge, bu mùndi mumanyè ne ndi mwà kuumvwa. Bwà ne, ndi nteeta bwà

kubàfikisha ku Dìyì, bwà bìikale ne nsòmbelu wa Dìyì, kubàmbila ne Wèwè udi “umweumwe awu makèlèlèlè, leelù, too ne kashidi,” ne Nyumà Mwîmpè munène awu n’Yesù Kilistò, ànu mu mmwènekelu wa Nyumà Mwîmpè, Muntu umweumwe awu. Wèwè ngwákamba nànkù. “Katanci kakesè aka bàà pa buloba kabààkuMmòna kàbidi to; kàdi nwènù nenùMmònè, bwalu Nèngiikalè neenù, ne munda mwènù mene.” Ne ndi mumanyè ne eci ng’Wèwè, Mukalenge. Ne tudi baKwitàbùùje, bwalu tudi tuKumòna wenza cintu cimwècimwè aci munkaci mwètù.

³⁶⁵ Tudi tudilekelela leelù ewu, mu mùshindù wà dicincika dyà maalu, atùdi twenza kaaba aka mu disangisha edi ne pa mikàbà yà mèyì. Mukalenge, ànu pa kasunsa aka mene, swàkù bwà mulùme yònsò ne mukàjì yònsò, mwànà wa balùme anyì wa bakàjì, udi—udi usanganyiibwa kaaba aka awu, anyì udi mwimàne pambèlù, anyì ucitèeleja pa mukàbà wà mèyì, swàkù bwà pa dîbà edi tûdilàmbulè byà ndòndò mule ne tûlambulè buumùntù bwètù bujimà ku mudimu wà Nzambi.

³⁶⁶ Tentèmùkà pa batèeleji, Mukalenge, mu Bukolè, ne òndopèku babèèdi. Bàvwa bambè ne bàvwa ne mwànà mukèsè wa balùme mucibùkile panshi musòmbè kaaba aka. Enzàku ne Nyumà Mwîmpè munène awu. . .Tudi bamanyè ne, ànu kusòmba mu Bwikadi Bwèndè mùshindù ewu nùnkù, Yèyè neàcyènzè. Bu Wèwè mwà kupicila ku tudyòmbà ne ku ntèlèviziyò, mu matungà ònsò, ne kwondopa babèèdi: “Wèwè wàkatùma Dìyì Dyèbè ne Dyòdi kubwòndopa,” Udi mwà kwenza cintu cimwècimwè aci mu kasunsa aka. Ndi ndòmba, Nzambi, bwà Òndopèku mubèèdi yònsò, muntu yònsò mucibùkile panshi, mwena lutàtu yònsò, kaaba aka ne udi umvwa Mèyì aa. Nzambi, enzaku nànkù. Disambila dyànyì didi bwàbò bòbò.

³⁶⁷ Mwikàle ne—ne dinanga dyà Kilistò munda mwà mwoyi wànyì ne njiyà yà bàdi mu lukèngelu lwà bintu, Nyèwù mbàfila, Mukalenge, Kùdi, pa cyoshelu cyà mulàmbù, mwaba ùdi mubidi wà Mashì wà Mwànà wa mùkòòkò awu wùsanganyiibwa bu mulàmbù wà kujìmija naawù mpèkaatù yètù ne mabèèdi ètù, wùsanganyiibwa mwaba awu. Ndi ndòmba luse bwà bantu. Ndi muswè kwimana bu mwàkiimanà Mòsà amu, pankaci pààbò, Mukalenge, ne kwamba ne: “Nzambi, ikàlàku naabò luse, bòbò aba, ndambù wa cikondo, ne bàpèeshàku mungà mpungà.” Kùcyènji—kùcyènjiku mpindyewu mene to, Mukalenge. Lekèlà—lekèlà Èvànjeeliyò àye ànu kumpàla ndambù.

³⁶⁸ Mba—mbapiishibwe, Mukalenge. Ndi ndòmba bwà luse Lwèbè lunène ne ngàsà bì—bikafikè too ne kùdi muntu wa ndekeelu udi ne dìnà dyèndè mu Mukàndà awu. Ne ndi mumanyè ne nebiikalè nànkù. Kì mbikolè bwà kusambila bibèngangana ne Dìyì Dyèbè dyà Bunzambi to, anyì bilwisha—anyì bilwisha. . .kusambila ne Dìyì dyà Bunzambi to, ki cìndi muswè kwamba’s, Mukalenge; Dìyì didi dilayibwe, Dìyì dìvwà dijaadikiibwe, Dìyì dyàkadyànjila kulongolola bantu abu kalè

wàwa kumpàlà kwà difùkà dyà dyulu ne buloba. Kabyèna—kabyèna bikolè bwà—bwà kusambila bwà Wèwè kusungila beena mènà adi mu Mukàndà awu abu to, bwalu ndi mumanyè ne Wèwè neücyènze. Yesù ngwákamba nàнку: “Bònsò bàdi Taatù muMpèèshe nebàlwe.” Ne muntu nànsha umwe kèna mwà kulwa pàdiye kàyi mufidiibwe to.

³⁶⁹ Mpindyewu ndi ndòmba, Nzambì, bwà ne myaba yònsò yidì Mèyi aa àkamata, bònsò ne bàdi pa mukàbà wà mèyi ne bàdi mwab’ewu, bwà Nyumà Mwimpè àbìikile muntu yònsò udi mudyànjila kulongolola awu ànu mpindyewu ewu, kacya ànu ku difùkà dyà dyulu ne buloba pàakafundiibwà dìnà dyàbò mu Mukàndà wa Mwoyi wa Mwànà wa mùkòòkò. Swàkù bwà buumvwè Dìyi dyà Nzambì didì munkaci mwà kwakula leelù ewu edi, mu kaaDìyi kakesè, kapòlòbèle, kakesè menemene aku munda mwà mwoyi wàbò, kamba ne: “Ewu ki Njila, endèlaayiMù.” Enzàku nàнку, Taatù. Ndi ndòmba nùнку mu Dìnà dyà Yesù.

³⁷⁰ Ne patùcidi ne mitù yetù miinyika mu batèèleji emu apa, nwènù biitabùùje ne eci m’Bulelèlè, ne nwènù—nwènù. . . Ndi mutèèke, mutentèke byanza byànyi pa mìshwàlà yidì mitèèka mwaba ewu eyi, ne mabùki bwà babèèdi ne beena ntàtu. Ndi muswè nkweleku lukonko, ne meeji matòòke ònsò mpindyewu.

³⁷¹ Ncyèna mulwè muneemu ànu bwà kuntèèlejabò to. Ndi—ndi—ndi mucyòke. Ndi muzengèle. Nciyèna mwànà mutekète mùmvwà kwònsò eku amu to, ne ndi—ne ndi mumanyè ne matùkù ètù mmabala. Ne ndi mumanyè ne bidì bikèngela bwà mèmè kubweja kantu kakesè kònsò kàndìku mwà kwela aku, bwà Bukalenge bwà Nzambì. Ndi ne cyà kuyiisha musangu wònsò wùndì mwà kupeta mpungà kampànda awu. Ndi ne cyà, ndi ne cyà kuya nànsha mèmè muumvwè mwà kuya anyi nciyi muumvwa.

³⁷² Ndi ndwa mwaba ewu bwalu ndi—ndi ndyùmvwa bwà kucyènza. Ndi—ndi muswè kucyènza. Ndi munùangè. Ncyèna ngàmba bintu bipape ne byùmà ncyoncyoncyo, bwà—bwà. . . bwalu ndi muswè kubyàmba to. Kùdi—kùdi dituuta dyà mwoyi munda mwànyi emu. Cintu ciine citu cishindikiiibwe eci ke cintu cidi cìnsàka bwà kwenza bintu ebì. Ntu ncyàmba ne kalolo, ne dinanga. Ncyèna ne meeji à kutàndisha bakàji bèètù anyi balùme bèètù to. Ncyèna ne meeji à kwenza nàнку to, mwanèètù wa balùme, mwanèètù wa bakàji. Ndi muswè ànu kunùtwàla pa kaaba—katwè ngwe, panùdi mwà kumòna dilongolodiibwa dyà bilèma ne mfimbù wa Mukalenge, bwà nwikale ne cyà kubwelamu mpindyewu. Kanùcilàadikiji to; nudi bafwànyine kwindila díbà kunùpitadi.

³⁷³ Nènku nwènù bàdi bàjinga bwà kulwa ku lusekè lwà Mukalenge, ne didifila dyònsò munda mwà mwoyi wènù, mu bwikadi mu batèèleji emu mpindyewu, anyi mu ditunga

mwikalà mikàbà yà mēyì mwà kusanganyibwa; nudikù mwà, ne mitù yènú miinyika. . . Kanwèdi byanza byènú muulu panwikala kanùyi baswè kubyèla to. Mpindyewu wèwè ucyàmba wambilamù cyà bushùwà, ne udi muswè kulwa kùdi Mukalenge, ne nsòmbelu mukwàbò mulàmbula, kwènàku mwà kwela cyanza cyèbè muulu ànu mpindyewu ewu anyi? Wèwè, Mukalenge àkùbènèshè. Udi udilàmbula cyàkàbìdì kùdi Kilistò, bwà kuteeta bwà kutwàla bundù. Wèwè udi wamba ne: “Ndi muswè leelù ewu bwà kutwàla bundù.”

³⁷⁴ Ndi pàànyì, ne byanza byànyì byònsò bìbìdì byela muulu. Mémè, ndi muswè kwangata bundù bwà Yesù Kilistò pambidi pàànyì. Ndi mwàla ne disànkà dyònsò cimanyinu eci cidi cibiiikidiibwa ne “munsantu mubùnguluki wa mu malaba,” cyònsò cinùdì bafwànyine kuswa kucibiiikila aci. Ndi ncilwàta ne maleela, bwalu mbwà bwalu bwà Mukalenge. Ndi ncilwàta ne maleela.

³⁷⁵ Nwènú bònsò kanwèna baswè kwenza byà mwomùmwe anyi? Elààyi byanza byènú muulu, nwamba ne: “Ku ngàsà wa Nzambì, ndi—ndi—ndi muswè. . . Ndi. . .” Bayiidi bààkaalukila, bèèla meeji ne ciwà nduumu lunène bwà kwambula bundù bwà Dìna Dyèndè. Anyi, udi muswè kwambula bundù bwà muntu kampànda mwendè luumù wa mu Hollywood, anyi bwà cintu kampànda cyà ku ntèlèviziyò, anyi cidimba kampànda cyà èkèleeziyà, anyi cintu kampànda? Anyi, udi muswè bundù bwà Dìyì dyà Yesù Kilistò anyi? “Mpèèshàku bundù bwà Dìyì, Mukalenge. Ndi mumanyè ne Yèyè wàkambula bundù bwà Dìyì dyà Nzambì. Enzàku bwà mémè kubwàmbula, mémè pàànyì, Mukalenge.”

Nèku nêngàmbulè nkùrusè mulambula ewu,
Too ne pààndekelela lufù,
Pashiishe kwalukila kumbèlu, bwà kuvwàla
cifulu cyà butumbi.

³⁷⁶ Nekwikalè cifulu cyà butumbi dīngà ditùkù bwètù twètù. Cidi munkaci mwà kwenjiibwa mpindyewu. Pàdì mwoyi wà pa buloba ewu wùjika, dībà adi tudi tumanya ne nebiikale bimpè.

³⁷⁷ Mpindyewu kakwèna mwaba bwà kulwa ne bantu ku nyùngulwilu wa cyoshelu nànsha. Enzàku bwà ne nkwasa webè awu, ùdì usanganyibwamù awu, ikale cyoshelu. “Bùngì bònsò bwà bàdì biitàbùuje abu. . .” Patùdì tusambila apa.

³⁷⁸ Taatù wa mu Dyulu, bìdi bimwèka kùndì ànu bu ne ciibùngì cyà byanza ne byà bānà ne byà bakolè, bìvwa byediibwe muulu, mu batèeleji emu. Nèku ndi ndòmba bwà ne, musangu wònsò wikalà mukàbà wa mēyì ewu mwà kwediibwa, bwà bantu kwelabò byanza byàbò muulu, ne kutwà binù panshì mu cibambalu amu; taatù ne maamù bwolòle byanza bakwàtàngàne muntu ne mukwèndè, bamba ne: “Munanga wanyì, tudi bidimba

byà èkèleeziyà kùkaadi ntàntà bule bukùmbàne. Lwâ tuye kùdi Kilistò.” Enzàku nànkù, Mukalenge.

³⁷⁹ Bèneshàku bantu aba. Ndi ndòmba bwà Wèwè kubàpèèsha, Mukalenge, nsòmbelu wa badilàmbùle. Bààbùngi bàà kùdibo, Mukalenge, mbantu bìmpè. Bàdi—bàdi cisàmbà Cyèbè; kí mbamanyè ànu Bulelèlà tò. Nènku ndi ndòmba bwà Ûbàleejè Bulelèlà Bwèbè, Mukalenge. “Dìyi Dyèbè didi Bulelèlà.”

³⁸⁰ Ànu m’Ûdì mwàmbè mu Yone amu, ngèèla meeji ku nshapità wa 17, Wákamba ne: “Bàjidilè, Taatù, ku Bulelèlà. Dìyi Dyèbè m’Bulelèlà.”

³⁸¹ Ne Dyòdì cyàkàbìdì, Dìyi Dyèbè, dìcìdì ànu Bulelèlà. Dìdi misangu yònsò ànu Bulelèlà, bwalu Didi Nzambì. Nènku ndi ndòmba, Nzambì, bwà Ûbàjidilè ku Bulelèlà. Mbwena kwamba ne, kujidila, kubàkezula ku twitàbàayi yònsò ne màngumba ónsò. Ûbàkezulè ku bintu byònsò byà pa buloba, bàye ku nsòmbelu wa badilàmbùle wa Dìyi. Enzàku nànkù, Mukalenge. Mbèèbè Wèwè mpindyewu. Wèwè wàkalaya bwà kucyènza. Nènku mémè bu musadidi Webè, ndi ndambula disambila dyànyì bwà bwalu bwàbò. Mu Dìnà dyà Yesù Kilistò.

³⁸² Mpindyewu ne mitù yètù miinyika, twìmbàayi musambu ewu patùdì tutùngunuka ne kusambila apa.

Yesù wàkabìfuta byònsò,
Byònsò kùdiYe... (Elàayi meeji ku bwalu
abu’s!)
Mpèkaatù... .

³⁸³ Makèlèlèlà awu mvwa nsanganyiibwa mu—mwaba kampànda, ne muntu kampànda ùvwa ùmpima bule bwà nkooi uvwa mwanèètù kampànda wa mu èkèleeziyà emu munsùmbile. Yèyè kwamba ne “Nkooi webè ùvwa ùmwèka ne luuyà, nènku nyèwù ndi mukusùmbile wa citaleela.”

³⁸⁴ Kí mémè kuya bwà kamukòsesha, kí yèyè kwamba ne: “Amba tǔng, dikaaya dyèbè dyà dyàbalùme ndiinàme panshi. Udi ne cyà kwikala mwambùle bujitu bupìte ditùkù kampànda.”

³⁸⁵ Kí mémè kudyàmbidila ne: “Èyowà’s, bujitu bwà mpèkaatù. Kàdi Yesù wàkabìfuta bònsò.” Tèelejàayi patùdì tuwimba apu.

Yesù wàkafuta... byònsò,
Dìbà adi wònsò, mwoyi wanyì wònsò, kùdiYe
ndi... (Ncinyì cìdì mpèkaatù mwenze?)
Mpèkaatù ùkaavwa mushiye dikeji dyà mashi:
Yèyè wàkadìsukula kudishiya ditòoke tòò bu
nèjè.

³⁸⁶ Nzambì, ikàlàku neetù luse. Bu mùdì cikondo eci cyà ndondo cyà dyelangana dyà meeji, enzàku bwà Dìyi dibwele mu ndòndò, Mukalenge, too ne mu mwoyi. Bantu, nànsha bòbò bapìcishe dìbà dyà didyà dyàbò dyà mundaamuunyà... Kàdi, Mukalenge, Eci’s ncipìte ne cyàkudya. Eci ke Mwoyi. “Dìyi

Dyànyì ncyàkudyà,” muWàkamba. Nènku Aci’s ke cidi misùùkà yètù yidi ne nzala eyi yidyà yicyònkomoka.

³⁸⁷ Mpindyewu twangàtèku, Mukalenge, tũfwimbèku. Mukalenge, ngangàtè naabò pàmwè. Ndi muswè kuya naabò. Nyèwù nya ku Kàlvaryò mpindyewu, Mukalenge, ku diitabuuja. Nyèwù nya ne disangisha edi. Mpindyewu anji mfwimbèku, Mukalenge. Ntu mwenzè bibi. Misangu yàbúngi ntu . . .

³⁸⁸ Mwab’ewu nkààvwa nswa kulekela diyiisha. Bantu kabàvwa baswè kuntèèleja to. Bàvwa ànu batúngunuke ne kwenza cintu cimwècimwè aci, ki mémè—mémè kutekeshiibwa mu mabòkò. Mvwa mupetè meeji à cyena bundù. Éyi Nzambi wa yààya! Kùkaadi ndambù wa maadyàlumingu, paùdi Wèwè mumpèèshe cimanyinu aci, kí. . . ne kubala Bible, ne kumòna ne wakambila Mòsà, ànu mǔvwa cilòòtà aci amu, ne kǔvwa mukùnà, kàbìdi, ne cifwànyine kwikala cimanyinu kùdiye. Ne pashiishe ànu ku ndekeelu kwàci aku, bwà kumanya ne mvwa—mvwa mushiye babèèdi bààbúngi; mudimu wà bwambi kawùvwa ànu mu ciprófetà cyanààna to, kàdi mu kulongesha kwà Dìyì, ne—ne bwà kusambidila babèèdi. Wèwè kulekela muntu ùkùluka ùfwa ànu mwab’ewu, pashiishe kumwalùje ku mwoyi, bwà dishindika dyà ne cívwa cilelèlà. Wèwè utu misangu yònsò ànu ushindika Dìyì Dyèbè.

³⁸⁹ Mpindyewu, Mukalenge, cìshindikaaku mpindyewu mene pàncidi kumpàla kwà Nkwasa Webè wa butùmbi apa. Angàtaaku muntu ne muntu wa ku bantu aba, Mukalenge, pàtulàku maalu à pa buloba munda mwètù. Ngangàtèku, Mukalenge, patùcidi mu Bwikadi Bwèbè apa. Angàta wèwè ànu maalu à pa buloba, nyènguvulà myoyi yètù, Nzambi, mpindyewu mene. Umùsha maalu à pa buloba ne dijinga dyà maalu à pa buloba kutùdi. Enzàku bwà twikale beena Kilistò badilàmbùle, Éyi Nzambi, bwà kwikala ne dinanga ne kalolo ne bupòle, tukwàma mamuma à Nyumà. Kí mmwómò anyi, Mukalenge? Tudi kumpàla kwà Nkwasa Webè wa butùmbi. Mpèkaatù mmushiye dikeji dikúnze pa yònsò wa kutùdi, kàdi Mashi Èbè àdi mwà kumulekela, Mukalenge, ne kumuvwija mutòòke bu nējè. Enzàku nàнку, patùdi baKwindile apa. Twángàtèku; tudi Bèèbè Wèwè; balàmbùle nsòmbelu yètù kùdi Wèwè. Mu Dìna dyà Yesù Kilistò, enzàku nàнку, Mukalenge, bwà yònsò wa kutùdi.

³⁹⁰ Nyènguvulaku mwoyi wànyì, Mukalenge. Ndi mmòna ntùpàkànyì yànyì yònsò. Ndi mmòna bilèmà byànyì. Nzambi, kubangila pa dībà edi, ndi nteeta kwikala ne nsòmbelu mutàmbe bwímpè wùndiku paanyì mwà kwikala nendè awu, bwà kuKukwàcisha. Ndi muswè kuya, ndi muswè kulambula mwoyi wànyì cyàkàbìdi kùdi Wèwè, mwab’ewu mu dindà emu.

³⁹¹ Paanyimà pàà ditwàlà dyà difùnda dyà bàànyì—bàànyì balombodi naanyì bàà ntèndeleelelu kuntwaku, ne bikèngela


kwamba maalu makolè aa, kàdi, Mukalenge, ndi mucyènzè ku disonsodiibwa Dyèbè. Ndi ndyùmvwà ne Wèwè ngudi mungambile bwà kucyènza. Mpindyewu abu kabwèna pa makaaya ànyì to, Mukalenga. Ndi—ndi ne disànkà bu mùdibu buumùke. Bènzè naaci cyònsò cyàswàbo aci, Taatù. Ndi ndòmba bwà bàcitàbè. Ndi ndòmba bwà Wèwè kusungila muntu ne muntu, Mukalenge.

³⁹² Swâkù bwà kulwakù ditàbuluja dyà baakàne, ne Bukolè bunène kulwabù munkaci mwà Èkèleeziyà ànu kumpàla mene kwà diya Dyèndè. Ndi. . . Kì mbikolè bwà kusambila aci to, bwalu Wèwè ngudi mucilàyè. Nènku tudi bindile, Mukalenge, bwà nkòkelu mwisâtù utùdì bamanyè ne neènzè bintu binène munkaci mwètù awu.

³⁹³ Mémè ndi Webè, Mukalenge. Ndi ndyàdija mémè mwinè pa cyoshelu eci, mudilàmbùle ne mwànyì pàànyì mwònsò mùndì mumanyè mwà kwenza amu. Nguumùshèku buloba mu mémè, Mukalenge. Umùsha bintu bidì bìbola munda mwànyì; mpèèshèku bintu bidì kabìyì bìbola nànsha, Dìyì dyà Nzambì. Swâkù bwà mémè kufùdisha bwà kwikala ne nsòmbelu wa Dìyì adi menemene, mu mùshindù wà ne Dìyì diikale munda mwànyì, ne mémè mu Dìyì. Enzàku nànkù, Mukalenga. Swâkù bwà ncyùmukiKù nànsha. Swâkù bwà mémè kushààla mukwàte ku Mwelè wà mvità wà Mfùmù awu ndendende, ne kuWùkwàta muwuminyine bikolè. Enzàku nànkù, Mukalenge.

³⁹⁴ Tùbènèshèku bònsò pàmwè. Tudi basadidi Bèèbè, patùdì tudilàmbula twètù biinè Kùdì mu dindà emu apa, cyàkàbidì, mu myoyi yètù. Tudi Bèèbè Wèwè, mu Dînà dyà Yèsù Kilistò, bwà mudimu.

Yèsù. . .

Nzambi àkubènèshè! Mwanètù Neville. 

63-0707M Difùndà Dyà Ku Cilumbù
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org